

Ang'ana Anchömu e Yesu kinya yandekuru na **Ruuka**

Obhukangati

Eghitabhu kino n-obhugarori bho Ng'ana anchömu e Yesu Kirisito, kinya yandekuru na Ruuka. Mo-riiraghano Eriihe mbeenyi-mu ebhitabhu bhine bhino bhokobherekeru Ang'ana anchömu e Yesu Kirisito. Abhandeki bha bhitabhu bhino mbaghotobhoorera itu ighoro erimënya re Yesu, amare egheghiro eghegoro mbeendiri kurëeta amang'ana gha Yesu kwo bhasömi bhaache, na kobhabhoorera gho kobharaghereri abhaato bhamokumi.

Ruuka neendiri omooto umu uno are arabherekeru Teyobhiro, amanye obhuhëenë ighoro erimënya re Yesu, omoremo waache na amaköri gha bhutamishi bhooche. Kiyö nkyo ghiighërii akaandeki eghitabhu kino. Wiiki naandekiri eghitabhu ekende ke Amaköri gha Bhatomu. Totaanyi na amang'ana maaru ighoro e Ruuka, amare iwe mughabho are na mo-orughëndö rooche, ahanene naare arahinana na Bhawuro (umööhi Abhakorosaayi 4:14, 2 Timotewo 4:11 na Bhiremoonni orukarara ro 24).

Ruuka naandekiri gho Keyunaani. Kwi bheere ino, eghitabhu kino nkimariri ghugaroru mo-ghighambo keecho! Ibheere iye noghotorä ghoghisöma na ghokimanya bhoheene. Amenda gha bhagharori ngaare ghugarura kinya bhuure :ghaare amandeko gha simoka kwo obhuchömu no obhuhëenë. Bhataagharwire gho kwandeka ang'ana kwo ang'ana, amare mbikong'iri chwee kwandeka amandeko ghano abhaato bhaghatëghëerë, na ghoghamanya mo-ghighambo keenyu ghe simoka.

Amang'ana amasooku gha Bhiibhuriya

Mo-ghitabhu ke Ruuka, ngaanyi-ho amang'ana aghande amasooku ghano ghakohikereri amang'ana gha amaraghereri gha hëenë mo-Bhiibhuriya. Amang'ana ghayo aghamu nigho ghano, Obhutööbhiyu, Komusa, Erisëngërö, Marayika, Omuchaama, na ghande maaru. Mo-mang'ana ghano amasooku, aghamu ghataanyi mo-ghighambo keecho ghe simoka. Gho ghayo, abhagharori :mbiikong'iri chwee ghutabhara amang'ana ghano ghaaghotora kwereki ang'ana yiire yiire yendiiru kwo bhuhëenë. Abhagharori mbaköriri ebhiina bhyaru na abhaato bha mo-ghighambo keecho, bhakarwacha nabho ighoro e mang'ana ghayo aribha bhaghotora ghoghamanya na ghwisherani naghö. Kurëng'aana ne ebhiina bhiyo, abhagharori mbamööhiri na kwahura m-mang'ana ke ghaakubha kwandeku mo-mang'ana ghano amasooku gha Bhiibhuriya. Tokeere totaamara tuköra obhwahori bho kimukimu. Tokeere toratabhara obhuhëenë bho mang'ana ghano bhoheene. Ibheere abhagharori mbaghuchömëru kooghu aribha iye nooniyi na amang'ana, hande amihëëbhö aghande ghano ghaakubha kwandeku mo-mang'ana aghamu. Gho ghuköra hang'u ngokobhasakeri abhagharori kwenderera ghuchöcha omoremo waabho bhoheene.

Ameerekereri ighoro e mang'ana aghande amaköng'u

Abhagharori mbiikong'iri ghugarura gho nchera ino eghotoori omooto uno aghusöma kumanya ang'ana bhoheene, nangabha ghaanyi-ho amang'ana aghamu na amihëëbhö aghande mo-Bhiibhuriya maköng'u ghugaroru. Ibheere mo-kumareereri mo-ghitabhu kino, usömë amang'ana gha meerekereri ghano

ghandekuru gho ghiri ghaghusakeri kumanya bhoheene. Ngakobherekeru, Ameerekereri ighoro e mang'ana amaköng'u.

Ameerekereri ighoro e nchöta *, na † na amang'ana ghano ghabhöhuru []

Ahaghiro ahande nokorighi kubha, mo-kumareereri mo-ng'ana nkeenyi-ho eking'öchö ghesuuu, hamu anchöta insuuu enga ino *. Eking'öchö kiyo ngekwereki kubha, umööhi haase mo-mandeko ghano oghusöma nokubhöna ameerekereri ghaghoghusakeri kumanya ahaghiro hayo bhoheene. Haase hayo, nokubhöna ameerekereri machömu, kurëng'aana na amang'ana amaköng'u ghano ghaanyi mo-mandeko ghayo usömiri. Gho ghetubhaani, umööhi Ruuka 2:1

Mo-mitu eghende ghe mang'ana, noghogharighi ameerekereri ghano ghaaghokohira mo-bhiseku ebhende na chaanamba che mikarara che mo-bhitabhu ebhende bhe Ng'ana anchömu. Oramööhi amang'ana ghano Ruuka andekiri ngaakubha ghatubhiine na amang'ana ghano ghandekuru mo-bhitabhu bhiyo. Gho ghetubhaani, umööhi Ruuka 2:1, ibheere oramööhi omutu o ng'ana nokobhugha, Kwibhoru kwo Yesu, na ameerekereri ngaghokohira usömë eghitabhu ke Mataayo 1:18-25.

Wiiki orasöma mo-mikarara eghende nookorighi eking'öchö kenga kino †. Ekeng'öchö kiyo ngeghokwereki kubha, umööhi haase mo-mandeko ghano oghusöma nookorighi bhaghotoriire eghitabhu kino okurëng'aani na ahaghiro hano oghusöma. Mööhi Ruuka 1:17

Wiiki, orasöma ameerekereri ahande, ngaghokuha amang'iini aghamu koru mo-Bhiibhuriya, ghano ghaghoghusakeri kumanya bhoheene ahaghiro hano oghusöma. Gho ghetubhaani, umööhi Ruuka 3:1.

Ngaanyi-ho amang'ana aghande ghano ghabhöhuru hamu ghaanyi mo-king'öchö kenga kino []. Gho ghetubhaani, usömë Ruuka 8:43, hano nooghusöma

Ghate e bhaato bhayo naare-mu omukari, uno are no obhubhabharu bho koru amasahe kwo riubhagha re meeka ikomi ne ebhere. [Wiiki naare amariri ghusari ebheghiro bheeche bhyose gho kobhaha abhaghabho.] Taare-ho koru mooto uno atoriri komuhöri.

Ameerekereri gha king'öchö kiyo nigho ghano. Amang'ana ghano ghabhöbhuru mo-bhing'öchö bhiyo ngakwereki kubha, amang'ana ghayo ghataanyi-mu mo-mandeko aghande gha Chabhibhuriya che kare. Wiiki amang'ana ghayo ghataanyi mang'ana makoro gha bhokumi.

Amang'ana ghano ghaanyi mo-ghitabhu ke Ruuka.

Ruuka nakwerekereri ghano ghaköriri akaandeka eghitabhu keeche. Ruuka (1:1-4)

Kino ghiigheriri Yesu Kirisito akiibhoru (1:5-2:52)

Emeremo ghe Yohana omubhatisaachi Ruuka (3:1-20)

Yesu akabhatiisu na ghusakibhu ne Eriishambu Ruuka (3:21-4:13)

Yesu akeeghi, akaraghani Ang'ana na kuhöri abhaato Ghariraaya Ruuka (4:14-9:50)

Amang'ana na amaköri gha Yesu eriihagha anyi mo-rughëndö ro ghuye Yerusaremu Ruuka (9:51-19:27)

Wiiki e kumareereri e Yesu Yerusaremu Ruuka (19:28-23:56)

Omutëmi Yesu akaryoka Ruuka (24:1-53)

Gho kwengereereri, ntooghusabha otobhoorere amihëëbhö ghaacho, no otumënyi hayi tusariri ighoro e bhugarori bhuno. Amenda na amasabhi gha bhagarori n-kubha, omooto woose uno aghusöma eghitabhu kino, amanye

bhoheene amang'ana gha Yesu, wiiki achömëru gho kubha na komumanya na komusëngëra iwe omwene chiri.

Omosooku Teyobhiro

1 ¹ Oo omosooku Teyobhiro, :ghaare ghaakörëkiine ghathe yiito, abhaato bhaaru mbamariri ghwiköng'i gho kwandeka ighoro yaache. ² Amang'ana ghayo, :mbaaghandekiri kinya tobhoriuru na bhaato bhaare bhagarooche koru simoka Yesu ataamara ibhoru, wiiki nibho :bhaare ghusanchi Ang'ana e Ryobha. ³ Hano nimiriri kobhoori bhoheene amang'ana gha Yesu kinya ghaakörëkiine koru simoka, nekarighi kubha m-bhoheene nekwandekere ghayo kwo bhuchömu, ⁴ gho ghiri ubhe no obhuhëënë ke bhuno weghiriibhu.

Obhuröoti bho kwibhoru kwo Yohana omubhatisaachi

⁵ Kwo riibhagha riire Herote are omutëmi mo-mukööwa o Yuteya, naare-ho omuchaama umu eriina reeche Sakariya, o mo-bhoyo bho Abhiya omuchaama.* Mkaache naare arabherekeru Rusabheeti. Bhoose mbaare bha mo-rwibhoru ro muchaama Haruuni. ⁶ Bhayo bhabhere mbaare bhahëënë ambërë e Mutëmi Waryobha, na mbaare bharasooka emeghiro gheeche ghyose, na bhataghitaasiri. ⁷ Bhayo bhabhere, bhataare na moona, gho kubha Rusabheeti moghomba are, wiiki mbaare bhakunguhiri chwee.

⁸ Orosiko rumu, Sakariya naare araköra omoremo waache o bhuchaama ambërë e Ryobha, gho kubha ndeere eriihagha re bhoyo bhooche kowoköra. ⁹ Wiiki kurëng'aana na asughara e bhuchaama, abhaghëndi bhaghatëma akuura, ekamoghwera Sakariya kubha niwe aghusöha ahaghiro Ahasooku Mwisëngëro, gho ghiri amoghunderi Omutëmi akorose. ¹⁰ Eriibhagha re ghoghundi akorose, anche :haare ha-komiine abhaato bhaaru, bharasabha Eryobha.

¹¹ Hayohayo, Sakariya akarweru muyo na marayika o Mutëmi. Marayika uyo, naare imeriire eribhaara re kwiuro re ghoghunderi akorose iyo. ¹² Hano Sakariya amarooche, aghiitaki, aghatiina chwee.

¹³ Amare, marayika uyo akamobhoorera, "Oo Sakariya, otatiina! Ghaare usabhiri Eryobha, ndimariri ghoghooghu. Ibheere mkaacho Rusabheeti, naaghokwibhorera omoona o ghesubhe, omoroke eriina reeche Yohana. ¹⁴ Omoona uyo, niwe aghughëri uchömëru na ghosiighasiigha. Abhaato abhande bhaaru mbaaghosiighasiigha gho kwibhoru kooche, ¹⁵ gho kubha omoona uyo naakubha mokoro ambërë e Mutëmi. Omoona uyo ataacha kunyo amaro ghoghoose ghaare. Korwera mo-nda e nyina, naakubha ichoriibhu Akörö Ahörëëru. ¹⁶ Naghugharoki Abhiisiraeri bhaaru kwo Mutëmi waabho Waryobha. ¹⁷ Akörö yaache no obhotori bhooche, mbookubha ke bhuno bho muröoti Eriya. Omoona uyo naakomukangata Omutëmi, gho ghiri amusëëmërë abhaato bha ghutëmëërana nawe. Naaghutëmëërani abhaana na bhiishe, naakobhaköra abhaato bhano bhataanyi na sooko bhabhe na mihëëbhö kinya bhaare bhaghosooka Eryobha."*

¹⁸ Sakariya akamobhoori marayika uyo, "Neke gheekonyeereki obhuhëënë bho mang'ana ghayo? Naho eni na mkaane ntokunguhiri!"

¹⁹ Marayika uyo akabhugha, "Eni, Ghabhuriyeri, neeni Nekwimeerera ambërë e Ryobha. Ndentomiri niiche ghokumënyi ang'ana ino anchömu. ²⁰ Amare, gho kubha toyisheriri, nookubha erimumu. Tooghotora ghughamba wiiki, mbagha eriihagha rehike ghano ghaköru, na ngaaghuköru kwo riibhagha reeche!"

* 1:5 **Abhiya** naare omuchaama hayo kare.

* 1:17 Mööhi Maraaki 3:1, 4:5-6.

²¹ Abhaato bhayo mbaare bharatëngëra kubha, Sakariya naakuröbhöka koru ahaghiro Ahasooku ha-Risëngëro, bhaakabha bhahaghiri ke bhuno aghakëëchëra-mu. ²² Hano ichiri koru-mu, taatoriri wiiki ghosiikera, akabha arabheerekereri kwo mabhökö. Hayohayo bhaakamanya kubha naarooche amarighi Mwisëngëro. Iwe aghasaagha kubha rimuumu.

²³ Hano amariri chaasiko cheeche che kuhöki Mwisëngëro, aghaye awaache. ²⁴ Akamara mkaache Rusabheeti aghaghëgha anda, akamara emyeri etaano ibhisiri, arabhugha, ²⁵ “Omutëmi, niwe anköriire hang’u! Kwo riibhagha rino nahiitiri konduseri chaasoni ambëre e bhaato.”

Obhuröoti bho kwibhoru kwo Yesu

²⁶ Eriibhagha anda e Rusabheeti ehikiri emyeri esaasabhe, Eryobha reekamotoma marayika Ghabhuriyeri mo-moghya o Nasareeti, mo-se e Ghariraaya, ²⁷ kwo muuke umu, eriina reeche Mariyamu. Nawe naare ararwacheru obhuku no omosubhe umu, ekobherekeru Yusubhu, o mo-rwibhoru ro mutëmi Tawuti.

²⁸ Marayika uyo aghaye o-Mariyamu, akamobhoorera, “Neghoghukëeri, iye witabhiiru chwee! Omutëmi naanyi haghirohamu na niye.” ²⁹ Mariyamu, hano oghwire amang’ana gha marayika uyo, omotema waache okanyaaka chwee, akibhoori, “N-ghukëerani ke kuno?”

³⁰ Amare, marayika uyo akamobhoorera, “Otiina Mariyamu! Numariri ghwitabheru ne Eryobha. ³¹ Tëghëëra! Ibheere noghughëgha anda, na wiibhore omoona o ghesubhe, no omoroke eriina reeche Yesu.* ³² Naakubha mokoro, naakobherekeru Omoona o Ryobha omokoro o bhyose. Omutëmi Waryobha, naakomuköra abhe omutëmi mokoro, kinya ishakoro Tawuti are. ³³ Naghwikara no obhutëmi bho bhaato bhoose bha Isiraeri, emiishe ghyose. Obhutëmi bhooshe, bhotaaghosira naabha.”

³⁴ Mariyamu, akamobhoori marayika uyo, “Nibhu ghano ghaakubha, na ntiimara mumanya omosubhe?” ³⁵ Akamugharokeri, “Akörö Ahörëëru neeghghwikera, no obhotoro bho Ryobha omokoro o bhyose, mbookubha ighoro yaacho ghe kiriiri. Omoona uyo okwibhora, naakubha omwahoru, naakubha arabherekeru Omoona o Ryobha. ³⁶ Koru ibheere omoonyu Rusabheeti, naanyi na anda e myeri esaasabhe, nangabha akunguhiri, ekeeniyuma mbaare bharamughamba kubha moghomba. ³⁷ Kwo Ryobha, ghetaanyi-ho kino ghetaakubha.”

³⁸ Mariyamu aghagharokeri, “Eni n-omutamishi o Mutëmi neenyi, ibhe hang’u ghokoone kinya obhughiri.” Hang’u amariri marayika uyo aghaye.

Mariyamu ^aghaye ghukëerani o-Rusabheeti

³⁹ Chaasiko chiyochoyo, Mariyamu aghaköra bhwango orughëndö ghuye o-Rusabheeti, mo-moghya umu o bheghoro bhe Yuteya, akahika o-Sakariya. ⁴⁰ Hano asöhiri o-Sakariya, aghakëëri Rusabheeti. ⁴¹ Rusabheeti, hano oghwire erikëerani re Mariyamu, omoona uno anyi mo-nda yaache aghatuumatuumu. Hayohayo, aghiichöribhu Akörö Ahörëëru, ⁴² akabhugha kwo riiraka ikoro kubha, “Mo-bhakari bhoose, iye witabhiiru! Wiiki nokwibhora omoona, itabhiiru! ⁴³ Eni, n-niwe, koru nyina o Mutëmi wiito akaacha ghunkëëri? ⁴⁴ Hang’u nwoghwire erikëerani reecho, hayohayo omoona uno anyi mo-nda yaane, aghatuumatuumu gho ghuchömëru. ⁴⁵ Ng’oni iye, gho kubha wisheriiri ghano Omutëmi akobhooriire kubha ngaaghuköru!”

* 1:31 Mööhi Isaaya 7:14.

Omwembo o Mariyamu

⁴⁶ Mbe, Mariyamu akabhugha,
 “Omotema waane, nookomoghongi Omutëmi,
⁴⁷ na noghosiigherasiighera Waryobha, Omotoori waane,
⁴⁸ gho kubha, nahiitiri eni omutamishi waache,
 nangabha neenyi mooto o hang’uhang’u o haase.
 Koru ibheere, abhaato bha chanyiibhoro choose,
 mbaakubha bharabhugha kubha ng’oni eni.

⁴⁹ Eryobha re bhotoro,
 ndimariri ghunkörëra amang’ana gha koroghoora.
 Eriina reeche n-Omutöobhiyu!

⁵⁰ Naakubha araghwera bheghongi abhaato
 bha chanyiibhoro choose, chino chekomoghwera.

⁵¹ Naköriri amang’ana makoro kwo mabhökö ghaache.
 Nabhasanchiini bhano :bhaare bhariitëng’ëra emetema gheebho.

⁵² Na bhano :bhaare bharatëmi kwo bhotoro bhwaru,
 akabharuusi mo-bhutëmi bhoobho,
 amare abhasuuu, nabhaköriri bhabhe abhaato bhakoro.

⁵³ Bhano bhaanyi na anchera, naamariri kobhiighoti no omurëmbë,
 amare abhaame, akabhahëëbha mabhökö bhoowa.

⁵⁴ Naamariri ghotoori omutamishi waache Isiraeri,
 akahiita komoghwera bheghongi,

⁵⁵ kinya bhuure are abhabhoriire bhasookoro bhiito,
 Abhurahamu na abhaato bhoose bha rwibhoro rooche,
 emiishe ghyose.”

⁵⁶ Mariyamu, akamara kinya emyeri etato anyi hayo o-Rusabheeti, akamara
 aghagharuka aka.

Okwibhoru kwo Yohana omubhatisaachi

⁵⁷ Chaasiko che kwibhora Rusabheeti, hano chehikiri, akiibhoro omoona o
 ghesubhe. ⁵⁸ Abhaatani bhaache, na abhahiiri bhaache, hano bhoghwire kubha
 Omutëmi namoghweriire bheghongi, bhaghasiighasiigha haghirohamu.

⁵⁹ Omoona uyo, hano ahikiri chaasiko inyaanye, bhakaacha komusaara.
 Bhakeenda bhamoroke eriina ri ishe Sakariya. ⁶⁰ Amare, nyina akanga, akabhugha,
 “Tiyaanyi! Naakobherekeru Yohana.” ⁶¹ Bhakamugharokeri, “Neke gheghughëri
 naho mo-moobho, taanyi-ho mooto o riina riyoi!”

⁶² Hayo, bhaakabhoori ishe, gho komwerekereri kwo mabhökö, gho ghiri
 abhabhoorere eriina rino akwenda komuha omoona waache. ⁶³ Akabhasabha
 ekibhaawe, aghakyandeka, kubha, “Eriina reeche, naakobherekeru Yohana.”
 Bhoose bhakahagha chwee.

⁶⁴ Hayohayo aghatachöru ororeme rooche, aghasëëma ghosiikera wiiki,
 aghakumi Eryobha. ⁶⁵ Abhaatani bhayo bhoose, bhaghatiina bhakahagha chwee.
 Kwo mang’ana ghayo, ghaghasancha chwee mo-bheghoro bhyose bhe Yuteya.

⁶⁶ Bhano bhaghoghwire bhaakabha bharibhoori, “Omoona uno, naakubha mooto
 ke?” Mbiibhoriri ghayo, gho kubha obhotoro bho Mutëmi mboore haghirohamu
 nawe.

Omwembo o Sakariya

⁶⁷ Sakariya, ishe omoona uyo, aghiichörribhu Akörö Ahörëëru, akaruusi
 obhuröoti kubha,

⁶⁸ “Omutëmi Waryobha o Bhiisiraeri aghongibhu,
gho kubha, niichiri kobhatoori abhaato bhaache bhatighooroku.

⁶⁹ Naatoheere Omotoori o bhotoro.

Omotoori uyo naakubha o mo-rwibhoro ro mutamishi waache Tawuti,

⁷⁰ kinya Eryobha riimariri kobhugha hayo kare, gho nchera e bharööti bhaache
Abhatööbhiyu.

⁷¹ :Ndetobhoriire kubha, ndeghototoori mo-bhabhisa bhiito,
na kwo bhaare bhoose bhaturëghiri.

⁷² Wiiki akabhugha kubha, naakubha araghwera bheghongi bhasookoro bhiito,
na arahiita eriiraghano reeche Eritööbhiyu.

⁷³ Eriiraghano riyo ndemotoriire sookoro wiito Abhurahamu eriiraheri

⁷⁴ kubha, ndeghototoori mo-mabhökö gha bhabhisa bhiito,
tubhe torarihökëri totaanyi na bhotiini,

⁷⁵ gho ghuköra ghano ghakwenderu ambërë yaache,
kwo Bhutööbhiyu mo-chaasiko chiito choose.

⁷⁶ Oo omoona waane, nookubha orabherekeru kubha muröoti o Ryobha onyi,
omokoro o bhyose,

gho kubha, nookomukangata Omutëmi,
gho ghiri abhönë abhaato bhamariri ghusëemibhu gho kuucha kooche.

⁷⁷ Nakobhabhooera abhaato bhaache, bhuure bhaghotooribhu,
gho nchera e kwabhera amasari ghaabho.

⁷⁸ Eryobha riito, ndetoghweriire bheghongi chwee.

Obhotoori bhoоче koru Mwisharo, mbooghotowera ke mirëngaari,

⁷⁹ na ghotomorekera bhano tumënyiri mo-keng’uuri,
na bhano twangiire mo-kiriiri ke roko.

Naaghotukangata, tubhe toraheta mo-nchera e murëmbë.”

⁸⁰ Omoona uyo, aghakora, akörö yaache eghaköng’a. Aghaye akamanya
mwibhara, mbagha kohikera kwo riibhagha re kobhahökëri Abhiisiraeri.

Okwibhoru kwo Yesu

(Mataayo 1:18-25)

2¹ Mo-chaasiko chiyo Yohana ibhwiru, Kayisaari Aghosito akabhugha kubha,
abhaato bhoose bha chaase cheeche, bhaghëndë kwiyandeka.* ² Ukwiyandeka
kuyo niko koore o-kumbere, kwo riibhagha rino Kureniyo are omukangati
mo-muköowa o Siiriya. ³ Mbe, abhaato bhoose bhaaghaye kwiyandeka, mooto
woose mo-moghya o waabho.

⁴ Yusubhu nawe akaru mo-moghya o Nasareeti mo-se e Ghariraaya, aghatiira
ghuye mo-muköowa o Yuteya mo-moghya o Bheserehemu, gho kubha
Bheserehemu niwe ore omoghya o Tawuti, na Yusubhu naare o mo-rwibhoru
rooche. ⁵ Kwo riibhagha riyo, Yusubhu aghaye kwiyandeka haghirohamu
na Mariyamu, omorwacheru obhuku waache. Mariyamu nawe n-inda are.

⁶ Eriibhagha bhaanyi iyo, okwibhora kooche ghookahika. ⁷ Akiibhora omoona o
kebhureni omutange waache, akamokundekeeri mo-ngibho. Akamuraari mwitore,
gho kubha, bhataabhwine omweya mo-chanyumba che bhaghëni.

Abhariishi bhakarweru na marayika

⁸ Haghuhe no omoghya uyo, mbaare-ho abhariishi :bhaare bharachonga
chaatugho cheebho obhotiko. ⁹ Hayohayo, bhakarweru na marayika umu
o Mutëmi. Emirëngaari ghe bhokumi bho Mutëmi gheekabharëngaari

* **2:1 Kayisaari** ndeere eriina re mukangati omokoro o Bharuumi.

chambaara choose, bhaghaghöötu no obhottiini chwee. ¹⁰ Amare marayika uyo akabhabhoorera, “Motatiina! Mutëghëërërë, nekobhaha ang’ana anchömu e ghotegheri chwee abhaato bhoose. ¹¹ Reero ino mo-moghya o Tawuti, Omotoori waanyu nibhwiru. No Omotoori uyo niwe Kirisito Omutëmi. ¹² Ne ekyerekereri ghe kobherekereri ghayo, nikyo kino, mookubhöna ekeng’werere ke moona kiraariru mwitore, kebhisuru changibho che keena.”

¹³ Hayohayo marayika uyo are, hakarwera ebheku bhe bhamarayika bhaghëndi bhaache koru Mwishaaro. Bhaakhabha bharaghongi Eryobha bharabhugha,

¹⁴ “Eryobha re Mwishaaro reghongibhu!

No omurëmbë ubhe mo-se yoose,
kwo bhaato bhano Eryobha resiighiri!”

¹⁵ Bhamarayika bhayo, hano bhagharokiri Mwishaaro, abhariishi bhakabhugha, “Tughëndë Bheserehemu, korighi ghano Omutëmi atobhoriire.” ¹⁶ Mbe, bhaaghaye bhwangobhwango, bhakabhöna Mariyamu na Yusubhu, bhakarighi ekeng’werere, kemisiri mwitore. ¹⁷ Hano bhamarooche omoona uyo, bhakabhabhoorera abhaato amang’ana ghoose, ghaare Marayika wuure abhabhooriire ighoro yaache.

¹⁸ Abhaato bhoose hano bhoghwire ghayo abhariishi bhabhughiri, bhakahagha chwee. ¹⁹ Amare, Mariyamu aghaghatoora ghayo ghoose mo-motema waache, akabha araghihëbha. ²⁰ Bhakamara abhariishi bhayo bhaghagharura, ino bharaghongi Eryobha, na korekumi gho ghano ghoose bhoghwire na ghoghariighi. Kinya bhuure bhabhooriiru na marayika, hang’u ghoose ghaabheere.

²¹ Omoona uyo, hano ahikiri chaasiko inyaanye, bhakamusaara, bhakamuha eriina Yesu. Niryo eriina rino marayika wuure, are amorokiri, eriibhagha nyina ataare amara aghëgha anda.

Yesu ~bhakamuhaana kwo Ryobha

²² Chaasiko che komusu koobho Yusubhu na Mariyamu, cheeghasira, kinya :yendiiru mo-meghiro ghe Musa.* Mbe, bhakahira omoona uyo Yerusareemu, kubha bhamuhaane kwo Mutëmi. ²³ Mbaamohiriri gho kubha, yandekuru mo-meghiro ghe Mutëmi kubha, “Omoona woose o kimbërë o ghesubhe, nakwenderu ahuru kwo Mutëmi.”* ²⁴ Wiiki, :Mbeendiri bharuusi riruusi re komusu kinya reghughambu mo-meghiro ghe Mutëmi, “Moruusi riruusi re Chaasarari ibhere, hande amaana abhere gha Bheghuuti.”*

²⁵ Hayo Yerusareemu, naare-ho omooto umu, eriina reeche Simiyooni. Simiyooni uyo naare muhëënë ambërë e Ryobha araresooka, ino araghanya korighi ghotooribhu kwo Abhiisiraeri. Akörö Ahörëëru neere haghirohamu nawe. ²⁶ Neere imariri komobhoorera kubha, taaghoku, ataamara arighi Kirisito o mutëmi o Ryobha. ²⁷ Ibheere abhiibhori bhaache, mbaamohiriri Yesu Mwisëngëro, kubha bhakörë bhuure emeghiro ghe kwerekereri. Simiyooni uyo nawe, Akörö Ahörëëru ekamukangata kubha asöhë-mu. ²⁸ Akamwimoki omoona uyo Yesu, ino araghongi Eryobha arabhugha,

²⁹ “Oo Omutëmi omokoro, ibheere nongatighiri
eni omutamishi waacho, neku kwo murëmbë,
gho kubha nuköriri kinya :omboriire,

³⁰ niroochiire obhotoori bhoocho,

*2:22 Musa akabhabhoorera kubha, hano omukari akubha ibhwire omoona o ghesubhe ikare chaasiko miröngö ene ataghoturi gheghiro Ghitööbhiyu, wiiki atasöha Mwisëngëro. Aramara amusu, Yusubhu woose amusu gho kubha hano mukaache ibhwire naare aramughööta hande araghööta omoona.

*2:23 Mööhi Kohoroka 13:2, 12, 15.

*2:24 Mööhi Abharaawi 12:8.

³¹ bhuno usëemiri ambërë e bhaato bha chaase choose.

³² Obhotoori bhuyo n-emirëngaari ghe ghekwerekereri anchera yaacho kwo bhaato bha matöngö, na asooko kwo bhaato bhaacho Abhiisiraeri.”

³³ Amang’ana ghayo Simiyooni :abhughiri ighoro e moona uyo, ghaakaroghoori chwee abhiibhori bhaache. ³⁴ Simiyooni akabhiitabheri hayo, akamobhoorera Mariyamu, nyina o moona uyo akabhugha, “Tëghëërë! Omoona uno, natooruru, naaghoghwishii Abhiisiraeri bhaaru, na naakobhabhooiki Abhiisiraeri abhande bhaaru. Naakubha ekimanyenkereri na bhaato mbaaghokyaanga, ³⁵ gho ghayo, amihëëbhö gha emetema ghe bhaato bhaaru ngeekubha haheero. Niiye mo-motema waacho nookooghu obhororo chwee, kinya ong’uturu no omohyo.”

³⁶ Hayo naare-ho muröoti umu, mukari mokungu chwee, eriina reeche Ana, muuke o Bhanweri, o ritöngö re Asheeri. Ana uyo, :naamariri emeeka mohungate hang’u anyi no omosubhe waache, ache kumara mosubhe waache uyo aghaku. ³⁷ Akabha mosino akahikera eghita ke meeka miröngö enaane ne enne na takwiruru. Naare arage Mwisëngëro, arasabha Eryobha obhotiko no omwishe ariiyima ebhiinyakure. ³⁸ Kwo riibhagha riyo, Ana akahika hayo bhaare Simiyooni, Yusubhu, Mariyamu no omoona uyo, aghasëëma koreghongi Eryobha. Arabhabhoorera amang’ana gha moona uyo, kwo bhaato bhayo bhiitëng’iire kubha, Eryobha ndeeghotoori Yerusareemu.

³⁹ Yusubhu na Mariyamu, hano :bhaare bhamariri ghuköra ghoose ghano emeghiro ghe Mutëmi ghyendiri, bhaghagarura awaabho mo-moghya o Nasareeti, mo-se e Ghariraaya. ⁴⁰ Omoona uyo aghakora, aghaköng’a, akang’iiniha, naare ariitabheru ne Eryobha.

Omoona Yesu Mwisëngëro

⁴¹ Abhiibhori bha Yesu mbaare bhasiighiri ghuye Yerusareemu kira mooka, mo-nyangi e Bhaasaka.* ⁴² Ibheere, hano Yesu are omoona o meeka ikomi ne ebhere, bhaaghaye nawe iyo kurëng’aana na asughara yaabho. ⁴³ Hano chaasiko che nyangi iyo chehikeriine, abhiibhori bha moona uyo bhaghagarura aka, amare iwe aghasaagha-ho. Nabho bhataamanyiri aribha asaaghiri-ho. ⁴⁴ Ibho bhaghituuri kubha naghugharuka aka na abhaghëndi bhaache. Eriibhagha riyo, mbaare bhaghëndiri mwishe moghima bhaanyi mo-nchera. Bhaghasëëma komutabharera mo-bhahiiri bhaabho na mo-bhasaani bhaabho. ⁴⁵ Hano abhoriri, bhaghagarura Yerusareemu, bharamtabhara.

⁴⁶ Orosiko ro ghatato, bhakamubhöna Mwisëngëro, ikeere ghateghate e bheeghi. Naare arabhatëghëërëra, arabhabhoori amabhoori. ⁴⁷ Abhaato bhoose hano bhoghwire ke bhuno are arabhugha, bhakahagha chwee ighoro e mihëëbhö ghaache na amagharokeri ghaache. ⁴⁸ Abhiibhori bhaache hano bhamorooche, bhakahagha chwee. Nyina akamobhoori, “Aa! Omoona waane, neke otuköriirë hang’u? Mööhi! Eni ni iso ntoore tuhahiri chwee, toraghutabhara!” ⁴⁹ Akamugharokeri, “Neke moore morantabharera? Moteeche kubha nekwenderu kuhööya Mwisëngëro re Taata waane?” ⁵⁰ Erigharokeri re Yesu, abhiibhori bhaache bhataarimanyiri.

⁵¹ Bhaache kumara ghayo, bhaaghaye nawe awaabho Nasareeti, akabha arabhasooka. Ghayo ghoose ghaaköruru, nyina naare aghatooriri mo-motema waache. ⁵² Yesu akeengera ghokora, kwiyengera amang’iini, akabha arategheri Eryobha na abhaato bhoose.

* **2:41 Bhaasaka** Abhaasaka iyo e Bhayahuuti neere e koihiita kinya Abhiisiraeri bharuure Miisiri mo-se yiire e nyaako e bhusësë. Mööhi Kohoroka 12:1-27, 23:14-17.

Yohana Omubhatisaachi ^nakuraghani Ang'ana e Ryobha

(Mataayo 3:1-12; Maariko 1:1-8; Yohana 1:19-28)

3¹ Neere omooka wi ikomi na ghataano o bhukangati bho mutëmi omokoro o Bharuumi Kayisaari Tibheeriyo. Eriibhagha riyo Bhontiyo Bhiraato, naare omukangati mo-mukööwa o Yuteya, na Herote, naare omukangati mo-mukööwa o Ghariraaya. Bhiiribho nawe, omoobho Herote, naare omukangati mo-mukööwa o Itureya, na Tirakoniti. Wiiki Riisaniya, naare omukangati mo-mukööwa o Abhireene. ² Anaasi na Kayabha, mbaare Abhachaama Abhakoro. Kwo riibhagha riyo, Yohana, omoona o Sakariya, akahaabhu ang'ana ne Eryobha anyi mwibhara. ³ Yohana, aghaye akahetera ebhyaro bhyose bhino bheting'iri orocho ro Yorotaani, ino arasanchi ang'ana Eryobha arabhugha, "Motukuune amasari ghaanyu, mubhatiisu, kubha Eryobha rebhaabhere." ⁴ Nibhu yandekuru mo-ghitabhu ke muröoti Isaaya kubha,

"Eriiraka re mooto ndekobherekera mwibhara rerabhugha,
 'Mukörë anchera e Mutëmi,
 mughöröröki chanchera chino akoheta.'"

⁵ Emyoro ghyose, ngekorindu.

Ebheghoro ne eheghoro bhyose, mbekuaanyuru.

Chanchera chino chikëemiri, nheghughöröröku,
 na hoose hano haanyi na amaribha masuuu suuhu, haaghuchöchu.

⁶ Niho abhaato bhoose bhakomorighi Omotoori uno atomuru ne Eryobha."*

⁷ Ibheere abhaato bhaaru bhakaacha o-Yohana, kubha abhabhatiise, amare akabha arabhaborera arabhugha, "Inyu orwibhoro ro nchöka! N-niwe abhabhoriire kubha, gho kubhatiisu moghwisacha obhororo bho Ryobha bhuno bhokuucha! ⁸ Mbe, mukörë amaköri ghano ghakwerekereri kubha, motighiri amasari ghaanyu. Wiiki motabha morituuri kubha, mookwabheru gho kubha, inyu m-bha rwibhoro ro Abhurahamu mooni. Mbe, nekabhabhorerera, Eryobha ndeghotora komuha Abhurahamu abhaana, koru mo-mabhohe ghano! ⁹ Ibheere ghotena ekiina kwo Ryobha nkumariri kohikeerana, kinya ahaache imariri ghotooru mo-matina gha mete. Omote wowoose uno otaakobhyara amakurubhesi amachömu, nokonungu, na kurëkëru mo-mororo!"

¹⁰ Obhoyo bho bhaato bhano :bhaare hayo, bhaakabhoori Yohana, "Ibheere! Itu tukörëbhu?" ¹¹ Akabhagharokeri, "Uno anyi na amaghöoti abhere, aruusi rimu amuhe uno ataghöötë, wiiki uno anyi ne ebhiinyakure, woose akörë hang'uhang'u."

¹² Abhatöbhi bha righöoti bhoose, bhakaacha o-Yohana bhabhatiisu, bhakamobhoori, "Oo omweghi wiito, itu tukörëbhu?" ¹³ Nawe akabhagharokeri akubhagha, "Ibheere morabha moratöbhi erighöoti, motakeri ekirëngërë kino ghekwennderu."

¹⁴ Abhaashirikare bhoose bhakamobhoori, "Itu, naho tukörëbhu?" Bhoose, akabhagharokeri, "Motahöka mooto bheghiro bheeche, koru ghosiikera obhobhihi kubha mubhönë chambiri! Wiiki muhaabhe na amareho ghano bhaköbhaha."

¹⁵ Abhaato bhoose, mbaare bharaghanya Kirisito uno akuucha, bhaakabha bharibhoori mo-metema gheebho, ighoro e Yohana kubha, hamwabhe niwe.

¹⁶ Mbe, akabhabhorerera arabhugha, "Eni, hëënë nekobhabhatiisa kwo manche agheene, amare nakuucha omooto uno aghonkeri changuru, koru ntekurëng'anera ghusaasura chaakobha che ebhekwera bheeche! Iwe, nakobhabhatiisa gho Körö

* 3:6 Mööhi Isaaya 40:3-5.

Ahörëëru, na kwo mororo.* ¹⁷ Ibheere Kirisito nakuucha, kwahukani abhaato bhano bhatuukuniri, na bhano bhaanyi na amasari, kinya omooto uno aghötëriire orohongo mo-mabhökö ghaache. Nawe narutarekiri orobhooka rooche ro kohoorera, abhönë kohonga angano, aramara naakoyekoma yoose mo-ghitara keeche. Omokoonyo, naakowute mo-mororo, no omororo uyo, tookorima naabha!”

¹⁸ Kwo mang’ana ghayo maaru na ghande, Yohana naare arabhakumereri na kobbahoorera abhaato bhayo, Ang’ana Anchömu e Ryobha.

¹⁹ Ache kumara, Yohana akamwitweka omukangati Herote, gho kubha naamwimokiri Herotiya, mka o moobho, akamokwira. Yohana akamohiinya kwo ng’ana iyo, na kwo mabhe ghoose ghano are araköra.* ²⁰ Niho, Herote akeengera amabhe ghaache ghoose, gho komubhöha Yohana mwig’hëëcha.

Yesu ^akabhatiisu

(Mataayo 3:13-17; Maariko 1:9-11)

²¹ Hano abhaato bhayo bhoose bhamariri kubhatiisu, Yesu woose akaacha akabhatiisu. Hano are arasabha Eryobha, erishaaro reghiighoka. ²² Akörö Ahörëëru eghiika ighoro yaache enga egheghuuti. Eriiraka reekarwera Mwisharo riyo, rerabhugha, “Iye niye Omoona waane omosiighani waane! Uno oghuntëghëri!”

Orwibhoro ro Mutëmi Yesu

(Mataayo 1:1-17)

²³ Eriibhagha Yesu asëëmiri omoremo o Ryobha, naare ne emeeka kinya miröngö etato. Abhaato mbaare bharituuri kubha n-omoona o Yusubhu mwereeti o Heeri.

²⁴ Heeri, akiibhoru na Matati.

Matati, akiibhoru na Raawi.

Raawi, akiibhoru na Meriki.

Meriki, akiibhoru na Yaana.

Yaana, akiibhoru na Yusubhu.

²⁵ Yusubhu, akiibhoru na Matatiya.

Matatiya, akiibhoru na Amoosi.

Amoosi, akiibhoru na Nahumu.

Nahumu, akiibhoru na Esiri.

Esiri, akiibhoru na Naghaayi.

²⁶ Naghaayi, akiibhoru na Maati.

Maati, akiibhoru na Matatiya.

Matatiya, akiibhoru na Semeyi.

Semeyi, akiibhoru na Yoseki.

Yoseki, akiibhoru na Yuuta.

²⁷ Yuuta, akiibhoru na Yowana.

Yowana, akiibhoru na Reesa.

Reesa, akiibhoru na Serubhabheeri.

Serubhabheeri, akiibhoru na Sherateeri.

Sherateri, akiibhoru na Neeri.

²⁸ Neeri, akiibhoru na Meriki.

Meriki, akiibhoru Ati.

* **3:16** *Kubhatiisu gho Körö Ahörëëru* Kuhaabhu Akörö Ahörëëru na kubhatiisu kwo mororo ghoteneru ekiina koru kwo Ryobha. Abhande mbakobhugha kweribhu koru mo-masari. Mööhi Ruuka 12:49-50.

* **3:19** Mööhi Maariko 6:17; Abharaawi 20:21.

Ati, akiibhoru na Kosamu.
 Kosamu, akiibhoru na Erimataamu.
 Erimataamu, akiibhoru na Eri.
²⁹ Eri, akiibhoru na Yoshuwa.
 Yoshuwa, akiibhoru Eriyeseeri.
 Eriyeseeri, akiibhoru na Yorimu.
 Yorimu, akiibhoru na Matati.
 Matati, akiibhoru na Raawi.
³⁰ Raawi, akiibhoru na Simiyooni.
 Simiyooni, akiibhoru na Yuuta.
 Yuuta, akiibhoru na Yusubhu.
 Yusubhu, akiibhoru na Yonaamu.
 Yonaamu, akiibhoru na Eriyaakimu.
³¹ Eriyaakimu, akiibhoru na Mereya.
 Mereya, akiibhoru na Mena.
 Mena, akiibhoru na Matata.
 Matata, akiibhoru na Nataani.
 Nataani, akiibhoru na Tawuti.
³² Tawuti, akiibhoru na Yeese.
 Yeese, akiibhoru na Obheeti.
 Obheeti, akiibhoru na Bhowaasi.
 Bhowaasi, akiibhoru na Sarumooni.
 Sarumooni, akiibhoru na Nashooni.
³³ Nashooni, akiibhoru na Aminataabhu.
 Aminataabhu, akiibhoru na Atimiini.
 Atimiini, akiibhoru na Ariini.
 Ariini, akiibhoru na Hesirooni.
 Hesirooni, akiibhoru na Bhereesi.
 Bhereesi, akiibhoru na Yuuta.
³⁴ Yuuta, akiibhoru na Yakobho.
 Yakobho, akiibhoru na Isaka.
 Isaka, akiibhoru na Abhurahamu.
 Abhurahamu, akiibhoru na Teera.
 Teera, akiibhoru na Nahoori.
³⁵ Nahoori, akiibhoru na Serughi.
 Serughi, akiibhoru na Reghaahu.
 Reghaahu, akiibhoru na Bhereghi.
 Bhereghi, akiibhoru na Ebheeri.
 Ebheeri, akiibhoru na Saara.
³⁶ Saara, akiibhoru na Kayinani.
 Kayinani, akiibhoru na Aribhaghisaati.
 Aribhaghisaati, akiibhoru na Sheemu.
 Sheemu, akiibhoru na Nuhu.
 Nuhu, akiibhoru na Rameeki.
³⁷ Rameeki, akiibhoru na Metuseera.
 Metuseera, akiibhoru na Hanooki.
 Hanooki, akiibhoru na Yareeti.
 Yareeti, akiibhoru na Maharareeri.
 Maharareeri, akiibhoru na Kayinani.
³⁸ Kayinani, akiibhoru na Enooshi.
 Enooshi, akiibhoru na Seeti.

Seeti, akiibhoru na Ataamu.
Ataamu, akabhombu ne Eryobha.

Ghusakibhu kwo Yesu

(Mataayo 4:1-11; Maariko 1:12-13)

4¹ Yesu akaru mo-rooche ro Yorotaani, ichoriibhu Akörö Ahörëeru. Akörö iyo ekamukangata ekamohira mwibhara, ² akamara chaasiko miröngö ene arasakibhu ne Eriishambu. Kwo eriibhagha riyo ryose, tariire gheghiro ghyokyose. Chaasiko chiyo hano chehikeriine, akooghu anchera.

³ Ibheere, Eriishambu rekamobhoorera, “Aribha iye n-Omoona o Ryobha onyi, nobhoorere Eriibhohe rino riigharure ribhe omughaate.” ⁴ Yesu akarigharokeri, “Yandekuru, ‘Omughaate oweene toghughëri omooto abhe no obhuhöru.’”^{**}

⁵ Rekamara, Eriishambu reekamohira Yesu ahaghiro hano haanyi ighoro chwee. Hayohayo reekamwereki obhutëmi bho chaase choose. ⁶ Rekamobhoorera, “Neeghokuha obhukangati bho bhino bhyose, haghirohamu no obhwame bhooche bhoose. Wiiki, gho kubha neenyi no obhotoro bho bhino bhyose, nengenda komuha omooto wowoose uno nekwenenda, nekomuha. ⁷ Ibheere, iye oriishereri ghusëngëra, neeghokuha bhyose bhino.” ⁸ Yesu akarigharokeri, “Yandekuru, ‘Usëngëre Omutëmi Waryobha waacho, no omuhökëri omwene chiri.’”^{**}

⁹ Hano riimariri, Eriishambu reekamohira Yesu Yerusareemu. Reekamwimereri ighoro arososooni ro Risëngëro, rekamobhoorera, “Aribha iye n-Omoona o Ryobha onyi, nwirëkëre haase, ¹⁰ gho kubha yandekuru,

‘Eryobha ndeghohotomera bhamarayika bhaache, bhaghochonge.’

¹¹ Wiiki, ‘Mbaghoghughëgha mo-mabhökö ghaabho, amaghoru ghaacho ghataacha ghwituuratuura mwitare.’”^{**}

¹² Yesu akarigharokeri, “Yandekuru, ‘Otamusaki Omutëmi Waryobha waacho.’”

^{*13} Hano Eriishambu riimariri komusaki Yesu, reekamotigha, mbagha ribhönë omweya owonde o komusaki.

Yesu ^aghataraahu

(Mataayo 4:12-17, 13:52-58; Maariko 1:14-15, 6:1-6)

¹⁴ Akamara, Yesu aghagharuka mo-muköowa o Ghariraaya, anyi no obhotoro bho Körö Ahörëeru. Amang’ana ghaache, ghaghasancha chwee mo-bhyaro bhiyo bhyose bhe chambareka. ¹⁵ Nawe naare areeghi abhaato mo-chanyumba che Ryobha na abhaato bhoose, bhaakabha bharamutöghösi.

¹⁶ Akamara, aghagharuka awaabho Nasareeti, mo-kyaro kino arëriiru. Orosiko ro Riikane, aghasöha mo-nyumba e Ryobha, kinya are anariri. Akimeerera asömë Ang’ana e Ryobha. ¹⁷ Akahaabhu eghitabhu ke muröoti Isaaya, aghakehunyura, aghatabhara ahaghiro hano handekuru,

¹⁸ “Akörö e Mutëmi, neenyi haghirohamu na neeni.

Wiiki, niimariri konyaahura kobhamenyi abhahabhe Ang’ana Anchömu.

Nantomiri kwo bhabhöhu,

nebhahoorere kubha mbaaghotighooroku.

Abhahuku, bhatore korighi wiiki,

na bhano bhakunyaakibhu, nebhatoori.

^{*} **4:4 Omughaate** n-ekiinyakure ghe chaasiko choose kwo Bhayahuuti.

^{*} **4:4 Mööhi Kohiita** kwo Meghiro 8:3.

^{*} **4:8 Mööhi Kohiita** kwo Meghiro 6:13.

^{*} **4:11 Mööhi Sabhuri** 91:11-12.

^{*} **4:12 Mööhi Kohiita** kwo Meghiro 6:16.

¹⁹ Wiiki nebhabhoorere abhaato, omooka uno Omutëmi akwerekì aghareeya yaache ^okahikeerana.”**

²⁰ Ache kumara ghoghasöma amang’ana ghayo, Yesu akahunya eghitabhu kiyo, akamugharokeri omutamishi o nyumba e Ryobha, aghiikara eghi abhaato. Ibheere abhaato bhoose bhano :bhaare mo-nyumba e Ryobha, bhakamumöghörëra amiisho. ²¹ Akabhabhoorera, “Amandeko Amatöbhiyu ghano moghwire reero ino, ngahikeriine mo-matu ghaanyu.”

²² Hano Yesu abhabhooriire amang’ana ghayo gha rubhango, ghaghaghëri abhaato bhoose komughamba bhoheene. Bhaakaroghoora chwee, bhaghasëema kobhoorani, “Kana uno, taanyi omoona o Yusubhu?”

²³ Akabhabhoorera, “Mbe wiiki mokomboorera ekirëngi kino, ‘Omughabho, wiöhöri iye omwene.’ Wiiki mokobhugha, ‘Ebheroghooro bhino toghwire uköriri mo-moghya o Kabherenawumu, nobhikörë na hano mo-kyaro keecho!’” ²⁴ Yesu akabhugha, “Mbe ^nekabhabhoorera ino enyi hëënë hëënë, taanyi-ho muröoti uno aghwishereru mo-se yaache omwene.”

²⁵ “Kwo riibhagha re muröoti Eriya, ambura titëëkiri emeeka etato ne emyeri esaasabhe. Aghëëcha ihaari eghasöhërëra ase yoose e Isiraeri. ^Nekabhabhoorera ino enyi hëënë kubha, mbaare-ho abhasino bhaaru mo-se kwo riibhagha riyo.

²⁶ Koru hang’u, Eriya taatomuru kwo mooto wowoose o Isiraeri. Amare aghatomu kwo mosino umu o mo-moghya o Sereebhuta, mo-se e Sitooni.*

²⁷ “Wiiki eriibhagha re muröoti Eriya, mbaare-ho abhabhabharu bhaaru bha mbiti mo-se e Isiraeri. Koru hang’u, taanyi-ho mooto wowoose o Isiraeri uno ahöruru. Akamuhöri omooto umu koru ase e Siriya uno are arabherekeru Namaani.”*

²⁸ Abhaato bhayo bhoose :bhaare bhikomiine mo-nyumba e Ryobha, hano bhoghwire amang’ana ghayo gha Yesu, bhaghakarara chwee. ²⁹ Hayohayo bhakimeerera bhwango bhwango, bhakamughöota bhakamohoroki anche. Bhakamohira mbagha mo-ngëghu e gheghoro kino omoghya waabho :waabhëkuru ighoro yaache, kubha bhamosughutere haase. ³⁰ Amare, akaheta ghateghate yaabho, aghaye checheche.

Yesu ^akahëëbha omusambu

(Maariko 1:21-28)

³¹ Akamara, Yesu aghaye mo-moghya o Kabherenawumu, mo-se e Ghariraaya. Orosiko ro Riikane, aghasöha mo-nyumba e Ryobha, aghasëema kweghi abhaato.

³² Ameeghi ghaache, ghaakabharoghoori chwee, gho kubha ngaare no obhotoro.

³³ Ibheere mo-nyumba iyo e Ryobha, naare-mu omooto uno are no omusambu. Omusambu uyo, oghakuura kwo riiraka ikoro, okabhugha, ³⁴ “Oo Yesu o Nasareeti, otatunyaaki itu! Wiichiri ghotumareereri? Nekweche niye we, iye n-Omutöbhiyu o Ryobha onyi!”

³⁵ Yesu akawohiinya omusambu uyo akabhugha, “Okiri omonu waacho! Omoru omooto uno!” Hayohayo, omusambu uyo okamoghwishi omooto uyo haase, ambërë e bhaato bhayo bhoose. Okamara okamoru otamunyahaariri hohoose.

³⁶ Abhaato bhoose, bhakahagha chwee, bhakabhoorani, “N-ng’ana ke ino? Koru emisambu, omooto uno naaghoghigateka kwo bhotoro na changuru, naghyo

* 4:19 N-omooka o ghareeya o Ryobha o korehani asiire na kobhasongoreri bhano bhaare bhiihenyeriire.

* 4:19 Mööhi Isaaya 61:1-2, 58:6.

* 4:26 Mööhi 1 Abhatëmi 17:9-24.

* 4:27 Mööhi 2 Abhatëmi 5:1-24.

gheru!”³⁷ Ibheere, amang’ana ghaache, ghaghasancha chwee mo-bhyaro bhiyo bhyose.

Yesu ^akahöri abhaato bhaaru

(Mataayo 8:14-17; Maariko 1:29-34)

³⁸ Yesu hano aruure mo-nyumba e Ryobha, aghasöha o-Simiyooni. Nawe nyinabhiyaara Simiyooni, naare aghööturu ne kihëeno kihaari chwee. Bhakamusabha Yesu amuhöri.

³⁹ Ibheere akimeerera haghuche nawe, aghakehiinya ekihëenö kiyo. Hayohayo akahöra, akabhooka aghasëema kobhahökëri.

⁴⁰ Eriibhagha riyo eryobha ndeere reeghaye ghosikera. Mbaare-ho abhaato bhano :bhaare na abhabhabharu bhaabho, bhaakamurëëtëra Yesu, abhabhabharu bhano :bhaare na amashaagha haghare haghare. Yesu aghatoora amabhökö ghaache kwo mooto woose, akabhahöri. ⁴¹ Wiiki, Yesu akahëebha emisambu mo-bhaato bhaaru. Mbe gheeghakuura gherabhugha, “Iye n-omoono o Ryobha onyi!” Ibheere Yesu aghaghehiinya na ghoghiriëki ghetasiikera wiiki gho kubha emisambu ghiyo ngiimanyiri kubha niwe Kirisito.

Yesu ^nakweghi abhaato

(Maariko 1:35-39)

⁴² Atabhoori yaache hano bhokiire, Yesu akaru hayo, aghaye aghiro hano abhaato bhataanyi. Obhoyo bho bhaato bhaakabha bharamutabhara, hano bhamobhwine, bhakeenda komurëki ataru hayo. ⁴³ Amare, Yesu akabhahoorera, “Nekwenderu neghi mo-bhyaro ebhende wiiki, ghusanchi Ang’ana Anchömu e bhutëmi bho Ryobha, gho kubha, ghayo nigho ghaaghëri neghatomu.”

⁴⁴ Mbe, Yesu naare arasanchi Ang’ana e Ryobha mo-chanyumba che Ryobha che Yuteya.

Yesu ^aghatoora abhaanabheegha abhambëre

(Mataayo 4:18-22; Maariko 1:16-20)

5¹ Orosiko rumu, Yesu naare imeriire haghuche na anyancha e Ghenesareeti,* areeghi abhaato Ang’ana e Ryobha. Bhaakabha bharamwishukerera, gho ghiri bhamooghu, kerende bhakamwinaareri. ² Haghuche hayo na anyancha, Yesu akarighi amaryato abhere, ghatighuru na abhaweessani. Ibho bhaakabha bhareeghi charwero cheebho. ³ Aghatiira mo-bhwato bhumu, bhuno bhoore bho Simiyooni, akamusabha Simiyooni kubha asuke hasuuu obhwato mo-nyancha. Akamara, Yesu aghiikara moose, akeenderera kweghi abhaato.

⁴ Hano amariri kobheeghi, akamobhoorera Simiyooni, “Noohire obhwato, tughëndë ghateghate e nyancha, mwiki charwero cheenyu, moweesana chaasu.”

⁵ Simiyooni akamugharokeri, “Oo Omutëmi wiito, ntowesiine gho changuru obhotiko bhoghima, amare totabhwine gheghiro ghyokyose! Mbe, neeghochiiki charwero ibheere gho kubha niye ^okabhugha.”

⁶ Mbe, Simiyooni na abhaghëndi bhakarëkëra charwero cheebho mo-manche. Bhakaweesana chaasu chaaru chwee, kerende charwero cheebho cheghasëema ghwateka. ⁷ Gho ghayo, ekabhaköra bhahonge amabhökö ghaabho ighoro kobherekera abhaghëndi bhano :bhaare mo-bhwato obhonde kubha bhaache kobhatoori. Hano bhichiri, bhaghiichori amaryato abhere chaasu, koru ghakenda komeru.

* 5:1 *Anyancha e Ghenesareeti* Eriina reeche erende nekobherekeru, nyancha e Ghariraaya.

⁸Hano Simiyooni arooche ghano ghaarweriire hayo, akahighama ambëre e Yesu, akamobhoorera, “Oo Omutëmi, otiikara na neeni, gho kubha eni mooto o masari neenyi!”

⁹Simiyooni :naabhughiri amang’ana ghayo, gho kubha iwe na abhaghëndi bhaache, mbaahaghiri gho kubha mbawesiine chaasu chaaru chwee. ¹⁰Yakobho na Yohana, abhaana bha Sebhetaayo, mbaare bharaweesana haghirohamu na Simiyooni. Bhoose ghaakabharoghooori chwee.

Ibheere Yesu akabhugha, “Oo Simiyooni, otatiina gho kubha korwera reero ino, nookubha omoweesani o bhaato, kinya bhuure ore omoweesani o chaasu.”*
¹¹Simiyooni na abhaghëndi bhaghagharoki amaryato ghaabho mo-ngëghu e nyancha, bhaghatigha ebhegiro bhebho bhyose hayo, bhakamutambana Yesu.

Yesu ^akamuhöri omooto o mbiti

(Mataayo 8:1-4; Maariko 1:40-45)

¹²Yesu hano are mo-moghya umu o kyaro ke Ghariraaya, akaacha omooto umu anyi na ambiti omobhere moghima. Hano amoroche Yesu, aghagho kebhuuma, akamusasaama arabhugha, “Oo Omutëmi, oreenda, noghotora kuuhöri na koomusa.” ¹³Yesu aghaghöröröki okubhökö, akamoturi, akamobhoorera, “Nekwenda ubhe muhöru!” Hayohayo, obhushaagha bhooshe bho mbiti bhookahöra.

¹⁴Yesu akamobhoorera akabhugha, “Otabhoorera omooto wowoose ghano! Amare, nooghi wiyeerekani o-muchaama kubha nuuhöriri. Oramara oruusi riruusi re kwereki kubha nuuhöriri, kinya omuröoti Musa :abhughiri.”*

¹⁵Koru hang’u, amang’ana gha Yesu ghakeengera ghusancha chwee mo-bhaato. Abhaato bhayo mbaare bharaacha ghokooche obhoyo no obhoyo, bhabhönë ghutëghëerëra ameeghi ghaache, na kuhörribhu amabhabharu ghaabho. ¹⁶Amare kwo riibhagha ryaru Yesu naare arabhatigha aghi ahaghiro hano abhaato bhataanyi asabha Eryobha.

Yesu ^akamuhöri omooto uno are akuure eribhaara

(Mataayo 9:1-8; Maariko 2:1-12)

¹⁷Orosiko rumu, Yesu naare areeghi abhaato. Mo-bhayo, mbaare-mu Amabharisaayo* na abheeghi bha megghiro. Abhaato bhayo :mbaruure mo-bhyaro bhe Ghariraaya, Yuteya, na Yerusareemu. Yesu naare no obhotoro bho Ryobha bho kuhöri.

¹⁸Mbe bhakaacha abhaato, bhaghëghiri omooto mo-machëera uno akuure eribhaara. :Mbeendiri bhamusöhi mo-nyumba, kubha bhamotoore ambëre e Yesu.

¹⁹Amare eghatama, gho kubha haare no omokindighano o bhaato bhaaru. Niho, bhaghatiira ighoro bhakahika a-ghisara, bhamughëghiri omooto uyo. Eriibhagha bhaanyi a-ghisara, bhakahöbhöra eribhanga ikoro bhakaruusi changyo mo-ghisara bhakamwiki na machëera yaache ambëre e Yesu. ²⁰Hano Yesu arooche obhokumi bhuno :bhaare nabho abhaato bhayo, akamobhoorera “Oo musaani, ^okaabheru amasari ghaacho!” ²¹Abheeghi bha megghiro na Amabharisaayo bhayo, hayohayo bhaghasëema kwing’unyera mo-metema gheebho bharabhugha, “N-iwe uyo kana

* **5:10 Omoweesani o bhaato** Ang’ana ino omoweesani o bhaato n-kubha, naakubha araraghaneri abhaato ang’ana anchömu e Ryobha.

* **5:14 Mööhi Abharaawi** 14:1-30.

* **5:17 Amabharisaayo** mbaare abhaato bha kyama kimu ggate e bhyama bhibhere ebhegoro bhe tiini ggate e Bhayahuuti mo-riibhagha re Riraghano Eriihe.

aghosiikera amang'ana gha ghotoka Eryobha? Taanyi-ho uno aghotora kwabhera amasari gha mooto, n-Eryobha eryene niryo reeghotora!”

²² Ghayo :bhaare bhariehëbha, Yesu hayohayo aghaghamanya, akabhabhoori, “Neke mokwihëbha mo-metema gheenyu? ²³ Mbe, n-diihe rino reenyi ihoho? Komobhoorera kubha, ‘Nekwabhiire amasari ghaacho,’ ghasi komobhoorera kubha, ‘Imeerera, ughëndë?’ ²⁴ Eni nekwenda mumënyë bhoheene kubha Omoona o Mooto naanyi no obhotoro bho kwabhera amasari mo-se ino.” Niho Yesu akamobhoorera omooto wuure are akuure ribhaara, akabhugha, “Imeerera! Ghegha amacheera yaacho, oghi awaacho.”

²⁵ Hayohayo, omooto uyo akimeerera ambërë e bhaato bhayo. Akiimoki machëëra yaache, aghaye awaache ino arareghongi Eryobha. ²⁶ Abhaato bhoose bhayo :bhaare hayo, bhakahagha chwee na ghughöotu no obhotiini. Wiiki, mbaare bharareghongi Eryobha, bharabhugha “Reero ntorooche amang'ana gha koroghoora!”

Yesu akamobhoorera Raawi amutambane

(Mataayo 9:9-13; Maariko 2:13-17)

²⁷ Ache kumara ghayo, Yesu akahoroka mo-nyumba iyo, akarighi omutöbhi umu o righöoti eriina reeche Raawi. Raawi uyo naare ikeere mo-kebhuru keeche ghe ghutöbhëri righöoti.

Yesu akamobhoorera, “Oo Raawi untambane” ²⁸ Hayohayo Raawi akimeerera, aghatigha bhyose akamutambana Yesu.

²⁹ Akamara Raawi akamukörëra Yesu obhughëni bhokoro awaache. Awaache hayo :mbiikomiine abhatöbhi bha righöoti bhaaru chwee, na bhaato abhande bhano :bhaare bhararaaghera mo-meecha haghirohamu.

³⁰ Eghaghëri Amabharisaayo na abheeghi bhaabho bha meghiro ghe Musa, bhakabhing'unyerang'unyera abhaghëndi bha Yesu, bharabhugha, “Kana mokuraaghera na kunyo haghirohamu na abhatöbhi bha righöoti, na abhaköri bha masari abhande?”

³¹ Yesu akabhagharokeri, “Abhaato abhahöru, bhataakwenda omughabho. Amare abhabhabharu mbaakomwenda! ³² Hang'uhang'u, eni woose ntiichiri kobhabherekera bhano bhakwirighi kubha, mbaanyi no obhuhëënë ambërë e Ryobha kubha bhatukuune. Amare niichiri kobhabherekera bhano bha-masari, kubha bhatukuune.”

Eribhoori ighoro e kwiyima ebhiinyakure

(Mataayo 9:14-17; Maariko 2:18-22)

³³ Abhaato bhayo bhakabhoorera Yesu bhakabhugha, “Abhaghëndi bha Yohana eriibhagha ryaru mbahiyyima ebhiinyakure bharasabha Eryobha. Koru abhaghëndi bha Mabharisaayo, bhoose mbahaaköra hang'uhang'u. Amare bhano bhabhaacho, neke gheghughëri bhatakwiyyima, mbakwenderera kuraaghera na kunyo?”

³⁴ Yesu akabhagharokeri, “Eriibhagha omutëmi obhokwiri akeere haghirohamu na abhaghëni bhaache mwikwirera, nibhu moghuköra abhaghëni bhayo bhiiyime ebhiinyakure na bheekunyo? ³⁵ Amare, mo-chaasiko chino chekuucha, omutëmi o bhokwiri nakoruusibhu ghatë yaabho. Mo-chaasiko chiyo, niho bhaakubha bhariiyyima ebhiinyakure.”

³⁶ Yesu akabhabhoorera eghetubhaani ekende, akabhugha, “Taanyi-ho mooto uno akotunga egheteneka koru mo-ngibho ahe, akiimoki aghetumerani mo-ngibho ankungu. Gho ghuköra hang'u, naakubha atandwire angibho yaache ahe. Wiiki, egheteneka kiyo ke ngibho ahe, ghetakoghwana na angibho ankungu.

³⁷ “Wiiki taanyi-ho mooto uno aghotoora adivaayi ahe mo-maghöchi gha amashëerö amakungu.* Mbe, gho kubha, ghuköra hang’u, adivaayi ahe erabhera, neghwati amaghöchi ghayo. Amaghöchi ghayo, wiiki ngaghuseräka. ³⁸ Mbe, adivaayi ahe, abhaato mbakoyetooro mo-maghöchi gha amashëerö amahe.

³⁹ “Omooto uno anariri adivaayi e kare, taaghwighomba adivaayi ahe. Naakobhugha kubha, ‘E kare niyo amachömu.’”

Yesu niwe Omutëmi o rosiko ro Riikane

(Mataayo 12:1-8; Maariko 2:23-28)

6 ¹ Orosiko rumu ro Riikane, Yesu naare araheta mo-meghondo ghe changano. Abhaghëndi bhaache, bhaghaghëndä bharatu ebhisaawa bhe changano. Mbaare bharabhunga na kure chaahëkë cheeche.

² Mbe, Amabharisaayo abhamu bhakamobhoorera Yesu bhakabhugha, “Kana neke ñmoghuköra hang’u orosiko ro Riikane? Orosiko ruyo, emeghiro ghiito ngeghoturëki ghuköra omoremo wowoose!”

³ Yesu akabhagharokeri, “Motaasomiri bhuure omutëmi Tawuti :aköriri, eribhagha are na anchera iwe na bhaare are nabho? ⁴ :Naasöhiri Mwisëngërö, akiimoki emighaate ghino :bhaare bharusiiri e Ryobha akare, na koru abhaghëndi akabhaha emighaate ghiyo. Wiiki yandekuru mo-meghiro ghe Musa kubha, abhaato bhano bhiishereriiru kure emighaate ghenga ghiyo n-abhachaama abheene chiri.” ⁵ Yesu akengereereri kobhugha, “Omoona o Mooto, niwe Omutëmi o rosiko ro Riikane.”

Yesu ñakahöri omooto orosiko ro Riikane

(Mataayo 12:9-14; Maariko 3:1-6)

⁶ Orosiko oronde ro Riikane, Yesu aghasöha mo-nyumba e Ryobha, aghasëema kweghi abhaato. Muyo, naare-mu omooto umu, are akuure okubhökö kooche gho kwiro. ⁷ Mbe, Amabharisaayo na abheeghi bha meghiro, mbaare bharatëngëra bharighi Yesu, aribha akomuhöri omooto uyo orosiko ro Riikane. Mbaare bharatabhara ang’ana e komusëma.

⁸ Ibheere, Yesu akamanya amihëëbhö ghaabho amabhe. Niho, akamobhoorera omooto uno anyi no okubhökö ghokuure, “Nuuche, wimeerere hano ghatëghate.” Omooto uyo akaacha, akimeerera ghatëghate yaabho.

⁹ Hayohayo, Yesu akabhabhoori abhaato bhayo, “Mbe, ñekabhabhoori inyu orosiko ro Riikane, emeghiro ngeghotobhoorera ghuköra ke? Amachömu, ghasi amabhe? Totoori omooto, ghasi ghwita?” ¹⁰ Yesu akabhamöghörëra amiisho abhaato bhayo bhoose. Akamara akamobhoorera omooto uyo, “Nughöröröki okubhökö koocho.” Hang’u aghughörörökiri, hayohayo okubhökö kooche ghookahöra.

¹¹ Amabharisaayo bhayo, na abheeghi bha meghiro bhaghaghöotu no obhororo, bhaghakarara chwee. Bhaghasëema kobhoorani kebhuno bhakamakörëra Yesu amabhe.

Yesu ñakaahura abhatomu ikomi na abhabhere

(Mataayo 10:1-4; Maariko 3:13-19)

¹² Orosiko rumu, Yesu aghaye ghusabha Eryobha a-gheghoru, aghasabha obhotiko bhoghima. ¹³ Hano bhokiire, akabhabherekera bhaghëndi bhaache. Mo-bhayo akaahura ikomi na bhabhere, akabhaha eriina re bhatomu. Abhatomu bhayo nibho bhano, ¹⁴ Simiyooni, uno Yesu aheere eriina re Bheetero, na

* 5:37 Amashëerö Mashëerö ghayo nga chambori :ghaare.

Andereya omonyi waache Simiyooni, na Yakobho, na Yohana, na Bhiiribho, na Bhatoromaayo, ¹⁵ Mataayo, na Tomaso, na Yakobho mwereeti o Arubhaayo, na Simiyooni uno are o mo-bhoyo bho Bhaserote, ¹⁶ Yuuta mwereeti o Yakobho, na Yuuta Isikariyoote, wuure amariri akamuhaana Yesu mo-bhabhisa bhaache.

Yesu ^akahöri abhabhabharu bhaaru

(Mataayo 4:23-25)

¹⁷ Yesu eghiika mo-gheghoro, haghirohamu na abhaghëndi bhaache. Hano ahikiri ahaghiro hano haanyi ne ekibhara, akimeerera-ho. Ahaghiro hayo, mbatiimaniri bhaghëndi bhaache bhaaru chwee. Haare-ho wiiki obhoyo bho bhaato abhande bhano bharuure mo-se yoose e Yuteya, koru mo-moghya o Yerusareemu, na koru mo-meghya ghe Tiiro na Sitooni ghino gheere haghuhu na anyancha. ¹⁸ Abhaato bhayo :mbiichiri hayo komutëghëërera Yesu na kuhöribhu amabhabharu ghaabho. Koru bhaare :bhaare bharanyaakibhu ne emisambu, akabha arabhahöri. ¹⁹ Abhaato bhayo bhoose, mbaare bharakii bhani komoturi Yesu, gho kubha changuru ncheere cheramoru na kobhahöri bhoose.

Yesu ^nakweghi ighoro e rubhango na amacheeche

(Mataayo 5:1-12)

²⁰ Yesu aghaghëgha amiisho akabhamööhërerä bhaghëndi bhaache, akabhabhoorera,

“Ng’oni inyu bhano moonyi bhahabhe ibheere,
gho kubha obhutëmi bho Ryobha m-bhobhoonyu.

²¹ Ng’oni inyu bhano mokooghu anchera ibheere,
mokumara mwigbote.

Ng’oni inyu bhano mokorera ibheere,
mokumara musëké.

²² Ng’oni inyu, bhano abhaato bhakobharëgha gho ghiri e Moona o Mooto,
na kobhaahura, bharabhatoka, na kobhaghamba kubha inyu mbabhe moonyi.”

²³ “Hano ghaakorwera ghayo, muchömëru na ghotuumatuuma. Mumanye kubha, Eryobha ndeekobhatuha Mwishaaro. Koru na bhasookoro bhaabho, hang’u :bhaare bharakörëra abharöoti bhaabho.

²⁴ “Amare inyu abhaame, horeera mookorighi,
aghareeya yaanyu mumariri koyibhöna.

²⁵ Horeera mookorighi inyu, bhano moghwhigota ibheere,
gho kubha moramara mokooghu anchera.

Horeera mookorighi inyu, bhano moghusëka ibheere,
gho kubha mokorera na kwiihiyerera.

²⁶ Horeera mookorighi inyu, bhano abhaato bhoose bhakobhatöghösi, gho kubha, koru na bhasookoro bhaabho, hang’u bhaköriire abharöoti bha bhuröngö. Mbe, motaakubhöna atuhu Mwishaaro.”

Kobhasiigha abhabhisa bhiiito

(Mataayo 5:38-48, 7:12)

²⁷ “Mbe, nekabhabhoorera inyu bhano moghüntëghëërera, mobhasiighe abhabhisa bhaanyu. Mobhakörëre amachömu abhaato bhano bhaharëghiri.

²⁸ Wiiki abhaato bhano bhakobhihiima, inyu mobhiitabheri. Koru abhaato bhano bhakobhanyaaki, inyu mobhasabhere amachömu kwo Ryobha.

²⁹ “Omooto araghutaraaha aghutëmë orohe mo-rusa, omugarurëre no orusa oronde. Omooto arakuhöka angibho yaacho, omotighere imoki ne erighöoti.

³⁰ Omooto wowoose uno aghoghusabha egheghiro, omuhë. Omooto arakuhöka

ebheghiro bheeche, otamusabha aghugharokeri. ³¹ Mukörërë abhande kinya bhuure mokwenda mukörëru inyu.

³² “Morabhasiigha bhaare abheene bhabhasiighiri inyu, mookubha mobhwine bhwera ke? Koru bhano bha-masari, mbasiighiri abhaato bhano bhabhasiighiri.

³³ Moratoori bhaare abheene bhakobhatoori inyu, mookubha mobhwine bhwera ke? Koru bhano bha-masari bhoose, mbahaaköra hang’uhang’u! ³⁴ Morabhaha asiire bhaare abheene moghwiteng’era~ kubha mbakobhagharokeri, mookubha mobhwine bhwera ke? Koru bhano bha-masari, mbaakobhaha asiire abhaghëndi, kwo bhuure bhaghwiteng’era~ kubha, bhayo mbakobhagharokeri bhyose!

³⁵ “Amare inyu, mobhasiighe abhabhisa bhaanyu, mobhatoori, mobhahe asiire, motiteng’era kubha mbakobhagharokeri. Moraköra hang’u niho mookubhöna atuho inkoro, na kubha abhaana bha hëënë bha Ryobha omokoro o bhyose. Gho kubha, Eryobha ndeghusakëri koru bhaare bhatakoriitabheri, na abhaköri bha mabhe.

³⁶ “Moghwere bheghongi abhande, kinya Taata wiito aghoghwera bheghongi abhaato.

Motatenera ekiina abhande

(Mataayo 7:1-5)

³⁷ “Motatenera ekiina abhande, niho na niinyu motaaghoteneru ekiina. Inyu motihiima abhande, niho motakwihiimu. Mwabhere abhaato bhano bhabhatasiiri, niho na inyu mookwabheru. ³⁸ Mobhahe abhaato ebheghiro bhino bhaakwenda, niho na inyu mokuhaabhu. Ebheghiro bhino mokuhaabhu, mbeekubha mo-kirëngërë ghichömu chwee. Ekirëngërë ngegghosingisu na ghwighatereru, mbagha ghiichore chwee, koru keriteka. Gho kubha, ekirëngërë kiire kiire murëngiire abhande, nikyo na niinyu mookubha morarëngëru.”

³⁹ Yesu akabhabhoorera eghetubhaani akabhugha, “Mbe, ndakinya hëënë, omohuku taghotora komurahuuna omohuku mughëndi waache? Mbe hëënë, bhoose bhabhere mbakwihengerera mwiribha!

⁴⁰ “Omoona mwegha, taaghotora kubha mumënyi ghokera omweghi waache. Amare, aramara kweghibhu ghoose, niho aghotubhaana no omweghi waache.

⁴¹ “Kana nokumööhërëri aghasaara kano kaanyi mo-riiso re mughëndi waacho, amare toghotereera eghisaara kino keenyi mo-riiso reecho? ⁴² Wiiki nibhu oghotora komobhoorera omughëndi waacho, ‘Oo mohiiri waane, tigha nekorusi aghasaara kano kaanyi mo-riiso reecho,’ Eriibhagha iye mwene tookorighi eghisaara kino keenyi mo-riiso reecho? Mobhe onyi iye! Orusi singa eghisaara kino keenyi mo-riiso reecho, niho oghotora korighi bhoheene koruusi aghasaara ghasuuho mo-riiso re mughëndi waacho.

Abhaato mbaakumanyekana kwo makurubhesi ghaabho

(Mataayo 7:16-20, 12:33-35)

⁴³ “Toonyi-ho omote omuchömu, uno okorusi amakurubhesi amasineenu. Toonyi-ho omote mobhe, uno okorusi amakurubhesi amachömu. ⁴⁴ Abhaato bhataaghotu amakurubhesi gha chaseeke mo-mete ghe chaasagharama. Wiiki bhataaghotu amakurubhesi gha chandoghoru mo-mete ghe michongoma. Amare emete ghyose, nooghoghimënya kwo amakurubhesi ghaache agheene.

⁴⁵ “Koru hang’u omooto muchömu, nookomumënya kwo maköri ghaache amachömu ghano ghahaaru mo-motema waache omuchömu. Koru omooto omobhe bhuure bhuure, nahaaköra amabhe kurëng’aana na amabhe ghano ghahaaru mo-motema waache omobhe. Mbe, amang’ana ghano omooto aghosiikera, n-ghaare ghichwire mo-motema waache.

Abhaabhëki bha manga abhere

(Mataayo 7:24-27)

⁴⁶“Ngwake mokomberekera, ‘Omutëmi, Omutëmi,’ amare amang’ana ghano nekabhabhoorera, motaaghoghaköra? ⁴⁷Wowoose uno akuucha ghokoone, na ghutëghëërëra amang’ana ghaane na ghoghaghööta, nekobhabhoorera kebhunono anyi gho kirëngi.

⁴⁸“Naatubhiine no omwabhëki o nyumba, uno atukiri obhoroso bhooghaye haase chwee, koru akahikera mwitare, akaabhëka anyumba ighoro yaache.

“Eriibhagha re twigho, orooche roghiichora, amanche ghaghatëma nyumba iyo. Koru tesingisiri, gho kubha neere yabhëkuru bhoheene.

⁴⁹“Amare, wowoose uno aghutëghëërëra amang’ana ghaane na kwanga ghoghatereera, omooto uyo, naatubhiine na uno abhëkiri anyumba yaache mwiröbhë eryene, etaghöötë obhoroso. Hano orooche rwichwire, amanche ghaghatëma anyumba iyo, hayohayo eghagho haase, eghasareka yoose.”

Obhokumi bho omokoro o bhaashirikare

(Mataayo 8:5-13)

7¹Eriibhagha Yesu amariri kobhabhoorera obhoyo bho bhaato amang’ana ghayo ghoose, aghaye aghasöha mo-moghya o Kabherenawumu. ²Mo-moghya uyo, naare-ho omokoro o bhaashirikare bha Keruumi. Omokoro uyo, naare no omutamishi are amosiighiri chwee. Wiiki omutamishi uyo naare abhabhiire arenda ghoku.

³Mbe, omokoro uyo, eriiibhagha oghwire amang’ana ighoro e Yesu, akabhatoma abhagharuka bha Bhayahuuti o-Yesu bhamusabhe, ache komuhöri omutamishi waache. ⁴Abhagharuka bhayo, hano bhahikiri o-Yesu, bhakamusasaama chwee bharamobhoorera, “Omooto uyo, narëng’aniire omukörërë ang’ana ino, ⁵gho kubha nasiighiri ase yiito. Niwe atwabhëkiire anyumba yiito e Ryobha.”

⁶Ibheere Yesu aghaye haghirohamu na abhagharuka bhayo awaache omokoro uyo. Hano bhating’iri, omokoro uyo aghatoma bhasaani bhaache bhahire amang’ana ghaache o-Yesu. Bhakamobhoorera, “Oo Omutëmi, otanyaaka, gho kubha eni ntekurëng’aanera iye usöhë awaane. ⁷Wiiki nikyo nerooche kubha ntekurëng’aanera kuucha ghokoocho. Mbe, noobhughe ang’ana ayeene hang’u, omutamishi waane naakuhöra.

⁸“Mo-mweya uno neenyi nawe mo-moremo waane, neenyi na abhakoro bhaane, wiiki neenyi na abhaashirikare bhano bhaanyi haase yaane. Neramobhoorera umu, ‘Nooghi’, hayohayo aghi. Neramobhoorera owonde, ‘Nuuche’, hayohayo acha. Omusësë waane woose, neramobhoorera, ‘Nuukörë hang’u’, nibhu woose aghuköra.”

⁹Hano Yesu oghwire ghayo, akamoroghoora chwee. Aghishoorereri obhoyo bho bhaato bhano :bhaare bharamutambana, akabhabhoorera, “Mbe, nekabhabhoorera, koru mo-Bhiisiraeri bhoose, nkeere ntimarandighi mooto wowoose uno anyi no obhokumi bhonga bhuno!”

¹⁰Abhaato bhano :bhaare bhatomuru bhagharura awaache omokoro uyo, bhakabhöna omutamishi wuure ahöriri.

Yesu ^akamoryoki omobhureni uno akuure

¹¹Akamara eriiibhagha isuuhu, Yesu aghaye mo-moghya o Nayini, anyi haghirohamu na abhaghëndi bhaache na abhaato abhande bhaaru. ¹²Hano are aghating’i ekehita ke moghya, aghatëmëërana na abhaato bhaghëghiri erihundughu re mobhureni. Omobhureni uyo, niwe are omoona omwene chiri o

mokungu uyo, wiiki omokungu uyo mosino are. Abhaato bhaaru bha moghya uyo mbaare haghirohamu nawe.

¹³ Hano Omutëmi amoroche omosino uyo, akamoghwerera bheghongi, akamobhoorera, “Otighe korera.” ¹⁴ Aghishukeerera machëëra ino :bhaare bhaghëghiire erihundughu riyo, akareturi. Abhaato bhano :bhaare bharihëghiri, bhakimeerera.

Yesu akabhugha, “Oo omobhureni, ñgakobhoorera, nobhooke!” ¹⁵ Omobhureni uno are akuure, hayohayo akabhooke, aghiikara, aghasëëma ghosiikera wiiki. Yesu akamuha nyina.

¹⁶ Abhaato bhayo bhoose, bhaghatiina chwee. Bhaghasëëma ghokumi Eryobha, bharabhugha, “Omurööti omokoro, akarwera ggate yiito!” Wiiki bhakabhugha, “Eryobha, ndiichiri ghotoori abhaato bhaache!” ¹⁷ Ang’ana iyo, eghasancha chwee mo-mukööwa woose o Yuteya, na mo-mikööwa eghende ghe haghuhe.

Yohana Omubhatisaachi na Yesu

(Mataayo 11:2-19)

¹⁸ Hano Yesu are araköra ghoose ghayo, abhaghëndi bhakamohirera Yohana amang’ana, eribhagha riyo mwigherëcha are. Niho akabhabherekera bhabhere mo-bhayo,* ¹⁹ akabhatoma kubha bhaghëndë komobhoori Omutëmi Yesu, kubha, “Kana, iye niye Masiya wuure akuucha, ghasi tughanye owonde?”*

²⁰ Hano bhahikiri ghokooche, bhakamobhoorera, “Yohana Omubhatisaachi natotomiri ghokooche. Tokobhoori, ‘Kana, iye niye Masiya wuure akuucha, ghasi tughanye owonde?’”

²¹ Kwo riihagha riyo riyo, Yesu naare arahöri abhaato bhaaru amabhabharu ghaabho. Naare ahöriri wiiki koru bhano bhatiiruru ne emisambu. Wiiki naagheriri abhahuku bhaaru bhatore korighi.

²² Niho, Yesu akabhabharokeri, “Mughëndë momobhoorere Yohana ghoose ghano morooche, na ghoghooghu. Kubha, abhahuku ñbhakarighi, na abhabhëëru ñbhaghaghënda, na abhabhabharu bha mbiti ñbhakahöra, na abhakiro mbakooghu, na abhaku ñbhakaryoka, na abhahabhe, ñbhakaraghaneru Ang’ana Anchömu e Ryobha. ²³ Ng’oni, omooto wowoose uno ataanyi na kemboori ighoro yaane!”

²⁴ Bhaache kumara bhayo bhabhere koru hayo, Yesu aghasëëma ghoghabhoorera amakinda gha bhaato ighoro e Yohana akabhugha, “:Moghiire kumööhi ke iyo mwibhara? Obhunyaaki bhuno bhoghosingisu no obhukama? Tiyaanyi! ²⁵ Mbe, moore moraghe kumööhi ke? Omooto uno are abheekiri amaghöoti machömu? Tiyaanyi! Abhaato bhano bhahaabheeka amaghöoti amachömu, na kumënya eriimënya re kyame, bhayo mbahaabha bhariikara mo-chanyumba chankoro che ghitëmi!

²⁶ “Kana, neke moore moraghe kumööhi? Omurööti? Hee! Amare ñnekabhabhoorera kubha Yohana naghokera omurööti ²⁷ Mo-Mandeko Amatööbhiyu, niwe wuure andekiiru ghano,

‘Mööhi, nekamotoma omutamishi waane ambëre yaacho, uno aghoghukangata aghukörërë anchera.’”*

²⁸ Yesu akabhabhoorera wiiki, “Mbe, nekabhabhoorera kubha, ggate e bhaato bhoose bhano bhibhwiru na abhakari, taanyi-ho uno anyi mokoro ghokera Yohana. Koru hang’u, uno akorighibhu m-mosuuuho mo-bhutëmi bho Ryobha, iwe m-mokoro komokera.”

*7:18 Mööhi Ruuka 3:20.

*7:19 Masiya n-omuhaku amaghuta o Ryobha.

*7:27 Mööhi Maraaki 3:1.

²⁹ Abhaato bhayo bhoose, haghirohamu na abhatöbhi bha righöoti, hano bhoghwire amang'ana ghayo gha Yesu, bhaghiishereri kubha amihëëbhö gha Ryobha ngaare machömu ghokoobho. Abhaato bhayo mbisheriiri gho kubha, nibho bhaare Yohana are amariri kobhabhatiisa. ³⁰ Amare Amabharisaayo na abheeghi bha meghiro, ibho bhakanga ghano Eryobha rebhendiire, gho kubha :mbaangiri kubhatiisu na Yohana.

³¹ Yesu akabhabhoorera wiiki, “Abhaato bha rwibhoru runo, nebhatuubhaani na ke? Na mbatëëmö ke moonyi? ³² Mbatubhiine na abhaana bhano bhikeere mo-mutëëra, bharabherekana,

‘Kana ntobhatëmiire ebherereesi mwikwirera, amare motabhiniri!
Tokabheembera emyembo ghe macheeche, amare motihinyeriire!’”

³³ “Nekabhabhoorera gho kubha, eriibhagha Yohana Omubhatisaachi ichiri, taare arare emighaate, koru kunyo adivaayi. Gho ghayo, inyu mokabhugha kubha naanyi ne emisambu! ³⁴ Omoona o Mooto akaacha, iwe, nakure emighaate na kunyo adivaayi. Gho ghayo, inyu mokobhugha, ‘Mumööhi! Uno mohobhaaru, wiiki murëëbhi! Koru n-omusaani o bhatöbhi bha righöoti, na bha masari!’ ³⁵ Amare amang'iini gha Ryobha ngahaarighibhu kubha n-gha hëënë, kwo bhaato bhano bhakoresooka.”

Yesu awaache Simiyooni Omubharisaayo

³⁶ Ronde Simiyooni Omubharisaayo, akamuraghani Yesu aghi kuraaghera awaache. Ibheere Yesu aghasöha awaache Omubharisaayo uyo, aghiikara araaghere. ³⁷ Mo-moghya uyo, naare-ho omukari umu o masari, musöngörëeri. Omukari uyo, hano oghwire kubha Yesu nakuraaghera o-Mubharisaayo uyo, aghasöha muyo na chubha e riighori ikoro, ino ere na amaghuta gha keneeso. * ³⁸ Akimeerera anyuma e Yesu, haghuhe na amaghoru ghaache. Aghasëëma korera, changishori cheeche cheekabha cheramutöonyëra Yesu mo-maghoru. Akabha aramutareki na chanchweri cheeche, aramughöotaghööta amaghoru ghaache, na ghoghahaka amaghuta gha keneeso.

³⁹ Omubharisaayo uyo, hano arooche ghayo, akihëëbha mo-metema waache akabhugha, “Omooto uno, nangabheere muröoti, nangamanyiri kubha, omukari uno akomughöotaghööta, n-omooto o ngabhu. Nangamanyiri kubha, iwe mooto o masari, omusöngörëeri!”

⁴⁰ Yesu akamobhoorera, “Oo Simiyooni, neenyi na ang'ana e ghokobhoorera.” Nawe akamugharokeri, “Oo Omweghi waane, nomboorere.”

⁴¹ Ibheere, Yesu akamobhoorera, “Mbaare-ho abhaato bhabhere, :bhaare na asiire e chambiiri na uno are abhaheere asiire iyo. Umu obhayo, naare aghëghiri chaatinaari amaghana ataano. Omughëndi nawe, :naghëghiri chaatinaari miröngö etaano. * ⁴² Hano chambiiri chebhori che komoreha uno are abhaheere asiire iyo, akabhaabhera, bhatareha. Mbe, ghate e bhayo bhabhere, u-uhe akomosiigha ghokera owonde?”

⁴³ Simiyooni akamugharokeri, “Nekorighi kubha, neekubha wuure are abhiiru asiire ankoro.” Yesu akamobhoorera, “Oghangarokeri bhoheene.” ⁴⁴ Hayohayo, Yesu akamwishororeri omukari uyo, akamobhoorera Simiyooni, “Okamorighi omukari uno? Nisöhiri awaacho, amare tungënihiri gho kuuha amanche gha kweghi amaghoru ghaane. * Amare iwe, naachachiri amaghoru ghaane na

*7:37 *Achubha e riighori ikoro* Achubha iyo neere e arabhaasita gho Keyunaani.

*7:41 *Chaatinaari* Atinaari imu nirëng'iine na mareho gha muköri o moremo kwo rosiko.

*7:44 Kwo Abhayahuuti, neere asughara komoruuseri omughëni amanche abhönë ghwishaabha amaghoru ghaache, gho kubha chanchera ncheere chichwire orotu.

changishori cheeche, na ghoghatareki gho chanchweri cheeche. ⁴⁵ Hano nisöhiri awaacho, tunkëeriri kwo miigha, amare we, korwera eriibhagha nisöhiri muno, tatamuru ghungöota amaghoru ghaane. ⁴⁶ Wiiki tonsookiri gho kuhaka omutu waane amaghuta. Amare we, naahakiri amaghoru ghaane amaghuta gha keneeso. ⁴⁷ Gho ghayo, ngakobhoorera kubha, obhosiighi bho omukari uno m-mbokoro, mbookwerekiki kubha amasari ghaache maaru, ngabhiiru. Amare wowoose uno abhiiru amasari masuuu, uyo, nahaabha no obhosiighi bhosuuu wiiki.”

⁴⁸ Hayohayo, Yesu akamobhoorera omukari uyo, “Amasari ghaacho, ngamariri kwabheru.”

⁴⁹ Abhaghëni abhande bhano :bhaare mo-bhiinyakure, bhaghasëëma kobhoorani, kubha, “Niwe uno, akwabhera koru amasari?”

⁵⁰ Hayo, Yesu akamobhoorera omukari uyo, “Oghokumi koocho niko ghoghotooriri! Nooghi no omurëmbë.”

Abhakari bhano :bhaare ^bharamotoori Yesu

8 ¹ Ache kumara ghayo, Yesu akabha arahetera mo-meghya na mo-bhyaro. Naare araraghaneri abhaato bha se iyo yoose Ang’ana Anchömu e bhutëmi bho Ryobha. Naare haghirohamu na bhaanabheegha bhaache ikomi na abhabhere. ² Wiiki naare na abhakari abhande bhano are ahöriri amabhabharu ghaabho na kobharuusi emisambu. Mo-bhayo, naare-mu Mariyam o kyar o Maghitareena, uno Yesu are amorusiri emisambu mohungate. ³ Wiiki naare-ho Yowana, mugha Kusa. Kusa uyo, niwe uno are arimeererera ebheghiro bhe mutëmi Herote. Mbaare-ho wiiki Susana, na abhakari abhande bhaaru. Abhakari bhayo, mbaare bhararuusi ebheghiro bheebho, gho komotoori Yesu na abhaghëndi bhaache.

Eghetubhaani ke mobhusuri

(Mataayo 13:1-9; Maariko 4:1-9)

⁴ Orosiko rumu abhaato bha meghya myaru mbaare bharamutambana Yesu, bhaghatimaani abhaato bhaaru chwee. Hayo akabhabhoorera eghetubhaani kino akabhugha, ⁵ “Naare-ho omobhusuri, uno aghiire kobhusura chambusuru cheeche mo-moghondo. Eriibhagha are arabhusura, echende cheghagho haghuhu na anchera, cheghatachu, ebhinyönyi bheghachire.

⁶ “Echende, ncheghweriire mwitare. Hano chisëëmiri kumëra chekooma gho kobhori amanche. ⁷ Echende, cheghagho mo-maho. Eriibhagha amahö ghayo ghamëririri, ghaghachibhandereri chambusuru chiyo.

⁸ “Echende, cheghaghwera mwiröbhë ichömu. Cheekamëra chekabhyara imu riighana.” Hano amariri kobhugha ghayo, aghatiiri eriiraka arabhugha, “Uno anyi na amatu gha kooghu, na atëghëërë.”

Yesu ^aghateemora eghetubhaani ke mobhusuri

(Mataayo 13:10-23; Maariko 4:10-20)

⁹ Abhaanabheegha bha Yesu bhakamobhoori, “Eghetubhaani kiyo, neke oghoghetubhaani?” ¹⁰ Akabhagharokeri, “Inyu muhaabhuru ghoghamanya ghano ghabhisuru mo-bhutëmi bho Ryobha. Amare kwo bhande neghosiikera kwo bhetubhaani gho ghiri, ‘Bhamööhërëri amare bhatarighi, bhatëghëërë, amare bhatamënya.’”

¹¹ “Eghetubhaani kiyo, ^nekabhateemorera. Chambusuru, n-Ang’ana e Ryobha. ¹² Chambusuru chino cheghweriire mo-nchera, nchekwerekiki abhaato bhano

* 8:10 Isaaya 6:9.

bhakooghu Ang'ana e Ryobha. Hayohayo, Eriishambu riicha reyeruusi mo-metema gheebho, bhataacha ghokumi bhatooribhu.

¹³ “Chambusuru chino cheghweriire mwitare, nchekwerekki abhaato bhano bhaghuchömëru kooghu Ang'ana e Ryobha, bhayekumi kwo riibhagha isuuu. Hano bhaghusakibhu, bharetigha, gho kubha mbatubhiine no omote uno otaamara ohira emerya kure.

¹⁴ “Chambusuru chino cheghweriire ghate e maho, nchekwerekki abhaato bhano bhakooghu Ang'ana e Ryobha. Amare hano bhakwenderera, bhabhandereru na ahaho, no obhutabhari bho bhwame, na amasineenu gha moose ino. Ghayo ngaghughëri obhokumi bhoobho bhotaruusi amakorobhese amachömu.

¹⁵ “Chambusuru chino cheghweriire mwiröbhë ichömu, nchekwerekki abhaato bhano bhakooghu Ang'ana e Ryobha. Bhaache kumara kooghu, bhayighöötërëra mo-metema gheebho kwo bhughöröröku. Wiiki bhengera ghoghihëebha, bhayo mbahaaghumereri mbagha bharuusi amakorobhese amachömu.

Eghetubhaani ghe tara

(Maariko 4:21-25)

¹⁶ “Taanyi-ho omooto uno akumara ghughööti atara, ayehunya na anyongo, hamu koyetoora irungu re bhorere. Amare nakoyetoora ighoro e meeche, gho ghiri bhano bhaghusöha, bhatore korighi emirëngaari gheeche.

¹⁷ “Hang’uhang’u, ghyokyose kino ghekundekiuru ngekohunyuru, na kino kebhisuru ngeghotooru haheero na kumënyëkane.*

¹⁸ “Mbe, ghano moghwire, moghatëghëërë bhoheene, gho kubha, uno anyi ne egheghiro nakuhaabhu, na wuure ataanyi ne egheghiro naakuhöku koru kiire are ararighi kubha naanyi nakyo.”

Abhahiiri bha hëënë bha Yesu

(Mataayo 12:46-50; Maariko 3:31-35)

¹⁹ Niho nyina Yesu na bhawomoobho bhakaacha komumööhi Yesu. Amare bhataatoriri komohikera, gho kubha haare no omokindighano o bhaato.

²⁰ Abhaato bhaakamurëëtëra amang'ana bharamobhoorera, “Nyako na bhawomoonyu, mbimeriire anche, mbakwenda morighani nabho.”

²¹ Akabhagharokeri, “Yiima na bhawomwito nibho bhoose bhano bhakooghu Ang'ana e Ryobha na koyiköra.”

Yesu ^akahoreeri omukama ne emekunda ghe manche

(Mataayo 8:23-27; Maariko 4:35-41)

²² Orosiko rumu, Yesu aghatiira mo-bhwato haghirohamu na abhaanabheegha bhaache, akabhabhoorera, “Ntutënyë Anyancha tughëndë amwambuko.” Mbe, bhaghatanura.

²³ Hano :bhaare bharaghe, Yesu aghaghöötu na chandooro, akamisi. Eriibhagha riyo mo-nyancha, hakarwera obhukama ne emekunda mihaari chwee. Obhwato bhuyo, bhoghasëëma ghwichora amanche, bhoose mbaare mo-bhobhe.

²⁴ Abhaanabheegha bhayo, bhakamotumbana, bhakamobhooki, bharabhugha, “Omutëmi omokoro! Omutëmi omokoro! ^Toghasireekerera!”

Hayohayo akabhooka, akabhohiinya obhukama bhuyo ne emekunda ghe manche, kubha ghihörëërë. Gheeghakira kiri, anyancha ekahörëëra.

* 8:17 *Bhyose bhino bhebhisuru* Amang'ana ghano ghabhisuru mo-metema ghe bhaato ngaghotooru haheero gharighibhu na abhaato bhoose.

²⁵ Yesu akabhabhoorera, “Hayi bhoonyi obhokumi bhoonyu?” Bhaghatiina, bhakahagha, bhakibhoorera abheene kwo bheene, “Uno niwe? Akuhateka koru obhukama bhuhaari ne emekunda ghe manche, ghemosooka!”

Yesu ^akahöri omooto o Gheraasi uno anyi ne emisambu

(Mataayo 8:28-34; Maariko 5:1-20)

²⁶ Yesu na abhaanabheegha bhaache, hano bhatëenyiri Anyancha e Ghariraaya, bhakahikera ase e Bhagheraasi, amwambuko mo-mukööwa o Ghariraaya. ²⁷ Hano bhiikiri mo-ngëghu e nyancha iyo, bhaghatëmëërana no omooto umu o moghya uyo, uno are ne emisambu. Omooto uyo, gho chaasiko chaaru taare ariikara aka, amare naare ghwikara mo-chambeehera. Mo-chaasiko chiyo choose, naare araghënda king'aabhi.

²⁸ Hano amorooche Yesu aghaköra eriireghe, akiirekera haase ambërë yaache, aghasiikera kwo riiraka ikoro, “Neke neenyi na niye, Yesu, Omoona o Ryobha omokoro o bhyose? Neghusabha otanyaaki.” ²⁹ Eriibhagha riyo Yesu naare akawuhateka omusambu uyo, omoru omooto uyo. Kwo riibhagha ryaru nahatiiru no omusambu, koru nahaachongu na kubhöhu. Naare arabhöhu ne eminyörörö na chambengo, abhetena bhyose, ayaaribhu mwibhara gho changuru che musambu uyo.

³⁰ Yesu akamobhoori, “Eriina reecho niye we?” Nawe akamugharokeri, “Eriina reene, n-omukëëya.” Naabhughiri hang'u, gho kubha emisambu myaru ngeere ghemusöhëriire. ³¹ Emisambu ghiyo, ghekamusasaama Yesu gherabhugha, “Otatobhoorera tughëndë mwirooma rino reenyi kure nyaari.”

³² Mbe, hayo ndeere-ho erikinda re chambeechi cheere cherariishi mo-gheghoro. Mbe, emisambu ghiyo gheekamusabha Yesu, kubha aghiisherereri ghighëndë ghisöhërërë chambeechi chiyo. Aghaghiisherereri, ³³ gheekamoru omooto uyo, gheeghaye gheeghasöha gho changuru mo-chambeechi chiyo. Chambeechi chiyo choose, cheekahiringita cherahe ghuye mo-nyancha iyo, cheeghakwera mo-manche choose.

³⁴ Abhariishi bha chambeechi chiyo, hano bharooche ghayo ghoose gharweriire, bhakayaara, bhaaghaye mo-moghya na mo-bhyaro, bharasanchi amang'ana mo-bhaato. ³⁵ Bhakamara abhaato bhaaghaye korighi amang'ana ghayo kinya ghaanyi.

Hano bhaahikiri o-Yesu, bhakamorighi omooto uyo emisambu, ghemoruure. Naare ikeere haghuhu na amaghoru gha Yesu, abheekiri changibho, naare na amang'iini ghaache bhoheene. Abhaato bhayo, bhaghaghöotu no obhotiini.

³⁶ Abhaato bhano :bharooche amang'ana ghayo ghoose, mbaare bharabhabhoorera bhayo kebhuno ahöriibhu. ³⁷ Abhaato bhoose bha mo-se e Bhagheraasi, bhaghaghöotu no obhotiini chwee. Bhakamusabha Yesu kubha aru hayo mo-se yaabho. Mbe, hano are aghatiira obhwato ghugharuka Kabherenawumu.

³⁸ Omooto uyo, are ne emisambu, akamusasaama Yesu akamobhoorera, “Tughëndë haghirohamu.” Amare Yesu taamwishereriiri, akamobhoorera, ³⁹ “Nooghi awaacho iyo mo-moghya, obhabhoorere abhaato amang'ana amakoro ghano Eryobha reghuköriire.”

Niho, omooto uyo akaru hayo, aghaye arabharaghaneri abhaato bha chambaara choose bha mo-moghya ghaare Yesu amuköriire.

Yesu ^akahöri omukari, no omuuke ^akaryokibhu

(Mataayo 9:18-26; Maariko 5:21-43)

⁴⁰ Hano Yesu ahikiri mo-se e Ghariraaya, aghaturung'neru no obhoyo bho bhaato bhano :bhaare bharamughanya.

⁴¹ Hayo, akaacha omooto umu, eriina reeche Yayiro, omokoro o nyumba e Ryobha. Mbe, akahighama ambërë e Yesu, akamusasaama kubha bhaghi nawe awaache, ⁴² gho kubha muuke waache omwene chiri o emeeka ikomi ne ebhere, naare arateni ^aghating'i ghoku.

Aghishereri. Eriibhagha Yesu are araghe, obhoyo bhuyo bho bhaato, mboghiire nawe anyi ghateghate bharatachana chwee.

⁴³ Ghate e bhaato bhayo, naare-mu omukari, uno are no obhubhabharu bho koru amasaaha kwo riibhagha re emeeka ikomi ne ebhere. [Wiiki naare amariri ghusari ebheghiro bheeche bhyose gho kobhaha abhaghabho.] Taare-ho koru mooto uno atoriri komuhöri.

⁴⁴ Mbe, omukari uyo aghaye anyuma e Yesu, aghaturi omuköbha o ngibho yaache. Hayohayo obhubhabharu bhooche bho koru amasaaha bhooghasira, akahöra.

⁴⁵ Yesu akabhoori, “Niwe aghanturi?” Abhaato bhoose, bhakanga. Bheetero nawe akamobhoorera Yesu, “Oo Omutëmi wiito! Taanyi abhaato bhaaru bhakwinariiri bharatachana!”

⁴⁶ Amare, Yesu akabhugha, “Nimanyiri naanyi-ho omooto uno anturiri, gho kubha niyoghwire kubha changuru che kuhöri nchenduure.”

⁴⁷ Omukari uyo, hano arooche kubha taaghotora kwibhisa, aghaye o-Yesu, arasingisa. Akabhuna ebheru ambërë yaache, akamobhoorera ambërë e bhaato bhayo bhoose, kino ghiighërii akamoturi, na ke bhuno ahöriibhu hayohayo.

⁴⁸ Yesu akamobhoorera, “Oo omuuke waane, obhokumi bhoocho ^bhoghakuhöri. Nooghi no omurëmbë!”

⁴⁹ Eriibhagha Yesu are akeere arasiikera ghayo, akaacha omooto koru mo-ka yiire e Yayiro omokoro o nyumba e Ryobha, akamobhoorera, “Omuuke waacho, ^akamara ghuye mo-bhaaru. Nootighe komunyaaki omweghi.” ⁵⁰ Hano Yesu oghwire amang'ana ghayo, akamobhoorera Yayiro, “Otatiina! Ubhe no obhokumi, no omuuke waacho naakuhöribhu.”

⁵¹ Hano Yesu ahikiri awaache Yayiro, akarëki abhaato abhande ghusöha haghirohamu nawe. Amare akabhisherereri Bheetero, Yohana, Yakobho, ni ishe o muuke uyo, na nyina waache.

⁵² Abhaato bhoose, mbaare bhararera na kwihiiyerera gho ghiri e muuke uyo. Niho, Yesu akabhabhoorera, “Motighe korera! Taamara aku uno, mööhi n-komisi amisiri hang'u!” ⁵³ Abhaato bhayo bhaghasëema komusëka, gho kubha :mbaamanyiri kubha uyo naare amariri ghoku.

⁵⁴ Yesu aghaghööta okubhökö ko muuke uyo, akamobherekera, “Oo omoona waane, bhooka!”

⁵⁵ Hayohayo, akörö ekamugarukera omuuke uyo, akimeerera. Yesu akabhabhoorera kubha, bhamuhe ebhiinyakure.

⁵⁶ Hano abhiibhori bhaache bharooche ghayo, bhaakaroghoora chwee. Niho Yesu akabharëki akabhabhoorera kubha, “Motamobhoorera mooto wowoose ghano ghakörëkiine.”

Yesu ^aghatoma abhatomu bhaache ikomi na abhabhere

(Mataayo 10:5-15; Maariko 6:7-13)

9¹ Orosiko rumu Yesu akabhabherekera abhatomu bhaache ikomi na abhabhere. Akabhaha obhotoro bho kuhëbha emisambu ghyose koru mo-bhaato, no obhotoro bho kuhöri amabhabharu ghoose. ² Akabhatoma, bhaghëndë kuraghaneri abhaato ang'ana e bhutëmi bho Ryobha, wiiki bhahöri abhabhabharu na koruusi emisambu.

³ Akabhabhoorera, “Motaghêgha gheghiro ghyokyose mo-rughëndö roonyu. Motiimoki himbo, koru morigho, koru ekiinyakure, koru chambiiri, koru changibho ibhere.

⁴ “Wiiki aka yoyoose ino moghusôha, mwikare muyo, mbagha orosiko ruure mookoru mo-kyaro kiyo. ⁵ Wiiki no omoghya wowoose uno abhaato bhataakobhaghênihî, mohoroke-mu, mwikong’ooto orotu runo roonyi mo-maghoroghaanyu. Gho ghukôra hang’u, ibhe ekyerekerei ghe ghotena ekiina kwo Ryobha.”

⁶ Niho abhatomu bhayo, bhaaghaye bharahetera mo-bhyaro. Mbaare bharabhoorera abhaato Ang’ana Anchömu, na kuhöri abhabhabharu haghirohamu na kuhêëbha emisambu ahaghiro hoose hano bhaghiire.

Yesu ^akamukôra Herote kunyaaka mo-körö

(Mataayo 14:1-12; Maariko 6:14-29)

⁷ Ghoose ghano Yesu are arakôra, omukangati Herote naare arooghu amang’ana ghaache. Ibheere ghaakamukôra ahahe, gho kubha, abhaato abhande mbaare bharabhugha kubha, Yesu niwe Yohana uno aryokiri koru mo-bhaku. ⁸ Abhande, mbaare bharabhugha kubha, n-omurööti Eriya uno akaacha wiiki. Mbaare-ho na abhande, bhano :bhaare bharabhugha kubha, n-umu o bharööti bha kare niwe aryokiri.

⁹ Niho, Herote akabhugha, “Yohana, niimariri komonunga omutu! Mbe, n-niwe, uyo nekooghu amang’ana ighoro yaache?” Mbe, Herote naare kwenda amorighi Yesu.

Yesu ^akaraagheri abhaato ebheku bhitaano

(Mataayo 14:13-21; Maariko 6:30-44; Yohana 6:1-14)

¹⁰ Abhatomu bhayo bha Yesu, hano bhagharokiri o-Yesu, bhakamobhoorera ghoose ghano bhaköriri. Akabhiimoki aghaye nabho abheene mo-moghya uno okobherekeru Bhetisaayita.

¹¹ Abhaato hano bhamanyiri kubha naaghiire yiire, bhakamotumbana. Akabhaghênihî bhoheene, aghasêëma kobheegi amang’ana gha bhutêmi bho Ryobha. Abhabharu akabhahöri.

¹² Eriibhagha re mughöröëbha eryobha rekabhooka ghosikera, abhatomu bhayo ikomi na bhabhere bhakaacha bhakamobhoorera, “Hano toonyi, ha-riiteregho. Nobharaghe, obhiisherereri abhaato bhano bhaghëndê mo-bhyaro bhino bheeniyi haghuhu, na mo-chaaka che haghuhu ne emeghondo, bhiibhonere ebhiinyakure na ha-komisi.”

¹³ Yesu akabhagharokeri, “Mobhahe inyu ebhiinyakure!” Bhakamugharokeri, “Itu totaghöötê gheghiro ghyokyose, amare ntoonyi na chaasu ibhere hang’u ne emighaate etaano. Nokwenda tughëndê tobhaghorere abhaato bhano bhoose ebhiinyakure?” ¹⁴ Mbe, mo-bhaato bhano :bhaare hayo, abhasubhe mbaare ebheku bhitaano.

Yesu akabhabhoorera bhaghëndi bhaache, “Bhabhabhoorere abhaato bhayo bhiiikare amakinda makinda, amakinda ghoose ghabhe gha abhaato miröngö etaano hang’u.” ¹⁵ Niho, bhaghakôra ke bhuno abharaghêriiri. Mbe, abhaato bhoose bhaghiikara.

¹⁶ Yesu akiimoki chaasu chiyo ibhere, ne emighaate ghiyo etaano. Akamööhî ighoro Mwishaaro, akabhugha, “Oghachömi Waryobha.” Niho aghaghesuura, akabhaha bhaghëndi bhaache, bhabhahe abhaato.

¹⁷ Abhaato bhayo bhoose bhakaraaghera, bhaghiighota. Bhaghakoma ebhiinyakure bhino bhisaaghiri, bhaghiichora ebhetonga ikomi na bhibhere.

Bheetero ^aghiishereri kubha Yesu niwe Kirisito

(Mataayo 16:13-28; Maariko 8:27-9:1)

¹⁸ Orosiko rumu, Yesu na abhaghëndi bhaache mbaare haghirohamu, bhiiyahwire. Yesu naare arasabha Eryobha. Akamara, akabhabhoori, “Abhaato mbakobhugha kubha eni neeni we?” ¹⁹ Bhakamugharokeri, “Abhande, mbakobhugha kubha iye niye Yohana Omubhatisaachi. Wiiki abhande, iye niye Eriya. Koru abhande kubha, iye n-omuröoti o kare uno aryokiri.”

²⁰ Yesu akabhabhoori wiiki, “Amare inyu kana, mokobhugha eni neeni we?” Bheetero akamugharokeri, “Iye niye Kirisito! Uno otomuru ne Eryobha!”

Yesu ^akaröota oroko rooche

²¹ Yesu akabharëki bhatamobhoorera mooto ang’ana iyo. ²² Akabhabhoorera, “Omoona o Omooto, nakwenderu anyakibhu chwee, na kwangu na abhagaruka bha Bhuyahuuti, na abhakoro bha bhachaama, na abheeghi bha meghiro. Naaghwitu, amare orosiko ro ghatato nakoryoka.”

²³ Akamara, Yesu akabhabhoorera bhoose kubha, “Omooto wowoose arenda kubha mughëndi waane, nakwenderu iyange omwene, aghëghë omusarabha waache chaasiko choose, antambane. ²⁴ Mbe, wowoose uno akwenda kobhotoori obhuhöru bhooche, iwe nakobhosireekereri obhuhöru bhooche. Wiiki wowoose uno aghosireekereri obhuhöru bhooche gho ghiri yaane, iwe nakobhotoori. ²⁵ Omooto, arabhöna ebheghiro bhyose bhe se yoose, amare ibhori hande ghwisirekereri omwene, naakubha abhwine bhwera ke?

²⁶ “Wowoose uno akondigheri chaasoni eni na amang’ana ghaane, niwe Omoona o Mooto woose akomorigheri chaasoni omooto uyo, hano akuucha kuucha mo-bhokumi bhooche, na mo-bhokumi bhwishe waache, na bho bhamarayika bhaache abhatöobhiyu.

²⁷ “Mbe, nekabhabhoorera gha hëënë kubha, ggate yiito bhano mwimeriire hano, mbaanyi-ho abhande bhano bhataaghoku, bhataamara bharighi obhutëmi bho Ryobha!”

Obhutëmi bho Ryobha ^bhokarighibhu o-Yesu

(Mataayo 17:1-8; Maariko 9:2-8)

²⁸ Chaasiko inyaanye chiiche koheta korwera hano asikiire amang’ana ghayo, Yesu akabhiimoki Bheetero, Yohana, na Yakobho, aghatiira nabho mo-gheghoro, gho ghiri asabhe Eryobha iyo.

²⁹ Hano ahikiri mo-gheghoro, aghasëëma ghusabha Eryobha. Hano are arasabha eghisösö ke bhosho bhooche gheghiiharura.

Amaghöoti ghaache, ghaakabha meero chayi, ghararëngaari chwee.

³⁰ Hayohayo, hakarwera abhaato bhabhere bharasiikera nawe, abhaato bhayo mbaare Musa na Eriya!

³¹ Nabho mbaarwiriire mo-bhokumi bharasiikera na Yesu ighoro e kohikeerani amenda gha Ryobha kwo roko rooche iyo Yerusareemu.

³² Eriibhagha riyo, Bheetero na abhaghëndi mbaare bhamisiri chandooro indito. Hano bhiitakiri, bhakamorighi Yesu ararëngaari mo-bhokumi bhooche. Bhakabharighi wiiki abhasubhe bhabhere, bhimeriire haghirohamu nawe.

³³ Eriibhagha bhayo bhabhere :bhaare bharaana na Yesu, Bheetero akamobhoorera, “Oo Omütëmi wiito! Ekabha bhoheene itu kubha hano. Twabhëké hano ebhebhuru bhitato kimu ghekeecho, ekende ke Musa, ne ekende ke Eriya.” Hano Bheetero asiikeriire ighoro e kwabhëka ebhebhuru, taamanyiri kino aghosiikera.

³⁴ Eriibhagha Bheetero are arasiikera ghayo, ighoro yaabho hakarwera erishaaro, rekabhakundekeri. Bhaghatiina chwee hano bhasöhiri Mwishaaro riyo. ³⁵ Koru Mwishaaro, hakarwera eriiraka, rerabhugha, “Uno niwe Omoona waane omwahoru waane! Momutëghëërë!”

³⁶ Eriiraka riyo riiche ghosira, abhaghëndi bhayo, bhakamorighi Yesu anyi omwene chiri. Ghayo ghoose :bharooche hayo, ibho bhaghakira taanyi-ho omooto abhabhoriiru mo-chaasiko chiyo.

Yesu ^akahëbha omusambu koru kwo moona

(Mataayo 17:14-18; Maariko 9:14-27)

³⁷ Hano bhokiire, Yesu na abhaghëndi bhaache bhayo bhatato bhaghiika koru mo-gheghoro, bhaghatëmëërana no obhoyo bhwaru bho bhaato.

³⁸ Ghate e bhaato bhayo, :haare no omooto umu uno atiiriri riiraka, akabhugha, “Oo omweghi, neghohusabha, omumööhëri omoona waane, niwe omoona waane omwene chiri. ³⁹ Noorighi, omusambu nohaamusöhërëra, omuköra akörë riireghe. Wiiki nohaabha oramukörëra eriirimo, ino eriihuru reramoru mo-monu. Nohaahenerera komunyaaki chwee, na tohaamotigha bhwango. ⁴⁰ Nebhasasaamiri bhaghëndi bhaacho kubha bhawuhëëbhë, amare bhataatoriri.”

⁴¹ Yesu akabhugha, “Inyu abhaato bha rwibhoro runo, rotaanyi no obhokumi, m-bhaato bhabhe chwee! Neghwikara na niinyu na kobhaghumereri mbagha nyingake? Murëëtë omoona waacho.”

⁴² Hano are aramohira hayohayo, omusambu uyo okamoghwishi haase omoona uyo, okamukörëra eriirimo. Niho, Yesu akawohiinya, akamuhöri omoona uyo, akamugharoki ghwi ishe.

⁴³ Abhaato bhoose, hano bharooche obhotoro obhokoro bho Ryobha, bhaakaroghoora chwee.

Yesu ^aghasiikera wiiki ighoro e roko roche

(Mataayo 17:22-23; Maariko 9:30-32)

Abhaato bhayo bhoose, hano :bhaare bhakeere bhararoghoora ighoro e maköri ghoose gha Yesu, akabhabhoorera abhaghëndi bhaache, akabhugha, ⁴⁴ “Amang’ana ghano nekobhabhoorera ibheere, mutëghë amatu. Omoona o Mooto naakwangu na kuhaanu mo-mabhökö gha bhaato.”

⁴⁵ Amare, ghayo Yesu abhabhooriire, bhataaghamanyiri, gho kubha ang’ana iyo neere ebhisuru ghokoobho, bhatayimanya. Bhaghatiina komobhoori ighoro eriing’ana riyo.

Yesu akeeghi ighoro e bhokoro

(Mataayo 18:1-5; Maariko 9:33-37)

⁴⁶ Ghate e bhaghëndi bha Yesu, hakarwera erihakaana, ighoro yaabho, niwe ghate yaabho omokoro ghokera abhaghëndi.

⁴⁷ Yesu akamanya amihëëbhö gha metema gheebho. Mbe, akiimoki omoona mosuuhu, akamwimeereri haguhe nawe, ⁴⁸ akabhabhoorera, “Omooto wowoose uno akamoghënëhi omooto o haase kinya omoona uno kwo riina reene, naakubha angënëhiri eni woose. Wiiki omooto uno aghongënihi, namoghënëhiri uno antomiri. Ibheere, omooto uno anyi mosuuhu ghate yaanyu bhoose, uyo niwe omokoro ghokera bhoose.”

Omooto owonde uno akoruusi omusambu

(Maariko 9:38-40)

⁴⁹ Yohana akamobhoorera Yesu, “Oo Omutēmi wiito, ntomorooche omooto uno are arahēebha emisambu kwo eriina reecho, tokamurēki, gho kubha iwe taanyi mughēndi wiito.” ⁵⁰ Yesu akamugharokeri, “Motamurēki wiiki! Omooto wowoose uno atakobhanga uyo mughēndi waanyu.”

Yesu ^akangu Samaariya

⁵¹ Eriibhagha re Yesu re ghugharuka Mwishaaro ndeere ^reeghating'i. Niho endiri ghuye Yerusareemu, aghatanura. ⁵² Aghatoma abharaghani bhamukangate. Hano :bhaare bharaghe, bhaghasōha mo-kyaro kimu ke Bhasamaariya, kubha bhamusēēmērē ahaghiro ha komisi na amang'ana aghande. ⁵³ Amare, abhiikari bhayo bhakanga komoghēnihi, gho kubha naare araghe Yerusareemu.

⁵⁴ Abhaanabheegha bhaache, Yakobho na Yohana, eriibhagha bharooche ghayo, bhakamobhoori, “Oo Omutēmi wiito, nokwenda tusabhe omororo wiike koru Mwishaaro obheeki bhasireekerere, [kebhuno Eriya akōriri]?”*

⁵⁵ Hano bhasikiire amang'ana ghayo, Yesu akabhisroreri akabharēki. [Akabhugha, “Moteeche n-kōrō engabhu moonyi nayo,] ⁵⁶ gho kubha Omoona Omooto tiichiri ghosireekereri chaakōrō che bhaato, amare niichiri ghochetoori.” Bhakaru hayo bhaaghaye mo-kyaro ekende.

Bhano bharēng'aniire kubha abhaghēndi bha Yesu

(Mataayo 8:19-22)

⁵⁷ Eriibhagha Yesu na abhaanabheegha bhaache :bhaare bharaghēnda mo-nchera, omooto umu akamobhoorera, “Oo omweghi hohoose hano oghuye, neghoghutambana!”

⁵⁸ Yesu akamugharokeri akabhugha, “Chaabhwe ncheenyi na chakoobho ne ebhinyōnyi mbenyi ne ebhenyumba. Amare Omoona o Mooto taanyi koru na ha ghotoora omutu!”

⁵⁹ Yesu akamobhoorera omooto owonde, “Untambane!” Omooto uyo akamugharokeri, “Oo Omutēmi, nonyisherereri singa neghi nemoryeke taata waane.”

⁶⁰ Amare Yesu akamugharokeri, “Tigha abhaku bharyeke abhaku bhaghēndi bhaabho. Amare iye, nooghi uraghaneri abhaato ang'ana ighoro e bhutēmi bho Ryobha.”

⁶¹ Wiiki omooto owonde, akamobhoorera Yesu akabhugha, “Oo Omutēmi, neghoghutambana. Amare singa onyisherereri, nighēndē nebharaghe abhaato bha mo-ka yaane.”

⁶² Yesu akamobhoorera, “Omooto wowoose uno amariri ghughōota eriishērē korema, amare ishoorori kumōōhi anyuma, uyo, takurēng'aanera kubha omutamishi mo-bhutēmi bho Ryobha.”

Yesu ^aghatoma abhaghēndi abhande mirōngō mohungate

10¹ Ache kumara ghayo, Omutēmi Yesu akaahura abhaghēndi abhande, mirōngō mohungate.* Akabhatoma bhabhere bhabhere, bhakangate mo-meghya na haghiri hoose, hano are endiri ghuye omwene.

*9:54 Mōōhi 2 Abhatēmi 1:10-12.

*10:1 **Mirōngō mohungate** Mo-mandeko aghande gha Keyunaani ngandekiri, akaahura abhaghēndi mirōngō mohungate na bhabhere.

²Yesu akabhabhoorera, “Omunöghö m-mwaru, amare abhaghësi m-bhasuuhu. Ibheere, musabhe omwene omoghondo, atome abhaghësi abhande mo-moghondo waache.*

³“Ibheere, mughëndë inyu. Mumööhi nekabhatoma kinya abhaana bha chang’öndu ghatēghate e chasuuche! ⁴Motiimoki ighöchi re chambiiri, koru morigho, koru ebhekwerā ebhēde. Hano mookubha mo-nchera, motakēēchēra gho ghukēeri abhaato.

⁵“Hano moghusōha mo-ka yoyoose, mukēeri abhaato bhaache hang’u, ‘Omurēmbē ubhe mo-ka ino.’ ⁶Arabha-mu omooto o murēmbē, omurēmbē uno mookubha momwitabhiiri, noghusaagha nawe. Amare, aribha ataanyi-mu omooto o murēmbē, omurēmbē waanyu nokobhagarukera. ⁷Motabha morasaama saama mo-chaaka chiyo mohikiire, amare, mwikare mo-chaaka chiyo mohikiire, mubhe moraraghera ebhiinyakure bhino bhabhaheere. Gho kubha omukōri o meremo nakurēng’āanera kuaabhu amareho ghaache.

⁸“Eriibhagha moghusōha mo-moghya nyarebhe, na abhiikari bhayo bhakabhaghēnihi, mori ebhiinyakure bhino bhaakubha bhabhaheere. ⁹Wiiki abhabhabharu bhano bhaanyi mo-moghya uyo, mobhahōri. Mobhabhoorere abhiikari bhayo kubha, obhutēmi bho Ryobha bhooghating’i.

¹⁰“Amare, eriibhagha moghusōha mo-moghya nyarebhe, na abhiikari bhange kobhaghēnihi, mohete mo-chanchera cheebho, morabhugha, ¹¹‘Koru orotu ro moghya waanyu runo roonyi mo-maghorō ghiito, tokarokong’oota, ibhe ekyerekereri ghe ghotena ekiina kwo Ryobha. Koru hang’u, mumanye obhuhēēnē kubha, obhutēmi bho Ryobha bhooghating’i!’ ¹²Nekabhabhoorera kubha, orosiko ruyō Eryobha reghotenera ekiina abhaato bha se, ndeghutēma abhaato bha moghya uyo kwo bhororo ghokera kebhuo aghutēma abhaato abhabhe bha Sotoma!”

Amacheeche mo-moghya uno otaghotukuuna

(Mataayo 11:20-24)

¹³“Horeera mookorigi inyu abhaato bha moghya o Korasiini! Horeera mookorigi inyu abhaato bha moghya o Bhetisaayita! Gho kubha ebheroghooro bhino :niikōriri ghokoonyu, aribha nengabhikōriiri mo-meghya ghe Tiiro na Sitooni, abhaato bha meghya ghiyo mbaaghatukuniire amasari ghaabho korwera hayo. Mbangeerekiri ghotukuuna koobho gho kobheeka amaghōōti gha maghonera, na kwihaka eribhu.” ¹⁴Gho ghayo, nekabhabhoorera kubha orosiko ro ghoteneru ekiina inyu moghoteneru ekiina ghokera emeghya ghe Tiiro na Sitooni!

¹⁵“Inyu, abhaato bha moghya o Kabherenawumu, kana mokwihēēbha kubha Eryobha ndekobhatiiri mbagha Mwishaaro? Tiyaanyi! Eryobha ndekobhiiki mbagha nyaari!”

¹⁶Akamara, Yesu akabhabhoorera bhaghēndi bhaache akabhugha, “Omooto uno akobhatēghēērera inyu, nantēghēriire koru eni. Omooto uno akobhanga inyu, koru eni ^naanyangiri. Wiiki uyo akonyanga eni, ^nakomwanga koru wuure antomiri.”

Abhaghēndi ^bhakamugharukera Yesu

¹⁷Bhaache kumara ghukōra emeremo ghiyo, abhaghēndi bhayo mirōngō mohungate bhaghagharura bharasiighasiigha. Bhakamobhoorera, “Oo Omutēmi wiito, koru emisambu ngetosookiri, hano toghihēēbhiri kwo riina reecho.”

*10:2 *Omunöghö, Abhaghësi* Omunöghö n-abhaato bhano bhaakwenda korekumi Eryobha. Abhaghësi n-abhaato bhano bhakuraghani Ang’ana e Ryobha. Omwene omoghondo n-Eryobha.

¹⁸ Yesu akabhagharokeri, “Nerooche Eriishambu reragho kinya orunanehi koru Mwishaaro. ¹⁹ Mbe, mumanye kubha, nebhaheere obhotoro bho ghokera changuru choose che mobhisa. Kwo bhotoro bhuyo, mooghutacha koru chanchöka ne ebhitaamooni, na ghetaanyi-ho gheghiro ghyokyose kino gheekobhanyahaara.

²⁰ “Koru hang’u, motasiighasiigha, gho kubha emisambu ngekobhasooka. Amare, mosiigheresiighere ang’ana ino, kubha amariina ghaanyu ngamariri kwandeku Mwishaaro.”

Yesu ^aghachömëru

(Mataayo 11:25-27, 13:16-17)

²¹ Eriibhagha riyo, Yesu aghachömëru chwee kwo bhotoro bho Körö Ahörëëru, akabhugha, “Oo taata, oghachömi, iye Omütëmi o Mwishaaro na ase yoose, gho kubha, amang’ana ghano, nobhabhisiri bhano bhaanyi na amang’iini na abhasömi, okabhahunyurera abhaato bha haase. Oo taata, hang’u nibhu eghuchömiire.” ²² Akamara akabhabhoorera, “Taata waane, naamariri ghotoora ghoose mo-mabhökö ghaane. Wiiki taanyi-ho uno amweche Omoona, n-Ishe omwene. Koru taanyi-ho uno amweche Ishe, n-Omoona omwene, na woose uno Omoona akwenda komohunyurera.”

²³ Hayohayo, Yesu akabhiigharurera abhaghëndi bhaache, akabhabhoorera abheene chiri gho kobhisa abhande, “Ng’oni inyu, gho kubha mookorighi amang’ana ghano kwo miisho ghaanyu! ²⁴ ^nekabhabhoorera, kubha mbaare-ho abharööti bhaaru, na abhatëmi bhaaru, bhano :bhaare bharighomba korighi ghano mookorighi inyu, amare bhatagharooche. Wiiki, ghano mokooghu inyu, mbaare bharighomba ghoghooghu, amare bhataghowire.”

Eghetubhaani ke Msamaariya omuhëëne

²⁵ Orosiko rumu, omweghi umu o meghiro ghe Musa akimeerera, akamobhoori Yesu eribhoori gho komusaki, akamobhoorera, “Oo omweghi, nikörë ke, nibhönë obhuhöru bho miishe ghyose?”

²⁶ Yesu akamugharokeri, “Neke kyandekuru mo-meghiro? N-ibhu oghoghisöma?” ²⁷ Akamugharokeri, “Ngyandekuru kubha, ‘Omosiighe Omütëmi, Waryobha waacho, kwo motema waacho woose, gho körö yaacho yoose, gho changuru cheecho choose, na kwo mang’iini ghaacho ghoose.*” ²⁸ Yesu akamobhoorera, “Oghagharokeri bhoheene! Köra hang’u, iye nookubhöna obhuhöru.”

²⁹ Amare, omweghi uyo o meghiro ghe Musa, naare kwenda kwereki kubha niishereriiru ambërë e Ryobha, nikyo ghighëriri akamobhoori Yesu, “Omwatani waane, n-niwe?”

³⁰ Yesu akamugharokeri akabhugha, “Naare-ho omooto umu Omuyahuuti, uno are koru Yerusareemu, naare mo-rughëndö ghuye mo-moghya o Yeriko. Hano are mo-nchera, aghatëmëërana na abhabhisa. Bhakamoruusi amaghööti, bhaakamutëma chwee, bhakamotigha anyi haghuhu ghoku.

³¹ “Orubhango ruchömu, mo-nchera iyo, akarëëta-ho omuchaama umu. Omuchaama uyo, hano amoroche omooto uyo, akaheta rubhareka aghaye.

³² Hang’uhang’u Omuraawi nawe, akahika hayo amang’ana ghaarweriire. Hano amoroche omooto uyo, akaheta rubhareka aghaye.

* 10:27 Mööhi Kohiita kwo Meghiro 6:5.

* 10:27 Mööhi Abharaawi 19:18.

³³ “Akamara akaacha Omusamaariya* umu, uno are mo-rughëndö rooche. Hano amorooche omooto uyo, akamoghwera bheghongi. ³⁴ Akamwishukerera, akamuraghura amaghaati ghaache gho ghoghatoorera amaghuta na adivaayi, aghaghabhöha amaghaati ghayo. Akamara akamotiiri ighoro e Tikere yaache, akamohira mo-nyumba e bhaghëni, akabha aramuraghura.

³⁵ “Atabhoori yaache, akaruusi mo-mosuku chaatinaari* ibhere, akamuha omwene anyumba akabhugha, ‘Omumööhëri omooto uno. Wiiki omundaghurere, chambiiri cherakera chino nekoheere gho ghiri yaache, neraacha ghugharuka, neeghokoreha.”

³⁶ Niho, Yesu akamobhoori omweghi uyo o meghiro ghe Musa, “Mbe! Gho korighi koocho, hano omooto uyo anyahaaruru na abhabhisa, niwe ggate e bhaato bhayo bhatato, are omwatani gho komukörëra amachömu?” ³⁷ Akamugharokeri, “Uno amoghweriire bheghongi.”

Yesu akamobhoorera, “Nooghi, na niye ubhe na atëëmö iyo iyo!”

Yesu mo-nyumba e Marita na Mariyamu

³⁸ Yesu na abhaghëndi bhaache, hano :bhaare mo-nchera, bhaghasöha mo-kyaro kimu. Omukari umu, eriina reeche Marita, akabhaghënëni mo-ka yaache. ³⁹ Marita uyo, naare no omoobho akobherekeru Mariyamu. Eriibhagha riyo, Mariyamu aghiikara haghuhe na amaghoru gha Mutëmi Yesu, aramutëghëërëra.

⁴⁰ Marita, naare aranyaaka gho ghuköra emeremo myaru. Akamutambana Yesu, akamobhoorera, “Oo Omutëmi wiito, tookorighi kobhe kubha omwito nantighiire nikörë emeremo ghyose eni mwene? Mbe, nomobhoorere ache antoori!”

⁴¹ Amare Omutëmi akamugharokeri, “Oo Marita, Marita! Nokunyaaka no okwirighora gho ghiri ebheghiro bhyaru. ⁴² Amare neenyi-ho ang’ana imu hang’u ino ekwenderu, wiiki n-ehëënë ghokera ghoose. Mariyamu niyo ahwire, ghutëghëërëra ang’ana yaane ino atakoruusibhu na mooto.”

Ameeghi ighoro e ghusabha Eryobha

(Mataayo 6:9-13, 7:7-11)

11 ¹ Orosiko rumu, Yesu naare arasabha Eryobha ahaghiro nyarebhe. Hano amariri ghusabha, umu o bhaghëndi bhaache akamobhoorera, “Oo Omutëmi, notweghi ghusabha Eryobha, kinya Yohana Omubhatisaachi eghiri bhaghëndi bhaache.”

² Yesu akabhaborera, “Hano mookubha morasabha Eryobha, mubhe morabhugha hang’u,

‘Taata [wiito uno onyi Mwishaaoro], eriina reecho reghongibhu.

Obhutëmi bhoocho bhuuche, [amiigha ghaacho ghahikeerane hano mo-se kinya iyo Mwishaaoro.]

³ Otuhe chaasiko choose amenda ghiito.

⁴ Otwabhere amasari ghiito,

kinya tokwabhera bhano bhaghotutaasari.

Wiiki otatusöhi mo-masaki [amare ototoori no omobhisa wuure].”

⁵ Akamara Yesu akabhaborera, “Hamwabhe tobhughe ggate yaanyu, umu naanyi na musaani waache. Akamutambana obhotiko bho ggate, akamobhoorera,

*10:33 *Omusamaariya* Abhayahuuti mbaare bharabhataraha Abhasamaariya, gho kubha mbaarooche kubha Abhasamaariya mbaare bharasëngëra Eryobha gho nchera ino etaanyi-yo. Amatöngö ghanu abhere ngaare gharëghiine chwee.

*10:35 *Chaatinaari* Atinaari n-orobhiiri ro Keruuni runo :bhaare koreha omutamishi kwo moremo orosiko rumu.

‘Oo musaani! Neghusabha asiire e mighaate etato. ⁶Nehikiiru na musaani waane naare mo-rughëndö, na ntighoote ekiinyakure ghe komuha.’

⁷“Amare, musaani waache akamugharokeri, ‘Otanyaaki! Kana nimariri ghwighara orwighe! Eni na abhaana bhaane ntomisiri. Kwi bheere nteeghotori kobhooka ghokuha gheghiro ghyokyose.’

⁸“Mbe, nekabhabhoorera, nangabha omooto uyo angiri kobhooka na komuha emighaate gho kubha iwe musaani waache, amare gho kubha naahëneriire komusabha takuure mukörö, musaani waache uyo nakobhooka na komuha ghyokyose kino akwenda.

⁹“Mbe, na neeni nekabhabhoorera, musabhe mokuhaabhu, mutabhare mookubhöna, moraköng’ööta eghiseku moghwighoreru. ¹⁰Ibheere, mooto woose uno aghusabha, naakuhaabhu. Omooto woose uno aghutabhara, nakubhöna. Wiiki mooto woose uno aghuköng’ööta eghiseku, naghwighoreru.

¹¹“Niwe omwibhori ghate yaanyu, uno omoona waache aramusabha asu, naakomuha anchöka? ¹²Hamu aramusabha eribhurunge, hëéné naakomuha eghitaamooni? ¹³Nangabha inyu mooni bhaato bhabhe, mweche kobhaha abhaana bhaanyu ebheghiro bhichömu. Mbe! Taanyi hëéné kubha, Taata waanyu o Mwisharo naaghuköra ghokera hayo? Wiiki naakobhaha Akörö Ahörëeru bhano bhakomusabha!”

Yesu na Bherisebhuuri

(Mataayo 12:22-30; Maariko 3:20-27)

¹⁴Haare no omooto umu uno are no omusambu, uno ore omuköriri kubha rimuumu. Yesu akawuhëebha omusambu uyo. Hano omusambu uyo omoruure, aghasëema ghosiikera wiiki. Obhoyo bho bhaato bhano :bhaare hayo, bhaakaroghoora chwee.

¹⁵Amare, abhaato abhande bhakabhugha, “Kana nakuhëebha emisambu kwo bhotoro bho Bherisebhuuri,* omokoro o misambu!” ¹⁶Abhande mbeendiri komusaki Yesu, bhakeenda abheereki ekimanyenkereri koru Mwisharo.

¹⁷Amare, gho kubha Yesu naamanyiri amihëebhö ghaabho, akabhabhoorera, “Obhutëmi bhobhoose, bhorataana, mboghugho. Hang’u hang’u, anyumba yoyoose, erataana, nekuhaanyuka. ¹⁸Hang’u hang’u Eriishambu, reriyaanga eryene, obhutëmi bhooche nibhu bhoghuköra bhwimeererere?

“Nebhabhooriri eribhoori riyo, gho kubha mokobhugha kubha nekuhëebha emisambu kwo bhotoro bho Bherisebhuuri. ¹⁹Mbe! Aribha eni nehahëebha emisambu kwo bhotoro bho Bherisebhuuri, abhaghëndi bhaanyu nabho, mbaghoghiehëebha kwo bhotoro bhawawe? Gho ghayo, ibho nibho bhakuucha kobhatenera ekiina inyu. ²⁰Amare, aribha eni nekuhëebha emisambu kwo bhotoro bho Ryobha, n-ihëéné kubha obhutëmi bhooche mbumarisi kobhahikera.

²¹“Mutëghëerë, eghetubhaani kino! Eriishambu kinya mooto o changuru uno ibhöhiri ebhiroonero, arachonga ebheghiro bhe mo-nyumba yaache, ebheghiro bheeche bhiyo mooto taakobheturi. ²²Amare, omooto owonde uno akamokeri changuru, araacha komuroona, naakomokinda. Naakomuhöka ebhiroonero bheeche bhyose bhino are aritëng’ëra, ne ebheghiro bhe mo-nyumba yaache na kobhiehöhi abhande.

²³“Omooto wowoose uno ataanyi haghirohamu na neeni nakonyanga eni. Wiiki, wowoose uno ataaghokoma abhaato haghirohamu na neeni na kobhahira kwo Waryobha, naghusanchi.”

* 11:15 *Bherisebhuuri* kwo riina erende n-Eriishambu.

Ghugharuka kwo musambu

(Mataayo 12:43-45)

²⁴ “Hano omusambu ohaamoru omooto, nohinaraanaara mwibhara, oratabhara ha koweerera. Eriibhagha okobhori, obhugha, ‘Mbe, neghugharuka haare haare, mo-nyumba yaane.’ ²⁵ Hano oghugharuka haare, ubhönö anyumba itarekiri na ghusëemibhu bhoheene. ²⁶ Hayo hayo, oghi urëëta emisambu mohungate ghino emebhe chwee ghokera ryo. Ghiyo ghyose, ngekomusöhërëra omooto uyo, ghimanya mo-mobhere waache. Gho ghayo, antenero, erimënya re mooto uyo ribha ibhe chwee ghokera erimberere.”*

Ghuchömëru kwo bhuhëënë

²⁷ Hano Yesu are arasiikera amang’ana ghayo, mo-bhoyo bho bhaato bhayo, naare-mu omukari umu uno atiiriri riiraka reeche, akabhugha, “Ng’oni omukari uno akwibhwire na ghoghughööki!”

²⁸ Amare Yesu akabhugha, “Mbitabhiiru ghokera bhano bhakooghu Ang’ana e Ryobha na koyesooka!”

Abhaato ^bhakamusabha Yesu ekimanyenkereri

(Mataayo 12:38-42; Maariko 8:12)

²⁹ Hano abhaato :bhaare bharamwikomera, Yesu akabhugha, “Abhaato bha rwibhoro runo m-mbabhe chwee moonny! Moghusabha ekyerekereri koru ghokoone. Amare ghetaanyi-ho kino mokuhaabhu, nanyinga kiire ke Murööti Yoona. ³⁰ Ibheere gho kubha Yoona are ekimanyenkereri kwo bhaato bha moghya o Ninaawi, nibhu Omoona o Mooto woose, akubha ekimanyenkereri kwo bhaato bha rwibhoro runo.

³¹ “Orosiko ro ghoteneru ekiina, marikiya o ribhaara re bhachuuta nakwimeerera, na kobhatenera ekiina abhaato bha rwibhoro runo. Mbe, gho kubha, marikiya uyo, :naaköriri orughëndö koru ase e kure chwee, gho ghiri atëghëërë amang’ana gha sooko gha Seremaani. Ibheere, hano haanyi no omokoro ghokera Seremaani, amare inyu motakwenda ghuye komutëghëërëra!

³² “Wiiki, orosiko ro ghotena ekiina abhaato bha moghya o Ninaawi mbakwimerera haghirohamu na abhaato bha rwibhoro runo na kobhatenera ekiina kubha mbaköri bha masari moonny. Neekubha hang’u gho kubha, abhaato bha Ninaawi :mbatukuniire amasari ghaabho eriibhagha bhoghwire Yoona araraghani Ang’ana e Ryobha. Amare ^nekabhabhoorera inyu kubha hano naanyi-ho umu omokoro ghokera Yoona.”

Atara e mobhere n-amiisho

(Mataayo 5:15, 6:22-23)

³³ “Taanyi-ho mooto uno aghughööti atara, amara ayebhisa hande ayehunya ne egheghiro. Mbe nakoyetooro ighoro e ghesungo, kubha hano abhaato bhaghusöha mo-nyumba, bhatore korighi emirëngaari gheeche.

³⁴ “Amiisho ghaanyu, nigho atara e mobhere. Mbe, aribha amiisho ghaacho ghaanyi mahöru, ngakurëngaari omobhere waacho woose. Amare, amiisho ghaanyu gharabha ghasarekiri, omobhere waacho woose nookubha wichwire ekeng’uuri. ³⁵ Mbe, numööhi emirëngaari ghino gheenyi moose yaacho, ghetaacha

* 11:26 Omooto uno Eriishambu remoruure nanga kinya anyumba ino enyi bhoowa. Ibheere oranga kuha omweya uyo Akörö Ahörëru yikare-mu, Erishambu ndeghugharuka na abhaghëndi bhikare mo-mweya uyo.

kubha ekeng'uuri! ³⁶ Aribha omobhere waacho woose noonyi ne emirëngaari, toonyi ne ekeng'uuri ghyokyose, nokurëngaari, kinya atara ino eghokomorekera.”

Yesu akabhashaang'i Amabharisaayo na abheeghi bha meghiro

(Mataayo 23:1-36; Maariko 12:38-40; Ruuka 20:45-47)

³⁷ Ache kumara kobhugha ghayo, Omubharisaayo umu akamoghënihi Yesu aghi kuraaghera mo-ka yaache. Yesu aghasöha, aghiikara mo-ndaagera.

³⁸ Omubharisaayo uyo, akaroghoora korighi kubha Yesu akaraaghera ataamara ishaabha amabhökö.*

³⁹ Amare, Omutëmi akamobhoorera, “Inyu Amabharisaayo na abheeghi bha meghiro, moheeghi eghisëenchö ne ekehoncho gho nche. Amare moose e metema gheenyu, ngichwire amahöki na amabhe. ⁴⁰ Inyu mbaghëëghë moonyi! Ure atëëmiri bhe nche, taanyi we wiiki, atëëmiri bhe moose? ⁴¹ Mbe, mobhakörërë amachömu abhababhe gho kobhaha bhino bheenyi moose e bhisëenchö ne ebhehoncho bheenyu, niho bhyose bheekubha bhichömu ghokoonyu.

⁴² “Horeera mookorighi, inyu Amabharisaayo. Mokuuusi eribhaara ri ikomi re bheghiro bhyose, koru chaanyi, ebherongero, ebhetunguru, ne ebhende, amare motaaghotereera obhuhëënë no obhosiighi kwo Ryobha. Amang'ana ghayo ngendiiru mubhe moraghatereera, wiiki moteebhu obhosiighi no obhuhëënë bho Ryobha.

⁴³ “Horeera mookorighi inyu Amabharisaayo, gho kubha mosiighiri ghwikara ebhetumbe bhe bhakoro mo-chanyumba che Eryobha, wiiki mosiighiri ghukëëribhu gho sooko mo-mitëëra. ⁴⁴ Horeera mookorighi inyu, gho kubha mukwambheera chino chetaakorighibhu, chino abhaato bhakoheta ighoro yaache bharchitacha koru bhateche aribha chambeehera cheenyi hayo.”

⁴⁵ Omooto umu, mo-bheeghi bha meghiro ghe Musa akamugharokeri Yesu akabhugha, “Omweghi, hano ukobhugha amang'ana ghayo, nooghotuchöngëra wiiki na niitu.”

⁴⁶ Yesu akamugharokeri, “Inyu abheeghi bha meghiro, horeera mookorighi! Bhano moghwitweki abhaato emerigho merito ghe meghiro. Inyu, motakobhatoori ghoghighegha koru ne kyara! ⁴⁷ Horeera mookorighi! Bhano mokwabhëka chambeehera inçömu che bharöoti, amare bhiiso nibho bhabhiitiri abharöoti bhayo! ⁴⁸ Gho ghuköra hang'u, mokuwerekubha moghwishererani na ghano bhasookoro bhaanyu :bhaaköriri. Ibho :mbiitiri abharöoti bhayo, inyu mokwabhëka chambeehera cheebho.

⁴⁹ “Nikyo ghiighëri Eryobha rekabhugha hang'u kwo mang'iini ghaache, ‘Nekobhatomera abharöoti na abhatomu. Amare, abhamu mbakobhiita, na abhande mbakobhanyaaki.’ ⁵⁰ Gho ghayo, abhaato bha rwibhoru runo, amasaaha gha bharöoti bhoose ghano ghiitekeri, ngaakubha ighoro yaabho, koru simoka e se, ⁵¹ korwera amasaaha gha Abheeri, mbagha amasaaha gha Sakariya* uno ituru mo-Risëngëro re Ryobha ghate e meeche e koruuseri amaruusi na ahaghiro Ahasooku. Hëënë, nekabhabhoorera kubha, abhaato bha rwibhoru runo ngaakubha ghokoobho ghayo ghoose.

⁵² “Horeera mookorighi, inyu abheeghi bha meghiro, gho kubha moribhiri anchera ino abhaato bhagamanyiri Eryobha, na niinyu bheene, motaghusöha-ho. Wiiki bhaare :bhaare kwenda ghusöha-mu, mookabhareki.”

* 11:38 *Ishaabha amabhökö* Hano bhaakobhugha naaraghiire atishaabhiri amabhökö, n-kubha neere asughara e Abhayahuuti kweghi amabhökö kinya gho komusa.

* 11:51 Mo-Mandeko Amatöobhiyu gha Bhayahuuti, uno akuure ekimbërë naare *Abheeri*. Na uno akuure ekeenyuma, naare omuröoti *Sakariya*. Ghayo, noghoghasöma mo-ghitabhu ghe Simoka 4, na 2 Amang'ana gha Riibhagha 24:20-22.

⁵³Hano Yesu are araru hayo, Amabharisaayo, na abheeghi bha meghiro, bhaghasëema komuhaarera chwee. Bhakamobhoori amabhoori maaru, ⁵⁴kubha bhabhönë komughöota kwo mang’ana ghaache.

Ameeghi ighoro e bhuröngö

(Mataayo 10:26-27)

12¹Eriibhagha riyo, ebheku bhe bhaato mbaare bhikomiine, kerende bhaakabha bharatachana.

Yesu aghasëema kobhabhoorera bhaghëndi bhaache singa arabhugha, “Mwichonge no obhuröngö bho Mabharisaayo, gho kubha obhuröngö bhuyo mbonga obhotu bho kemera. Oriimoki obhotu bhuyo bhosuuuho otoore mo-bhotu, obhotu bhoose mbooghutöta. ²Ghyokyose kino ghekundekiiru ngekohunyuru, na kino kebhisuru ngeghotooru haheero. ³Kino kyose ghighamburu mo-keng’uuri, ngeghutëghëërëru haheero. Wiiki kino musëmiini mo-bhyumba, ngaghosiikeru kwo riiraka ikoro ighoro ebhisara bhe chanyumba.”

Uno ^akurëëng’anera ghotiinu

(Mataayo 10:28-31)

⁴“Mbe, ^nekabhabhoorera inyu bhasaani bhaane, motabhatiina bhano bhaghwita omobhere. Bharamara kobhiita, bhataaghotora ghuköra ng’ana yende ghokera iyo. ⁵Amare, nekobhereeki uno moghotora ghotiina. Motiine Eryobha, gho kubha reramara ghwita omooto, ndeenyi no obhotoro bho komurëkëra mwiribha re mororo. Mbe, uyo niwe momotiine.

⁶“Kana! Ebhinyonyi bhitaano, tigha mbehaaghoru kwo riighori isuuhu chwee.*” Koru hang’u, ghetaanyi-ho koru kimu kino Eryobha rekwebhu. ⁷Amare inyu, mooni no bhweru bhokoro ghokera ebhinyönyi bhyaru! Koru chanchweri che mitu gheenyu, nchibharuru. Gho ghayo, motatiina.”

Komwishereri Yesu ambëre e bhaato

(Mataayo 10:32-33, 12:32, 10:19-20)

⁸“Mbe, ^nekabhabhoorera kubha, mooto woose uno ^akonyishereri ambëre e bhaato, Omoona o Mooto woose naakomwishereri ambëre e bhamarayika bha Ryobha. ⁹Wiiki, omooto woose uno akonyanga ambëre e bhaato, na neeni neekomwanga ambëre e bhamarayika bha Ryobha. ¹⁰Wiiki Eryobha ndeghotora kobhaabhera abhaato bhano bhakwanga Omoona o Mooto, amare retaaghotora kobhaabhera abhaato bhano bhakwanga Akörö Ahörëëru.

¹¹“Hano mokohiru mo-chanyumba che Ryobha, na ambëre e bhakangati, na mo-bhanangwa, koru hang’u motanyaaka ighoro e ghano mokobhugha gho ghwitachura. ¹²Motanyaaka gho kubha, eriibhagha riyo, Akörö Ahörëëru nekobheeghi amang’ana ghano ghakwenderu kobhugha.”

Eghetubhaani ke mwame omughëëghë

¹³Mo-bhoyo bhuyo bho bhaato, omooto umu akamobhoorera Yesu akabhugha, “Oo omweghi, nobhoorere omwito, ahööhi aghabho ino taata atotighiire.”

¹⁴Yesu akamugharokeri, “Niwe antooriri nibhe omoteni o kiina, hamu omuhööhi o ghabho ghate yaanyu?” ¹⁵Akamara Yesu akabhabhoorera abhaato bhayo, “Mwimohereru! Mwichonge na atëëmö e bhwichomberu bho bheghiro, gho

* 12:6 *Ebhinyonyi bhitaano* Ebhinyonyi bhiyo mo-chabhiibhuriya echende ncheekobhugha, amashomoro. Amashomoro ghayo n-eriina re bhinyönyi.

kubha, obhuhöru bho mooto, bhotakorwera mo-bhwaru bho bheghiro bheeche bhino anyi nabhyo.”

¹⁶ Akamara Yesu akabhabhooorera eghetubhaani arabhugha, “Haare-ho omwame umu, uno omoghondo waache ore unöghiri chwee. ¹⁷ Akibhoori mo-motema waache akabhugha, ‘Nibhu nguköra ibheere? Ntighööté ahaghiro hohoose hano neghotoora omunöghö waane!’

¹⁸ “Akamara akabhugha, ‘Neghuköra hang’u. Neekuhanyura ebhitara bheene, nyaabhëké eritara erende ikoro ghokera bhino. Neghotoora-mu omunöghö waane woose, ne ebheghiro bheene ebhende. ¹⁹ Ndamara neekwibhooorera mo-motema waane, “Ibheere noonyi ne ebheghiro bhyaru bhichömu bhino witoriire amamba. Mbeghohwisha kwo meeka myaru! Mbe noweere, uraaghere na kunyo, uchömëru!”

²⁰ “Amare, Eryobha rekamobhooorera, ‘Iye mughëëghë onyi! Obhotiko bhuno bho reero, nooghoku! Ibheere ebheghiro bhiyo witoriire, mbeekubha bhyawe?”

²¹ Hang’u ekuucha kubha, kwo mooto wowoose uno akwinyaaki gho ghwikomera na ghwitoorera obhwame bho mo-se ino, amare taanyi gho ghwitoorera obhwame kwo Ryobha re Mwisharo.

Ameeghi ighoro e kunyaaka

(Mataayo 6:25-34)

²² Akamara Yesu, akabhabhooorera abhaanabheegha bhaache, “Motanyaakera eriimënya reenyu, kubha neke mookure, hamu kubha neke mokobheeka. ²³ Wiiki obhuhöru mbooghokera ebhiinyakure, omobhere woose, nooghokera amaghöoti.

²⁴ “Mwituuri eghetubhaani ke makoouruko. Ghataheemi koru ghatahaatu, ghataanyi na amamba koru ghitaru, amare Eryobha ndehagharaagheri. Inyu moonyi no bhweru bhokoro chwee ghokera ebhinyönyi! ²⁵ Niwe ghokoonyu uno aghotora gho kwinyaaki kooche, kwiyengera obhuhöru bhooche koru gho sa imu?” ²⁶ Mbe! Aribha motaaghotora ghuköra koru ang’ana isuuhu ke iyo, ngwake mokwinyaaki ighoro e ghayo aghande?

²⁷ “Mwituuri ebhibhari, kinya bhokubhari na kumëra. Bhetaaghuköra moremo na bhetaghwitumera maghöoti. Koru hang’u, nekabhabhooorera kubha, Seremaani mo-bhwame bhooche bhoose, taabhishuru bhoheene kinya rimu re bhibhari bhiyo. ²⁸ Mbe, aribha Eryobha ndehabheeki amanyaaki ghi ibhara, koru nangabha ghaanyi-ho reero, na tabhoori ngaghotooru mo-mororo, ibheere, nibhu aghuköra atighe kobhabheeki inyu ghokera ebhibhari bhiyo? Neke obhokumi bhoonyu bhoonyi bhosuuhu!

²⁹ “Mbe, motabha moranyaakera kubha mookure ke, hamu mookunyo ke. Motabha morinyaaki ighoro e ghayo. ³⁰ Abhaato bhano bhateeché Eryobha, mbahanyaakera chwee ebheghiro bhino. Amare inyu, Iso waanyu uno anyi Mwisharo neeché bhoheene kubha mokobhyenda. ³¹ Gho ghayo, mutabhare singa obhutëmi bho Ryobha, iryo ndekobhengereereri ghayo aghande.”

Obhwame bho Mwisharo

(Mataayo 6:19-21)

³² “Motatiina, inyu erikinda isuuhu, gho kubha Iso waanyu uno anyi Mwisharo nasiighiri kobhaha obhutëmi bhooche. ³³ Mbe, moghori ebheghiro bheenyu, mobhaha abhahabhe. Mwitoorere amaghöchi ghano ghataaghokunguha, mubhe na mamba ino etaaghosuuha Mwisharo, hano omwibhi atakohika, koru ebhebhongi

* 12:25 *Eriimënya reeche koru gho sa imu* Kwo riibhagha erende ngooghotora kubha, *kwiyengera obhure bhooche koru gho kubhökö kumu?*

bhetakobhongi. ³⁴ Ahaghiro hano moghotoora amamba yaanyu, niho ne emetema gheenyu gheekubha-ho.”

Mwikare ^mwisëemiri

³⁵ “Mwikare moraghanya, mubhe mwisëemiri, na chaatara cheenyu, chibhe cheraaka. ³⁶ Mubhe kebhuno abhaato bhano bhaghughanya omutëmi waabho agharuke koru mwikwirera, kubha araacha na ghuköng’ööta eghisëku, bhabhe bhisëemiri hayohayo komwighorera. ³⁷ Ng’oni abhasësë bhano omutëmi waabho akobhabhöna bharamughanya, hano akuucha, ^nekabhabhoorera gha hëënë kubha, naghwitëma omunaso, naghusesëma kobhahökëri, na kobhaghënihi mo-bhiinyakure. ³⁸ Ng’oni abhatamishi bhano Omütëmi waabho aragharuka obhotiko bhooghate, hande atabhoori churi, na kobhabhöna bhisëemiri. ³⁹ Mbe, mumanye bhoheene ang’ana ino, omwene anyumba, nangamanyiri eribhagha rino omwibhi akuucha, nangisëemiri ghochonga, no omwibhi tangasöhiri mo-nyumba yaache. ⁴⁰ Gho ghayo, inyu, mubhe mwisëemiri, gho kubha Omoona o Omooto, nakuucha kwo eribhagha rino motitëng’iire.”

Omutamishi omuhëënë, na uno ataanyi omuhëënë

(Mataayo 24:45-51)

⁴¹ Ibheere, Bheetero akamobhoori Yesu, “Omutëmi, eghetubhaani kino notobhoiriire itu bheene, ghasi na abhaato bhoose?”

⁴² Omütëmi akamugharokeri, “Niwe omutamishi omuhëënë uno anyi na amang’iini? Ure omütëmi waache akomotoora ighoro e abhatamishi bhaghëndi bhaache, aghi arabhaha ebhiinyakure kwo riibhagha reeche. ⁴³ Neekubha ng’oni kwo mutamishi wuure omütëmi waache aragharuka koru mo-rughëndö, amubhöne araköra hang’u. ⁴⁴ ^Nekabhabhoorera gha hëënë kubha, omütëmi waache naakomüköra, omwimeerereri o ebheghiro bheeche bhyose!

⁴⁵ “Amare, omutamishi uyo arisiikerera mo-motema waache, ‘Omutëmi waane aghakeechera ghugharuka.’ Ibheere, asëëmë kobhatëma abhatamishi bhaghëndi bhaache, abhasubhe kwo bhakari. Wiiki asëëmë kuraaghera na kunyo, na kurëëwu. ⁴⁶ Omütëmi waache araacha ghugharuka koru mo-rughëndö, nakuucha orosiko runo omutamishi waache atitëng’iire ne eribhagha rino ateeche. Omütëmi naakomonunga nunga, na komotoora ahaghirohamu na bhaato bhano bhataaghokumi.*

⁴⁷ “Omutamishi uno amanyiri amenda gha Omütëmi waache, amare tisëemiri koru ghoghaköra nakuröönu chwee. ⁴⁸ Amare, omutamishi uno atamanyiri amenda gha mutëmi, aghaköra ghano gharëng’aniire kuröönu, iwe nakuröönu hasuuu hang’u. Omooto uno ahaabhuru bhyaru, naghusabhu bhyaru wiiki.”

Yesu ^aghaghëri abhaato bhaghataana

(Mataayo 10:34-36)

⁴⁹ “Eni, niichiri ghughöoti omororo mo-se. Nengendiri nerighi omororo uyo umariri ghwaka! ⁵⁰ Wiiki eni mwene, nirëng’aniire nehetere obhubhatiiso* bhuno bhookwenderu nibhatiisu. Anyaako ino neenyi nayo n-inkoro chwee, mbagha obhubhatiiso bhuyo bhohikeerane. ⁵¹ Kana, moghwituuri kubha niichiri mo-se kurëëta omurëmbë? Mbe, tiyaanyi! ^nekabhabhoorera kubha, niichiri ghutaani abhaato. ⁵² Korwera ibheere, mo-nyumba e bhaato bhataano, bhatato

* 12:46 *Abhaato bhano bhataanyi abhahëënë* Kwo riibhagha erende mbaaghotora kubha, *abhaato bhano bhataaghokumi Eryobha.*

* 12:50 *Obhubhatiiso* bhuyo n-obhubhatiiso bho nyaako.

mbaaghutaana na bhabhere. Bhabhere nabho, mbaaghutaana na bhayo bhatato. ⁵³Ishe, naghutaana no omoona waache, no omoona woose, naghutaana ni ishe waache. Nyina, naghutaana no omuuke waache, omuuke naghutaana na nyina waache. Nyina bhiyaara naghutaana, no omuku, omuku naghutaana na nyina bhiyaara.”

Kumanya eribhagha

(Mataayo 16:2-3)

⁵⁴Yesu akabhabhoorera obhoyo bho bhaato bhayo :bhaare hayo, “Hano mohaarighi erishaaro rerarwera anyancha, hayo hayo mobhugha, ‘Ambura neghutëëka.’ Itëëka. ⁵⁵Hano mookorigi obhukama bhorarwera bhachuuta, hayo mobhugha, ‘Amaaho eghatora.’ Wiiki hang’u ekubha. ⁵⁶Inyu mbaröngö moonyi! Mokumanya bhoheene ebhyereki bhe se. Mbe! Ngwake kana mokwanga kumanya ekyerekereri ke amang’ana ghano ghaakorwera chaasiko chino?”

Obhoghwani na abhabhisa bhaacho

(Mataayo 5:25-26)

⁵⁷“N-ghwake motaaghotora ghwishererani inyu bheene, ghuköra ang’ana anchömu ino moghotora ghuköra? ⁵⁸Hano omuchöngëri waacho aghokohira mwibharacha, wiiköng’i koghwana nawe eribhagha mokeere mo-nchera. Aribha taanyi hang’u, naaghokohiki ambërë e omoteni o kiina. Omoteni o kiina uyo, naaghokohira mo-bhaashirikare, nabho mbaghoghüsöhi mwighërëcha. ⁵⁹Neeghokobhoorera gha hëënë kubha, tokohoroka moose, mbagha hano okubha orehiri anchagho yoose!”

Motukuunere amasari motasireekerera

13 ¹Eribhagha riyo, abhaato abhande bhakaacha bhakamuha Yesu amang’ana gha Bhaghariraaya bhano Bhiraato itiri hano :bhaare bharaghöögga chaatugho cheebho che kuhëërana ambërë e Ryobha.

²Yesu akabhabhoorera, “Kana, moghwituuri kubha Abhaghariraaya bhayo mbaakuure hang’u gho kubha mbaare na amasari ghokera Abhaghariraaya abhande bhoose? ³ˆNekabhabhoorera taanyi hang’u! Moranga ghotukuunera amasari ghaanyu, hang’u hang’u kuru inyu moghosireekerera bhoose.

⁴Mohiite abhaato bhaare ikomi na bhanaane bhano bhaghweriiru no omunara iyo Sirowamu. Kana, moghwituuri kubha ibho nibho :bhaare na amasari ghokera abhiikari abhande bhoose bha Yerusareemu? ⁵ˆNekabhabhoorera tiyaanyi! Moranga ghotukuunera amasari ghaanyu, hang’u hang’u inyu bhoose moghosireekerera!”

Eghetubhaani ke mote uno otaakobhyara amakorobhese

⁶Akamara, Yesu akabhabhoorera abhaato bhayo eghetubhaani, arabhugha, “Naare-ho omooto umu uno emiri omote uno okobherekeru omotiini, mo-moghondo waache. Akamara, akaacha ghutabhara amakorobhese, amare taaghabhwine. ⁷Ibheere, akamobhoorera omutamishi o moghondo uyo akabhugha, ‘Mööhi! Ibheere neenyi ne emeeka etato neraacha ghutabhara amakorobhese mo-mote o motiini, kuru ntiimara mböna ghyokyose! Mbe nowonunge, otiikara orasari eriiröbhë bhoowa.’

⁸“Amare, omutamishi uyo akamugharokeri, ‘Omutëmi, nowotighe omooka uno, neworemere na kowotorera asururuuta. ⁹Ibheere aribha oghasönga amakorobhese omooka uno okuucha, n-kumangi! Oranga ghusönga, mbe towonunge.”

Yesu ^akamuhōri omukari orosiko ro Riikane

¹⁰ Orosiko rumu ro Riikane, Yesu naare mo-nyumba imu e Ryobha, areeghi abhaato. ¹¹ Muyo, naare-mu omukari umu, uno are oghooturu no omusambu kwo emeeka ikomi ne enaane. Omusambu uyo, noomokumbiri omughōngō, na taatoriri ghughōrōrōka koru hasuuu.

¹² Hano Yesu amoroche, akamobherekera ache ghokooche, akamobhoorera, “Yiima, obhubhabharu bhoocho bhookahōra kimu!” ¹³ Yesu aghatoora amabhōkō ighoro yaache, hayohayo aghaghōrōrōka, aghasēema koreghongi Eryobha.

¹⁴ Orosiko runo Yesu ahōriri omooto uyo, ndoore orosiko ro Riikane, eghaghēri omukangati o nyumba e Ryobha aghakarara chwee. Akabhabhoorera abhaato akabhugha, “Ncheenyi-ho, chaasiko ishaasabhe che kuhōki emeremo. Mbe, muuche muhōribhu mo-chaasiko chiyo, amare motaacha kuhōribhu orosiko ro Riikane!”

¹⁵ Omutēmi akamugharokeri, “Inyu mbarōngō moonyi! Inyu bhoose moghukōra emeremo mo-orosiko ro Riikane. Taanyi-ho mooto wowoose, aghoshookorera ang’ōmbē yaache hamu atikere yaache koru a-mowaara, ayehire kunyo amanche, nangabha roonyi orosiko ro Riikane?” ¹⁶ Kana omukari uno, o mo-rwibhoru ro Abhurahamu, naamariri kinya emeeka ikomi ne enaane anyi no obhubhabharu bhooche bhuno Eriishambu reere remubhōhiri. Mbe, uyo nawe, tarēng’aniire asaasoru koru mo-bhubhabharu nangabha roonyi orosiko ro Riikane?”

¹⁷ Hano Yesu abhughiri ghayo, hayohayo abhabhisa bhaache bhoose, bhakarighi chaasoni. Amare abhande bhoose, bhaghasiighasiigha chwee gho ghiri e mang’ana amachōmu ghano akōriri.

Eghetubhaani ghe tētērē e harataari

(Mataayo 13:31-33; Maariko 4:30-32)

¹⁸ Akamara Yesu akabhoori, “Obhutēmi bho Ryobha mbotubhiine na ke? Nekobhotubhaani na ke?” ¹⁹ Mbotubhiine na atētērē e harataari,* ino omooto emiri mo-moghondo waache. Atētērē ekamera, ekabha omote mokoro. Ebhinyonyi bhekaacha bhekaabhēka ebhenyumba bheebho mo-chaasa cheeche.”

²⁰ Yesu akabhugha wiiki, “Nekobhotubhaani na ke Obhutēmi bho Ryobha?” ²¹ Mbotubhiine no obhotu bho kimera bhuno omukari ahiimoki, asangerani mo-matebhe atato gha bhotu, kerende obhotu bhuyo bhoose bhutōta.”

Eghiseku eghgehute

(Mataayo 7:13-14, 21-23)

²² Hano Yesu are mo-rughēndō ro ghuye Yerusareemu, akabha areeghi abhaato mo-meghya na mo-bhyaro bhino ahetiire. ²³ Orosiko rumu, omooto akamobhoori, “Omutēmi, abhaato bhano bhaghootoribhu, mbaakubha bhasuuu hang’u?”

Yesu akabhugha, ²⁴ “Mwikōng’i bhoose ghusōha gho kohetera eghiseku eghgehute. ^Nekabhabhoorera kubha, abhaato bhaaru mbaghusaki ghusōha, amare bhataaghotora. ²⁵ Hano omwene aka akubha amariri ghwighara eghiseku, mokwimerera anche, moghusēema ghukōng’ōōta eghisēku na ghusabha, ‘Oo Omutēmi, notwighorere.’ Amare naakobhagharokeri, ‘Ntebheeche inyu! Ntyeche hayi morweriire!’

* **13:19 Atētērē e harataari** Ekeyunaani ngeekobhugha atētērē e harataari, ino Abhayahuuti mbaayimanyiri kubha n-atētērē isuuu chwee, ghokera echende. Orayeemi imera ibha omote mokoro.

²⁶ “Inyu mokomobhoorera, ‘Kana nturaghiire na kunyo haghirohamu na niye! Wiiki niye weeghiri mo-bhyaro bhiito!’ ²⁷ Amare nakobhabhoorera, ‘Nimariri kobhabhoorera, ntebheeche na ntyeche hayi morweriire! Mondwere hano, inyu abhakōri bha mabhe!’

²⁸ “Niho mokorera na ghukararaati amiino, hano mokomorighi Aburahamu, Isaka, na Yakobho, na abharōōti bhoose bhaanyi mo-bhutēmi bho Ryobha. Amare inyu mookubha mwighariiru anche! ²⁹ Abhaato mbakuucha koru roghoro na anyancha, koru masaabha na bhachuuta, mbaaghwikara mo-ndaaghera mo-bhutēmi bho Ryobha.

³⁰ “Mutēghēērērē! Abhaato bhano bhaanyi abhaanyuma ibheere, mbakuucha kubha abhambērē. Wiiki bhano bhaanyi abhambērē ibheere, mbakuucha kubha abhaanyuma.”

Obhosiighi bho Yesu kwo Yerusareemu

(Mataayo 23:37-39)

³¹ Eriibhagha riyo riyo, Amabharisaayo abhande mbaamutambiine Yesu bhakamobhoorera, “Nooru hano, oghi ahaghiro ahande, gho kubha Herote naakwenda ghoghwita.”

³² Yesu akabhabharokeri, “Herote n-ambwe!* Mughēndē momobhoorere, ‘Mōōhi! Reero na tabhoori, nekuhēēbha emisambu koru mo-bhaato, na kobhahōri amabhabharu ghaabho, no orosiko ro ghatato, nekohikeerani omoremo waane.’

³³ Nekwenderu nighōōtē orughēndō roone ro ghuye Yerusareemu reero na tabhoori na bhasiire, mbagha nehike-ho, gho kubha teekubha murōōti ghokwera ahaghiro ahande, anche e Yerusareemu!

³⁴ “Iye Yerusareemu! Oo Yerusareemu, nokobhiita abharōōti. Wiiki abhaato bhano bhaghotomu ghokoocho, nookobharasa amabhohe. Nkarengē neere kwenda kobhakoma abhaato bhaacho, kinya bhuure angōkō ehaakoma ebhechuri bheeche, amare motendiri. ³⁵ Mumōōhērērē! Ibheere Eryobha rekabhatigha inyu na anyumba yaanyu! Mbe, nekabhabhoorera motakondighi wiiki, mbagha eriibhagha rino mokobhugha, ‘Nitabhiiru uno akuucha kwo riina re Mutēmi Waryobha.’”*

Yesu akamuhōri omubhabharu orosiko ro Riikane

14 ¹ Orosiko rumu ro Riikane, Yesu naaghiire kuraaghera awaache omokoro umu o Mabharisaayo. Hano are muyo, Amabharisaayo na abhaato abhande bhano bhaare hayo, bhaakabha bharamusaacha chwee.

² Ibheere, hayo ambērē yaache, naare-ho omooto umu, uno are no obhubhabharu bho kobhimba omobhere. ³ Yesu akabhabhoori Amabharisaayo, na abheeghi bha meghiro, akabhugha, “Kana, ntoghwisherereri ne emeghiro ghiito kuhōri abhaato orosiko ro riikane, ghasi tiyaanyi?” ⁴ Amare ibho, bhaghakira. Yesu akamoturi omubhabharu uyo, akamuhōri, akamwisherereri agharuke aka.

⁵ Akamara Yesu akabhabhoori, “Niwe ghate yaanyu uno ang’ōmbē yaache,* hande atikere yaache, eragho mwiribha orosiko ro Riikane, atangayeruusiri nangabha roonyi orosiko ro Riikane?” ⁶ Abhaato bhayo, bhataare na re kobhugha.

* 13:32 *Herote n-ambwe* Hano bhaakobhugha ambwe taanyi itoki, ambwe n-omooto mong’iining’iini.

* 13:35 Mōōhi Sabhuri 118:26.

* 14:5 Amandeko aghande gha Keyunaani ngandekiri *Omoona waache o ghesubhe*.

Ghwitabharera asooko

⁷ Yesu akarighi kebhuo abhaghëni bhayo :bhaare bhariyahurera ebhetumbe bhe mbere bhe sooko. Niho akabhabhoorera eghetubhaani, arabhugha, ⁸ “Hano okubha uraghiinu mo-rikwirera, otiikara mo-bhetumbe bhe mbere. Otaköra hang’u gho kubha, mbaaghotora kubha bhamuraghiini owonde o sooko ghoghokera iye. ⁹ Uno are abharaghiini inyu bhabhere, nakuucha ghokobhoorera, ‘Motighere uno omweya waache.’ Hayo, nokorighi chaasoni chwee, gho ghuye ghwikara mo-bhetumbe bhe nyuma e bhande.

¹⁰ “Mbe, hano okubha uraghiinu mo-bhiinyakure, oghi wiikare ebhetumbe bhe nyuma. Eriibhagha uno are akuraghiini akuucha, akobhoorere, ‘Musaani waane, nuuche hano ambërë, niho hakurëng’aniire iye ghwikara.’ Hayo nookubha uhaabhuru asooko ambërë e bhaghëni bhayo bhoose. ¹¹ Wiiki, mooto woose uno aghwitiiri, naaghwikibhu haase. Omooto woose uno aghwitoora haase, naghotiiribhu ighoru.”

¹² Akamara, Yesu akamobhoorera uno are amuraghiini, “Aribha uköriire abhaato obhughëni, otaraghani bhasaani bhaacho, bhahiiri bhaacho, koru abhaatani bhaacho abhaame. Oraköra hang’u, ibho bhoose mbaghokuraghani, na hang’u nookubha orehuru kino ore obhaköriire.”

¹³ “Mbe, oreenda kobhakörëra abhaato obhughëni, uraghani abhahabhe, abharëma, abhatagharya, na abhahuku. ¹⁴ Neekubha ng’oni ghokoocho, gho kubha, ibho bhataanyi ne egheghiro ghe ghokoreha. Eryobha niryo reghokoreha, eriibhagha re kobharyoki abhaato bhano bhaarichömiire.”

Eghetubhaani ke bhughëni obhokoro

(Mataayo 22:1-10)

¹⁵ Mbe, umu o bhayo :bhaare bhikeere mo-bhiinyakure, hano oghwire amang’ana ghayo gha Yesu, akamobhoorera, “Ng’oni, omooto uno akubhöna omweya o kuraaghera mo-bhughëni bho bhutëmi bho Ryobha!”

¹⁶ Yesu akamugharokeri gho ghetubhaani kino. “Haare-ho omooto umu, uno asëëmiri obhughëni bhokoro, akaraghani abhaato bhaaru chwee. ¹⁷ Eriibhagha re obhughëni hano rehikiri, akamotoma omutamishi waache kwo bhano are araghiini bhoose, abhabhoorera, ‘Muuche ibheere! Ebheghiro bhyose mbimariri ghuköru!’

¹⁸ “Amare, abhaghëni bhoose, ke umu umu bhaakabha bharamong’iina abhaabhere. Ibheere, o mumbërë akamobhoorera, ‘Neghohusabha ondigheri changori, gho kubha neghoriri omoghondo, nekwenderu neghi koworighi.’

¹⁹ Owonde akabhugha, ‘Neghohusabha ondigheri changori, gho kubha neghoriri chang’ömbë ikomi che korema. Ibheere, neghaye ghochisaki.’ ²⁰ Wiiki owonde akabhugha, ‘Nekwiriri omukari, gho ghayo, nteeghotora kuucha.’

²¹ “Omutamishi uyo aghagharuka, akamobhoorera omutëmi waache ghayo ghoose. Niho omutëmi waache aghakarara chwee, akamobhoorera omutamishi waache, ‘Nooghi ibheere bheere, mo-nchera angoro na mo-chanchera chansuuho che moghya uno, obharëëtë hano abhahabhe, abharëma, abhahuku, na abhatagharya.’

²² “Akamara, omutamishi uyo aghagharuka, akamobhoorera, ‘Omutëmi, ghaare ontomiri ñneghaköriri. Koru hang’u, okeere onyi-ho omweya.’

²³ “Omutëmi akamobhoorera, ‘Mbe! Oghi anche e moghya mo-chanchera chino cheghuye mo-bhyaro ebhesuuho, na mo-meghondo, obhahaamërëri abhaato bhaache bhasöhë mo-ka yaane, mbagha yiichore. ²⁴ Amare, bhaare bhoose bhano niraghiini ekimbërë, ñnekabhabhoorera kubha taanyi-ho koru umu o bhayo uno aghusama obhughëni bhoone!”

Eriighöri re kubha omughëndi o Yesu

(Mataayo 10:37-38)

²⁵ Yesu, naare araghëndani no obhoyo bhwaru bho bhaato. Aghishoorori, akabhabhoorera, ²⁶ “Omooto wowoose uno aghuntambana arenda kubha mughëndi waane, nekwenderu ansiighe eni ghokera ishe, nyina, omukari waache, abhaana bhaache, bhawomoobho, koru onsiighe eni ghwikera mwene. ²⁷ Omooto woowose uno ataamara aghëgha omusarabha waache, na ghuntambana, taaghotora kubha mughëndi waane.

²⁸ “Tobhughe aribha umu ggate yaanyu naakwenda kwabhëka omunara. Mbe, takwabhëka akeere ghwikara singa, na ghotoora eriighöri re bheghiro bhyose bhino akuhökëri, gho kwabhëka omunara uyo? Araköra hang’u, niho akumanya aribha naanyi na chambiri che ghwisha kumareereri eryabhëka. ²⁹ Mbe, araanga ghuköra hang’u, naaghotora kwabhëka obhoroso, aramara akeyu kumareereri omunara. Niho mooto woose uno akoheta, naakubha aramuchëera, ³⁰ arabhugha, ‘Omooto uno nasëemiri kwabhëka, amare taatoriri kumareereri eryabhëka!’

³¹ “Tobhughe omutëmi umu naakwenda ghuye kuröona no omutëmi owonde. Naghwikara singa ibhoori aribha iwe na abhakeeya bhaache ebheku ikomi naaghotora kuröona no omutëmi uno anyi na abhakeeya ebheku miröngö ebhere ³² Ararighi kubha naaghokeyu, hayo hayo naakobhatoma abhatomu bhaache, bhaghëndë bhwango kwo mutëmi owonde akeere anyi iyo kure, bhabhönë koghwana.

³³ “Hang’u hang’u, taanyi-ho koru umu ghokoonyu uno aghotora kubha mughëndi waane, aribha ataamara atigha bhyose bhino anyi nabhyo.”

Omoonoyo uno otaanyi no obhwera

(Mataayo 5:13; Maariko 9:50)

³⁴ “Omoonoyo n-egheghiro ghichömu. Amare aribha usarekiri, ghetaanyi-ho kino ghekowuköra uchömë wiiki. ³⁵ Omoonoyo onga hang’u, toonyi no obhwera bhobhoose, koru mwiröbhë, koru mo-sururuuta, abhaato mbakowute kure. Mooto woose uno anyi na amatu gha kooghu, na atëghëërë!”

Ghuchömëru gho kubhona ang’öndu ino ebhoriri

(Mataayo 18:12-14)

15 ¹ Orosiko rumu, abhatöbhi bha righöoti na bhamasari abhande, bhoose mbaare bhikomiine o-Yesu, bhamutëghëërë. ² Gho ghayo, eghaghëri Amabharisaayo na abheeghi bha meghiro, bhing’unyere ng’unyere kubha, “Omooto uno, ngwake akabhaghënëhi bhano bha amasari! Wiiki nakuraaghera nabho haghirohamu!”

³ Ibheere Yesu akabhabhoorera eghetubhaani, akabhugha, ⁴ “Tobhughe umu ggate yaanyu, naanyi na chang’öndu eriighana. Aramanya kubha imu nebhoriri, nibhu aghuköra? Mbe, naaghochetigha chiire miröngö kende na kende akeriisho, naaghuye ghutabhara yiire ebhoriri, mbagha ayibhönë. ⁵ Hano akoyibhona, nakoyisambeka gho ghuchömëru, ⁶ na koyirëeta aka. Hano akohika nakobherekera bhasaani bhaache na abhaatani, na kobhabhoorera, ‘Ntosiighesiighe haghirohamu, gho kubha ang’öndu yaane, ino ere ebhoriri, neyebhwine!’

⁷ “Nekabhaborera, hang’u hang’u ngookubha na ghuchömëru kwaru Mwishaaro, eriibhagha omasari umu aratukuunera amasari ghaache. Ghuchömëru kuyo, ngookubha ghokoro ghokera kuure kwo bhaato bhachömu miröngö kende na kende, bhano bhataanyi na amenda gha ghotukuuna.”

Ghuchömëru gho kubhõna orobhiiri runo robhoriri

⁸“Ibheere, mutëghëërë eghetubhaani ekende, tobhughe omukari umu naanyi na chambiiri ikomi che eriighõri ikoro,* na arabhori imu. Tigha naghughõõti atara, na ghutareki anyumba yoose, arayitabhara gho changuru mbagha ayibhõnë? ⁹Hano akoyibhõna, nakobherekera bhasaani bhaache na abhaatani, na kobhabhoorera, ‘Ntosiighesiighe haghirohamu, gho kubha orobhiiri ruure roore robhoriri ro riighori ikoro, nerobhwine!’

¹⁰“Nekabhabhoorera, hang’u hang’u, Eryobha ndeghuchömëru chwee ambëre e bhamarayika bhaache, hano omooto umu o masari akubha atukuniire amasari ghaache.”

Ghuchömëru gho kubhõna omoona uno arumeeriri

¹¹Yesu akeengera kobhugha, “Haare-ho omooto umu, uno are na abhaana bhabhere bha ghesubhe. ¹²Omobhureni omony, akamusëëta ishe akamobhoorera, ‘Taata, nuuhe aghabho yaane.’ Mbe, ishe akabhahõõhi abhaana bhayo bhabhere obhwame bhooche.

¹³“Akamara chaasiko insuuu, omobhureni uyo omony aghakoma ebheghiro bheeche bhyose, aghakõra orughëndõ aghaye ase e kure. Eriibhagha ahikiri iyo, aghasëëma kobhisanchani ebheghiro bheeche gho kwiyengeri mo-mang’ana amasineenu. ¹⁴Eriibhagha amariri chambiiri choose, hakarwera aghëëcha ihaari chwee mo-se iyo are, nawe akabha ataghõõtë gheghiro ghyokyose. ¹⁵Gho ghayo, akamutambana omooto umu o iyo, akamusabha kubha abhe omutamishi waache. Omooto uyo, akamotoma a-moghondo waache aghi kuraghëri chambeechi.*

¹⁶Hano are arachiha ebhiinyakure, akarighi bhuure cheekure amaghökõ, aghiighomba ghoghare woose! Amare taanyi-ho mooto uno amoheere ghyokyose ghe kure.

¹⁷“Antenero, amang’iini ghakamugharukera, akihëëbha hang’u, ‘Abhatamishi bha taata waane, tigha mbakuraaghera, mbagha bhiiighota na ghusaaghi! Amare eni hano, neeghoku gho nchera. ¹⁸Ibheere neghugharuka o-taata, nemobhoorera, ‘Taata, nitasiiri Eryobha, neghutasiiri na niye wiiki. ¹⁹Ntekurëng’anera kobherekeru omoona waacho. Gho ghayo, nunkörë kinya umu o bhatamishi bhaacho.’”

²⁰“Mbe, omoona uyo akaru hayo, aghagharuka ghwi ishe. Hano are akeere kure, ishe akamorighi, aghaghõõtu na changori. Hayo hayo akamoturung’anera omoona waache, akamukëëri kwo miigha. ²¹Omoona uyo, akamobhoorera ishe akabhugha, ‘Taata, nitasiiri Eryobha, neghutasiiri iye woose. Ntekurëng’anera kobherekeru omoona waacho wiiki.’

²²“Amare, ishe akabhabhoorera abhasëë bhaache akabhugha, ‘Mukörë bhwango! Murëëtë angibho ichõmu momobheeki. Momobheeki abhëtë mo-kyara keeche, momobheeki ne ebhekwera. ²³Murëëtë ekeheeri ekenoru, momughõõghëre. Tori obhughëni tuchömëru na ghosiighasiigha, ²⁴gho kubha omoona waane uno, naare abhoriri, amare akabhõnëka. Wiiki naare kinya akuure, ibheere muhõru!’ Niho bhayo bhoose bhaghasëëma ghukõra obhughëni gho ghuchömëru.

²⁵“Eriibhagha riyo, omoona waache omokoro naare a-moghondo. Hano are aragharuka aghating’i aka, akooghu kubha abhaato mbakwemba na kobhina.

* 15:8 *Chambiiri ikomi che riighori ikoro* mo-Keyunaani Tarakima imu neere, amareho gha muhõki kwo rosiko rumu.

* 15:15 *Chambeechi* Abhayahuuti :mbacheeriri chwee.

²⁶ Akamobherekera omusēsē umu, akamobhoori, ‘Neke ghekabhōnēka hayo?’

²⁷ Akamobhoorera, ‘Omosuuhu waacho niichiri, iso namughōghiire ekeheeri kenoru, gho kubha nagharokiri anyi muhōru.’ ²⁸ Omoona uyo omokoro aghakarara chwee, akanga ghusōha aka. Ishe akahoroka anche, akabha aramusasaama asōhē.

²⁹ “Amare, akamugharokeri, ‘Tēghēērera taata! Emeeka myaru, nibheere ndakuhōkēri, wiiki ntimarantigha ghoghosooka! Ghokoone eni, tumarawuha koru akabhoori, kubha nikōrē obhughēni haghirohamu na bhasaani bhaane.’ ³⁰ Amare omoona waacho uno, asanchiri ebheghiro bheecho kwo bhasōngōrēeri, hang’u akaacha, okamughōghēra iwe ekeheeri ekenoru!”

³¹ “Ishe akamobhoorera, ‘Moona waane, iye ntwikeere haghirohamu chaasiko choose. Ebheghiro bhyose bhino neenyi nabhyo m-mbebbheecho. ³² Amare omonyi waacho uno, ntokwenderu tomukōrērē obhughēni na ghosiighasiigha haghirohamu. Nikōriri hang’u gho kubha naare abhoriri, amare ibheere akabhōnēka. Wiiki naare kinya akuure, ni ibheere muhōru!”

Eghetubhaani ke mwimeereri omong’iini

16 ¹ Yesu akabhabhoorera bhaghēndi bhaache eghetubhaani, “Naare-ho omwame umu no omwimeerereri waache. Omwimeereri uyo, aghasēmu kubha naare arasari ebheghiro bhe mutēmi waache. ² Ibheere, omwame uyo akamobherekera omwimeerereri waache, akabhugha, ‘Mang’ana ke ghano nekooghu ighoro yaacho? Onyeereki omubharo o bheghiro bheene, gho kubha tooghotora wiiki kubha mwimeerereri o bheghiro bheene.’

³ “Omwimeerereri uyo akibhoori, ‘Nibhu ngukōra ibheere? Omutēmi waane, naabhughiri nakonduusi mo-meremo. Nteenyi ni nguru che korema. Wiiki nekorighi chaasoni ghusabhasabha. ⁴ Ibheere! Hano neekubha nimariri kuhēebhu mo-meremo ghino, nyeeche kinya Neghukōra, abhaato bhaache bhangēnihi mo-chaaka cheebho.’

⁵ “Ibheere, omwimeereri uyo akabhabherekera abhaato bhoose bhano :bhaare na chasiire che mutēmi waache ke umu umu. Akamobhoori o mumbērē akabhugha, ‘Asiire yaacho kwo mutēmi waane hang’ana hayi?’ ⁶ Akamugharokeri, ‘Asiire yaane, n-amatiraamu eriighana gha maghuta gha miseyituuni.’ Omwimeereri uyo akabhugha, ‘Imoki eritarataashi rino, ndyandekuru asiire yaacho. Ikara hano bhwango, oyigharure, andeka mirōngō etaano.’ ⁷ Akamara akamobhoori omoosiire owonde, ‘Iye, asiire yaacho hang’ana hayi?’ Akamugharokeri, ‘Amaghōnēra eriighana gha ngano.’ Omwimeereri uyo akabhugha, ‘Imoki eritarataashi rino re siire yaacho, andeka mirōngō enaane.’

⁸ “Ache kumara, omwame akamoghongi omwimeereri uyo ataanyi omuhēēnē kwo bhong’iini bhooshe. ^Nekabhabhoorera ghayo gho kubha, abhaato bha ase ino mbaanyi no obhong’iini chwee, gho kobhihōkēri ebheghiro bheebho abheene kwo bheene, ghokera abhaato bha bhwerō. ⁹ Eni ^nekabhabhoorera, muhōkēri ebheghiro bheenyu mo-se ino mwibhonera abhasaani mo-bhutēmi bho Ryobha, kubha eriibhagha moghosireru ebheghiro, bhabhaghēnihi mo-bhwikari bho miishe ghyose.”

¹⁰ “Omooto woose uno anyi muhēēnē kwo mang’ana masuuhu, niwe akubha omuhēēnē koru kwo mang’ana amakoro. Hang’u hang’u, omooto woose uno ataanyi muhēēnē kwo mang’ana masuuhu, wiiki taakubha muhēēnē koru kwo mang’ana amakoro. ¹¹ Ibheere aribha inyu motabheere bhahēēnē gho kuhōkēri obhwame bhoonyu bho mo-se ino, niwe akobhaha obhwame bho hēēnē? ¹² Aribha motabheere bhahēēnē gho ghotindeka ebheghiro bhe wonde, niwe akobhaha ebheghiro bheenyu inyu bheene? ¹³ Taanyi-ho omutamishi uno angatoriri kuhōkēri abhatēmi bhahere. Arasiigha omutēmi umu na komuhōkēri bhoheene,

naakuregha wuure owonde na komutaraaha. Mbe motaaghotora korihökëri Eryobha haghirohamu no obhwame bho mo-se ino!”

¹⁴ Amabharisaayo, hano bhoghwire amang’ana ghayo gha Yesu, bhaghasëema komusëka gho ghitaraha, gho kubha mbasiighi chwee chambiiri. ¹⁵ Yesu akabhahoorera akabhugha, “Inyu, moghwikori moonyi no obhuëëñë ambërë e bhaato. Eryobha ndyeche amang’ana ghano ghaanyi mo-metema gheenyu. Wiiki amang’ana ghano abhaato bhasiighiri, ngahaabha mabhe ambërë e Ryobha!”

Ameeghi igoro e meghiro ghe Musa no obhutëmi bho Ryobha

(Mataayo 11:12-13, 5:31-32; Maariko 10:11-12)

¹⁶ “Emeghiro na amandeko gha bharöoti, ngaare ghaghöoturu na abhaato mbagha eriibhagha re Yohana. Korwera eriibhagha riyo, Ang’ana Anchömu e bhutëmi bho Ryobha ekabha arasanchibhu, na abhaato bhaaru mbaghwiköng’i ghusöha. ¹⁷ Koru hang’u, n-kohoho chwee kwo rishaaro na ase koru-ho, ghokera eking’öchö ghesuuu ke meghiro ghe Musa kohutu.

¹⁸ “Omosubhe, uno akomotigha omukari waache na ghokwira owonde, uyo arakwira, n-ghutaara aghutaara nawe. Wiiki orakwira omukari uno ahëëbhuru no omosubhe waache, uyo wiiki ngutaara oghutaara nawe.”

Eghetubhaani ke mwame na Rasaaro

¹⁹ “Naare-ho omwame umu, uno are araköra obhughëni chaasiko choose, na kobheeka amaghöoti amachömu, wiiki gha riighori ikoro gha sambarawe. ²⁰ Mo-ghisëku ke mwame uyo, haare-ho omuhabhe umu, eriina reeche Rasaaro. Rasaaro uyo, omobhere waache woose noore wichwire amaghaati. ²¹ Chasese ncheere cheraacha na komumeesa amaghaati ghaache. Eriibhagha amatigho :ghaare gharagho koru mo-meecha e mwame uyo, Rasaaro akabha araghiighomba bhamuhe, gho kubha naare arooghu anchera.

²² “Antenero, omuhabhe Rasaaro aghaku. Bhamarayika bhakamohira Mwishaaaro, haghuhe na Abhurahamu. Omwame wuure woose aghaku, akaryeku aghaye nyaari. ²³ Hano omwame uyo are aranyaaka chwee iyo, aghaghëgha amiishi ghaache, akarighi Abhurahamu gho kure, na Rasaaro anyi haghuhe nawe. ²⁴ Akamobherekera kwo riiraka ikoro, ‘Taata Abhurahamu, ondigheri changori! ^Nekanyaaka chwee mo-mororo uno! Omotome Rasaaro ache hano neenyi, akori anyinga e kyara mo-manche, atonyi mo-roreme roone gho ghiri romitite.’

²⁵ “Amare, Abhurahamu akamugharokeri, ‘Oo omoona waane, ohiite kubha :nobhwine amang’ana amachömu mwimënya reecho, hano ore mo-se. Rasaaro nawe, :naabhwine amabhe. Amare ibheere, iwe naakuhönibhu hano, na niye nokunyaaka. ²⁶ Ghokera ghayo, ggate yiito na niinyu, hatooruru rirooma ikoro chwee. Ndetooruru kubha, bhaare bhaakwenda koru ino kuucha ghokoonyu, bhataora korekera, na bhaare bhaakwenda koru iyo kuucha ino, bhataora.’

²⁷ “Omwame uyo akabhugha, ‘Taata, neeghaghusabha omotome Rasaaro aghi awiito o-taata waane, ²⁸ abhashaang’i bhawomwito bhataano, bhataacha kuucha ino mo-nyaako ahaari.’ ²⁹ Amare, Abhurahamu aghagharokeri, ‘Bhawomoonyu bhayo, mbaanyi na amang’ana ghano ghandekuru na Musa na bharöoti. Mbakwenderu ghoghatëghëërëra ghayo!’

³⁰ “Aghagharokeri, ‘Tiyaanyi, taata Abhurahamu! Amare, omooto arabha aruure ino mo-bhaku na akobharwera, niho bhaghotukuunera amasari ghabho.’ ³¹ Abhurahamu aghagharokeri, ‘Bhawomoonyu bhayo, aribha bhataaghotereera ghano ghandekuru na Musa na bharöoti, bhataaghotereera koru aribha omooto angaryoka koru mo-bhaku.’”

Ameeghi ighoro e kwabherane

(Mataayo 18:6-7, 21-22; Maariko 9:42)

17¹ Yesu akabhabhoorera bhaghëndi bhaache akabhugha, “Amasaki ghano ghaghughëri abhaato bhakörë amasari, ngaakubha-ho kemera. Amare, horeera nakorighi omooto uno aghogharëeta! ²Nengabheere ng’oni ghokooche omooto uyo, abhöhëru orobhohe ro ghusëera mwithoti, na kurëkëru mo-nyancha, ataacha ghughëri umu o bhasuuu bhano ghuköra amasari! ³Gho ghayo, mubhe morichonga bhoheene!

“Aribha omohiiri waacho araghutaaseri, omohiinye, na aratukuunera erisari reeche, omwabhere. ⁴Koru araghutaaseri mara mohungate kwo rosiko, na hanoohano agharuka ghokoocho arabhugha, ‘Neghatukuuna,’ omwabhere!”

Otwengere bhokumi

⁵Niho abhatomu bhayo bhakamobhoorera Omutëmi, “Otwengerereri obhokumi bhwito!” ⁶Akabhagharkeri, “Aribha mongabheere no obhokumi bhoong’ana kinya atëtërë e harataari, mongabhooriire omote uno o mokoowa kubha, ‘Nwiheke umërë mo-nyancha!’ Woose nongabhasookiri.”

Abhatomu bha Yesu bhatiirighi kubha, ibho ng’oni

⁷“Tobhughe umu waanyu naanyi no omutamishi uno akorema hande naakoriishi chang’öndu. Omutamishi uyo aragharuka aka, omutëmi waache hayohayo naaghotora komobhoorera, ‘Nuuche bhwango wiikare uraaghere?’ ⁸Tiyaanyi! Tigha naakobhugha, ‘Numbanure ebbhiinyakure, usëëmë kuuhökëri, hano nkubha nimariri kuraaghera na kunyo, niho oramara iye woose uraaghere na kunyo.’ ⁹Mbe! Omutamishi uyo araköra ghano omutëmi waache :amobhooriire, omutëmi uyo naakomwitabheri gho kubha naköriri ghano are amobhooriire? Tiyaanyi!

¹⁰“Hang’uhang’u na niinyu, moramara ghuköra ghoose ghano nebbhabhooriire, mobhughe, ‘Itu m-mbatanishi toonyi. Ntuköriri ghano twendiiru ghuköra agheene.”

Yesu akahöri abhabhabharu bha mbiti ikomi

¹¹Eriibhagha Yesu are araghe Yerusareemu, akahetera mo-robhebhe ghathe e se e Samaariya, na Ghariraaya. ¹²Orosiko rumu, aghasöha mo-kyaro kimu, aghatëmëërana na abhaato ikomi bhano bhaanyi no obhubhabharu bho mbiti. Abhaato bhayo, bhakimeerera kure na we, ¹³bhaghatiiri amaraka bharabhugha, “Omutëmi Yesu, otorigheri changori!”

¹⁴Umu akabharighi, akabhabhoorera, “Mughëndë mwiyerekani mo-bhachaama.”* Mbe bhaaghave, ne eribhagha bhaanyi mo-nchera, bhakahöribhu.

¹⁵Umu o bhayo, hano arooche kubha akahöra, hayohayo aghagharuka o-Yesu, araghongi Eryobha kwo riiraka ikoro. ¹⁶Hano ahikiri, akiirekera kebhuumu mo-maghoru gha Yesu, ino aramobhoorera oghachömi. Omooto uyo, naare Omusamaariya.

¹⁷Yesu akabhugha, “Taanyi abhaato ikomi nihöriri? Kana, bhaare abhande kende hayi bhaanyi? ¹⁸Taanyi-ho koru umu uno ahiitiri ghugharuka koreghongi Eryobha, ekabha n-omughëni uno omwene?” ¹⁹Akamara Yesu akamobhoorera, “Imeerera, ughëndë chechecho, obhokumi bhoocho `bhoghakuhöri.”

* 17:14 Mööhi Abharaawi 14:1-11; Ruuka 5:14.

Okuucha kwo bhutëmi bho Ryobha

(Mataayo 24:23-28, 37-41)

²⁰ Orosiko rumu, Amabharisaayo bhaakabhoori Yesu, “Obhutëmi bho Ryobha, nyingake bhokuucha?” Akabhagharokeri, “Kuucha kwo ubhutëmi bho Ryobha, ghotaanyi kwo meerekereri ghano ghakorighibhu kwo miisho. ²¹ Abhaato bhataaghotora kobhugha, ‘Mumööhi! Kabhuno bhoonyi hano!’ Hande, ‘Ntumööhi! Mboonyi haare!’ Mtëghëërë, obhutëmi bho Ryobha mboonyi ghate yiito hano.”

²² Akamara, Yesu akabhabhoorera bhaghëndi bhaache, “Mo-chaasiko chino chekuucha, moghwichomba korighi koru orosiko rumu ro chaasiko che Moona o Mooto, na motaakororighi. ²³ Abhaato mbakobhabhoorera, ‘Mumööhi! Kauure haare!’ Hande ‘Mumööhi! Kauno hano!’ Amare abhaato bhayo, motabhatambana. ²⁴ Nebhabhoiriire ghayo gho kubha, eriibhagha Omoona o Mooto aghugharuka, nakuucha kinya bhuure orunanehi roharwera hayohayo na komoreka chambaara choose. ²⁵ Amare singa, nekwenderu Omoona o Mooto abhönë anyaako yaaru na kwangu na abhaato bha rwibhoro runo.

²⁶ “Kinya bhuure ghaabheere mo-chaasiko che Nuhu, hang’u ghaakubha mo-chaasiko che ghugharuka kwo Moona o Mooto. ²⁷ Mo-chaasiko che Nuhu, abhaato mbaare bhararaaghera na kunyo, bharakwira na ghokwiru, mbagha orosiko ruure hano Nuhu asöhiri mo-ryato. Ase yoose eghiichora amanche, bhaghasireekerera bhayo bhoose.

²⁸ “Koru mo-chaasiko che Rooti amang’ana ngabheere hang’uhang’u. Abhaato mbaare bhararaaghera na kunyo, bharaghora na ghoghoori, bhararema na kwemi chambusuro, na mbaare bharaabhëka. ²⁹ Amare, orosiko ruure hano Rooti aruure Sotoma, omororo muhaari oghatëka kinya ambura koru Mwisharo, okabhasireekereri bhayo bhoose.

³⁰ “Hang’uhang’u ekubha orosiko runo Omoona o Mooto akuucha korwera mo-bhokumi. ³¹ Orosiko ruyo, omooto arabha anyi irëngö re nyumba yaache, atiika kobhighëgha ebheghiro bheeche bhino bheenyi mo-nyumba. Wiiki omooto arabha a-moghondo, bhuure bhuure, atagharuka aka kwimoki ghyokyose.

³² Mohiite ghaare ghamorweriire muka Rooti!* ³³ Omooto woose uno aghusaki kuhöni obhuhöru bhoche nakobhobhoori, woowoose uno akubha isëëmiri kobhobhoori obhuhöru bhoche nakobhotoori.

³⁴ “Nekabhabhoorera kubha, obhotiko bho rosiko ruyo, abhaato bhabhere mbaakubha bhamisiri obhorere bhumu. Umu, Eryobha ndekomwimoki, owonde ndekomotigha. ³⁵ Orosiko ruyo, abhakari bhabhere mbaakubha bharase haghirohamu. Umu, Eryobha ndekomwimoki, owonde ndekomotigha.” [³⁶ Abhaato bhabhere, mbaakubha bharahöki omoremo a-moghondo, umu Eryobha ndekomwimoki no owonde ndekomotigha.]

³⁷ Abhaghëndi bhakamobhoori, “Omutëmi, hayi ghaaghukörëka ghayo?” Akabhagharokeri, “Ahaghiro hoose hano haanyi na ataasa, niho chaamatoonyi chehaakomana.”

Motashigha ghusabha

18 ¹ Yesu akabhoorera bhaghëndi bhaache eghetubhaani kino, kobheereki kubha Mbakwenderu ghusabha Eryobha bhataacha ghoku omukörö.

² Akabhabhoorera, “Mo-moghya umu, haare-ho omoteni o kiina umu. Omoteni o

* **17:32** Eryobha rekamutëma **Muka Rooti** kwo bhuhaari, gho kubha omukari uyo niighombiri ghugharuka Sotoma, omoghya uno Eryobha reere reteniire ekiina na ghosireekereri. Mööhi Simoka 19:26.

kiina uyo, taare aratiina Eryobha, koru ghotereera mooto wowoose. ³Mo-moghya uyo, naare-ho omosino umu. Omosino uyo kwo riibhagha ryaru naare aramutambana omoteni o kiina uyo komusabha, aramobhoorera, ‘Neghusabha uhe amenda ghaane koru kwo mobhisa waane.’

⁴“Kwo riibhagha ire, omoteni o kiina uyo naare araanga komutëghëërera omosino uyo. Amare antenero, aghisiikerera mo-motema waache, ‘Eni nteghotiina Eryobha, koru nteghotereera mooto wowoose, ⁵ amare, gho kubha omosino uno nakunyaaki nyaaki chwee, ibheere nekomuha amenda ghaache, kubha atabha aranyaaki gho ghuntambana wiiki!”

⁶ Akamara, Omutëmi akabhugha, “Mutëghëërëre bhoheene amang’ana gha moteni o kiina uyo omobhe! ⁷ Eryobha kana, retaakobhakörëra bhoheene abhaato bhaache bhano bhakorisaasama rebhatoori, obhotiko no omwische? Hëënë ndeeghukechera kobhatoori? ⁸ Nekabhabhoorera kubha, ndeekobhaha amenda ghaabho bhwango. Amare, hano Omoona o Mooto aghugharuka mo-se ino, nakuucha abhönë abhaato bharamokumi?”

Eghetubhaani ke Mubharisaayo no omutöbhi o righöoti

⁹ Wiiki, Yesu akabhabhoorera eghetubhaani kwo abhaato abhande bhano bhiirooche kubha, ibho nibho bhaanyi no obhuhëënë ambërë e Ryobha, na kobhataraaha abhande bhoose. Akabhugha, ¹⁰ “Haare-ho abhaato bhabhere, bhano bhaghiire Mwisëngërö ghusabha Eryobha. Umu naare Omubharisaayo, no owonde naare omutöbhi o righöoti.

¹¹ “Omubharisaayo uyo akimeerera, aghasabha Eryobha ghenkirinkiri arabhugha, ‘Oo Waryobha, oghachömi, gho kubha eni nteenyi mobhe ke abhande, abhaköri bha mabhe, na bhano bhakuhöka abhaato ebheghiro na abhataari, hande koru kinya omutöbhi uno o righöoti! ¹² Nekwiyima ebhiinyakure kabhere kwo wiiki,* na kwo bheghiro bhyose bhino nekubhöna, neghokoruuseri egheghiro kimu mw-ikomi.’

¹³ “Amare omutöbhi uyo o righöoti, aghasaagha kure hasuuu. Wiiki teendiri koru ghughëgha amiisho ghaache Mwishaaaro, amare akabha ariitëma mo-ghekubha keeche kwo macheeche, arabhugha, ‘Eryobha, rendigheri changori! Eni m-mooto o masari neenyi!”

¹⁴ Akamara Yesu akabhabhoorera wiiki, “^nekabhabhoorera kubha, omutöbhi uyo o righöoti :nagharokiri awaache, amariri kwabheru ne Eryobha. Amare uyo owonde, tiyaanyi! Omooto woose uno aghwitiiri, Eryobha ndekomwiki haase. Wiiki omooto woose uno aghwitoora haase, Eryobha ndekomotiiri.”

Yesu ^aghiitabheri abhaana abhasuuu

(Mataayo 19:13-15; Maariko 10:13-16)

¹⁵ Eriibhagha erende, abhaato mbaare bharamurëëtëra Yesu ebheng’werere, kubha abhetoorere amabhökö ghaache abhiitabheri. Hano bhaghëndi bhaache :bharooche ghayo, bhaghasëëma kobhareki gho kobhahaarera. ¹⁶ Amare, Yesu akabhabherekera abhaana bhayo, akabhugha, “Mobhatighe abhaana abhasuuu bhaache ghokoone, koru motabharëki, gho kubha, mooto woose uno akubha kebhuno abhaana bhano, obhutëmi bho Eryobha m-mbobhoobho. ¹⁷ ^Nekabhabhoorera gha hëënë kubha, omooto wowoose uno atakobhwishereri obhutëmi bho Ryobha kinya omoona omosuuhu, taakobhusöha naabha.”

* 18:12 Mööhi Abharaawi 16:29; Ruuka 5:33

Omwame umu

(Mataayo 19:16-30; Maariko 10:17-31)

¹⁸ Wiiki omukangati umu, akaacha komobhoori Yesu, “Omweghi omuhëënë, nikörë bhu, nibhönë obhuhöru bho miishe ghyose?”

¹⁹ Yesu akamobhoorera, “Kana neke gheghughëri oramberekerera omuhëënë? Taanyi-ho omooto wowoose omuhëënë, n-Eryobha eryene chiri, niryo erihëënë! ²⁰ Iye, noghyeche bhoheene emeghiro ghe Ryobha, ‘Otataara, otiita, otiibha, otasiikera obhuröngö, obhasooke iso na nyako.’” ²¹ Omukangati uyo aghagharokeri, “Emeghiro ghino ghyose, neghesookiri korwera bhoona bhoone.”

²² Hano Yesu :oghwire ghayo, akamobhoorera, “Okeere nokwenderu ghuköra ang’ana ayende. Ebheghiro bheeche bhino onyi nabhyo, nooghi obheghori. Chambiiri chino okubhöna, ochihööhü abhahabhe, niho okubha na amamba Mwishaaro. Oramara uche, untambane.” ²³ Omukangati uyo, hano oghwire ghayo, aghaghöotu na macheeche chwee, gho kubha naare mwame chwee. ²⁴ Yesu, hano amoroche akabha na macheeche hang’u, akabhugha, “Abhaame, ghusöha mo-bhutëmi bho Eryobha, n-ghuköng’u chwee! ²⁵ N-nkohoho Angamiya koheta mwibhanga re roshintani, ghokera omwame ghusöha mo-bhutëmi bho Ryobha!”

²⁶ Hano abhaato :bhooghwire ghayo, bhaakabhoori, “Mbe! n-niwe aghotora ghotooribhu?” ²⁷ Yesu akabhabhoorera, “Amang’ana ghano abhaato bhataaghotora ghuköra, kwo Ryobha ngaaghukörëka.” ²⁸ Ibheere, Bheetero akamobhoorera Yesu, “Mööhi itu, ntotighiri ebheghiro bhiiito bhyose, toghaghutambana!”

²⁹ Yesu akabhugha, “nekabhabhoorera ghaare gha hëënë kubha, omooto woose uno atighiri anyumba yaache, hande mkaache, hande bhawomoobho, hande abhiibhori bhaache, hande abhaana bhaache, gho ghiri e bhutëmi bho Ryobha, ³⁰ hëënë naakuhaabhu bhyaru ghokera bhino atighiri, akeere anyi mo-se ino. Wiiki, mo-se ino ekuucha, nakubhöna obhuhöru bho miishe ghyose.”

Yesu ^aghasiikera wiiki ighoro e ghoku kooche

(Mataayo 20:17-19; Maariko 10:32-34)

³¹ Yesu akabhiimoki bhaghëndi bhaache ikomi na bhabhere rubhareka, akabhabhoorera, “Mutëghëërë! Toghaye Yerusareemu. Niho ghano ghoose ghano abharöoti bhandekiri ighoro e Moona o Mooto, neghoghahikeerani.

³² Nakoruusibhu mo-mabhökö gha Bharuumi. Mbakomucheera na komotoka, bharamotwera amate. ³³ Wiiki, mbakomutëma emicharicho na mbaakomwita, amare orosiko ro ghatato, naakoryoka.”

³⁴ Ibheere amang’ana ghano Yesu :abhabhooriire abhaghëndi bhaache, bhataaghamanyiri. Ang’ana iyo neere ebhisuru ghokoobho. Wiiki bhataamanyiri neke aghosiikerera.

Yesu ^akahöri omohuku

(Mataayo 20:29-34; Maariko 10:46-52)

³⁵ Yesu naare aghating’i omoghya o Yeriko. Hayo rubhareka ro nchera iyo, naare ikeere omohuku umu, arasabha chambiiri. ³⁶ Hano oghwire abhaato bharu bharaheta hayo, akabhoori, “Neke ghekabhönëka?” ³⁷ Bhakamobhoorera, “Yesu o moghya o Nasareeti niwe akoheta.”

³⁸ Hayohayo, aghatiiri amaraka, arabhugha, “Yesu, Omoona o Tawuti, ondigheri changori!” ³⁹ Abhaato bhano :bhaare bhakangatiri, bhaakabha bharamohiinya

* 18:20 Mööhi Kohoroka 20:12-16; Kohiita kwo Meghiro 5:16-20

akire. Amare iwe, akeengera ghotiiri amaraka akamobherekera, “Oo Omoona o Tawuti, ondigheri changori!”

⁴⁰ Yesu akimeerera, akahatēka omohuku arēetu ghokooche. Hano amwishukeriire, Yesu akamobhoori, ⁴¹ “Neke okwenda neghukōrērē?” Akabhugha, “Omutēmi, neghusabha nibhōnē korighi.” ⁴² Yesu akamobhoorera, “Nuubhōnē korighi! Obhokumi bhoocho bhooghakuhōri.” ⁴³ Hayohayo, akarighi, akamtambana Yesu, araghongi Eryobha. Abhaato bhoose, hano :bharooche ghayo, bhoose bhaghasēema koreghongi Eryobha.

Yesu na Sakaayo

19¹ Hano Yesu are mo-rughēndō ro ghuye Yerusareemu, aghasōha mo-moghya o Yeriko, aghaati ghatēghate yaache. ² Mo-moghya uyo, naare-ho omwame umu, akobherekeru Sakaayo. Wiiki naare omokoro o bhatōbhi bha righōōti.

³ Iwe naare arenda korighi Yesu n-omooto o ngabhu, amare taatoriri gho kubha moghuhe are, no obhoyo bho bhaato mboore bhoramobhisheeki atamorighi. ⁴ Gho ghayo, aghaye ahonta ambērē e bhoyo bhuyo, aghatiira mo-mote o mokoowa, atore komorighi Yesu hano akubha araheta hayo.

⁵ Hano Yesu ahikiri hayo, aghagharaamereri ighoro e mote uyo, akabhugha, “Sakaayo! Nwike bhwango, gho kubha reero nekwenderu kuhōōyēra awaacho.”

⁶ Hayohayo Sakaayo aghiika bhwango, akamoghēnēhi Yesu awaache gho ghuchōmēru.

⁷ Abhaato bhoose, hano :bharooche ghayo, bhaghasēema kwing’unyaerang’unyaer, bharabhugha, “Kana aghaye kuraaghera mo-mooto o masari!” ⁸ Amare, Sakaayo akimeerera, akamobhoorera Omutēmi, “Oo Omutēmi, mōōhi! Ibheere, eribhaara re bheghiro bheene nekobhaha abhahabhe. Wiiki aribha nemuhōkiri omooto wowoose egheghiro, neekomugharokeri kane.”

⁹ Yesu akabhugha, “Reero ino, obhotoori ḥbhokahikera abhaato bha mo-ka ino, gho kubha omooto uno nerekiiri omwene kwo makōri ghaache kubha, n-o morwibhoro ro Abhurahamu. ¹⁰ Omoona o Mooto niichiri ghubabhara na ghotoori abhaato bhano bhaboriri.”

Eghetubhaani ghe chambiiri

(Mataayo 25:14-30)

¹¹ Abhaato bhano :bhaare bharamutēghēērera Yesu, :mbiituuriri kubha obhutēmi bho Ryobha mbokorwera hayohayo, gho kubha Yesu naare aghating’i Yerusareemu omoghya uno abhatēmi :bhaare bhariikara. ¹² Gho ghayo, akabhahoorera eghetubhaani akabhugha, “Naare-ho omooto umu o rwibhoro ro ghitēmi. Omooto uyo, aghakōra orughēndō ghuye ase e kure, gho ghiri aghi abhōnē obhutēmi, aramara agharuke ghukangata ase yaache.

¹³ “Akeere ataamara atanura, akabhahherekera abhatamishi bhaache ikomi, akabhaha mooto woose ekirēngērē ghegoro ghe chambiiri,* akabhahoorera, ‘Mukōrē obhosorocha na chambiiri chino mbagha hano neghugaruka.’ ¹⁴ Amare omooto uyo, abhaato bha ase iyo mbaare bhamurēghiri chwee. Bhaghatoma abhatomu bhaghi na kobhahoorera kubha, ‘Omooto uno, totakwenda abhe omutēmi wiito!’ ¹⁵ Nangabha bhaabhughiri ghayo, koru hang’u, akahaabhu obhutēmi. Ache ghugharuka, omutēmi uyo akabhahherekera abhatamishi bhano are aheere chambiiri, kubha kira mutamishi amobhoorere omutēmi naabhwine bhwerera ke.

* 19:13 *Ekirēngērē ghegoro ghe chambiiri.* Ekeyunaani ngeekobhugha, akabhaha kira umu mina ino ere n-amareho gha omutamishi kwo emyeri etato.

¹⁶ “Omutamishi o kimbërë akahika, akamobhoorera, ‘Omutëmi, kurëng’aana na chambiiri chino ore ontighiire, nebhwine obhwera, echende ikomi.’ ¹⁷ Omutëmi uyo akamobhoorera, ‘Omutamishi waane omuhëënë, nuköriri bhoheene! Kwo bhuure ore omuhëënë kwo moremo mosuuhu chwee, neeghokuha obhukangati ighoro e meghya ikomi.’

¹⁸ “Omutamishi o kabhere nawe akahika, akamobhoorera, ‘Omutëmi, kurëng’aana na chambiiri chino ore ontighiire, nebhwine obhwera, echende ishaano.’ ¹⁹ Omutëmi akamobhoorera, ‘Iye, neeghokuha obhukangati ighoro e meghya etaano.’

²⁰ “Omutamishi owonde akahika, akabhugha, ‘Omutëmi, chambiiri cheecho ghachino hano. Neechebhisiri mo-ghitambara, kubha chetabhora. ²¹ Niiköriri hang’u gho kubha neghotiini iye, m-mooto muhaari onyi. Noghughëgha bhino otatindekiri, na nooghotu bhino oteemiri.’

²² “Omutëmi akamobhoorera, ‘Iye n-omutamishi mobhe onyi! Ibheere neeghoghotenera ekiina kurëng’aana na amang’ana ghaacho iye mwene. Tigha noobhughiri weech kubha eni m-mooto muhaari chwee neenyi? Neghughëgha bhino ntatindekiri, na neeghotu bhino ntyemiri?’ ²³ Aribha hang’u neenyi, neke ibheere ghiighëririri otantoorera chambiiri cheene bhenki, kubha nechiiimoki haghiirohamu no obhwera bhooshe neraacha ghugharuka?’

²⁴ “Hayohayo, akabhabhoorera abhaato bhano :bhaare bhimeriire hayo, ‘Momuhökë chambiiri chiyo, momuhe uno abhwine obhwera ikomi.’

²⁵ Bhakamobhoorera, ‘Oo Omutëmi, kana uno naanyi ni ikomi!’

²⁶ “Akabhugha, ‘nekabhabhoorera kubha, omooto woose uno akuhökëri bhoheene kino anyi nakyo, naakwengeru ebhende. Amare, omooto uno atakuhökëri kino anyi nakyo bhoheene, koru kiire anyi nakyo mbaakomuhöka.

²⁷ Ibheere, abhabhisa bhaane bhoose bhano bhataare bhareenda nibhe omutëmi waabho, mobharëëtë hano, mobhiite ambërë yaane!”

Yesu ^aghaturung’aneri Yerusareemu gho chandiryato

(Mataayo 21:1-11; Maariko 11:1-11; Yohana 12:12-19)

²⁸ Hano Yesu amariri ghosiikera ghayo, aghakangata ambërë aghaghööta orughëndö rooch ro kwerekerä Yerusareemu. ²⁹ Hano ating’iri ebhyaro bhe Bhetibhaaghe na Bhetaniya, mo-gheghoro kino ghekobherekeru ke Miseyituuni, akabhatoma bhaghëndi bhaache bhabhere, ³⁰ akabhabhoorera, “Mughëndë mo-kyaro kino keenyi ambërë yiito. Hano mooghusöha-ho, mookubhöna omoona o tikere abhöhuru uno akeere ataamara aghëgha mooto. Momusaasure, momurëëtë hano. ³¹ Mbe, aribha omooto arabhabhoori, ‘Neke ^gheghaghëri mokamusaasura?’ Momobhoorera, ‘Omutëmi nakomwenda.’”

³² Mbe, abhaghëndi bhaache bhayo bhaaghaye, bhakarighi ebheghiro bhyose bheenyi kinya bhuure Yesu are abhabhooriire. ³³ Hano :bhaare bharamusaasura omoona uyo o tikere, abheene bhakabhabhoori, “Neke mokomusaasurera omoona uyo o tikere?” ³⁴ Bhakabhabhoorera, “Omutëmi nakomwenda.”

³⁵ Bhaakamurëëtëra Yesu omoona uyo o tikere. Hano bhaahikiri, bhakaara changibho cheebho ighoro e moona uyo o tikere, bhakamara bhakamotiiri Yesu ighoro yaache.

³⁶ Hano Yesu are araghe, abhaato bhakaara changibho cheebho mo-nchera.

³⁷ Hano are ating’iri omohiringito o gheghoro ke Miseyituuni, obhoyo bhoose bho bhaghëndi bhaache bhaghasëëma ghoghongi Eryobha gho ghuchömëru ighoro e bhiraghe bhyose bhino bharooche. Bhaghatiiri amaraka ghaabho, ³⁸ bharabhugha,

“Nitabhiiru omutēmi uno akuucha kwo riina re Mutēmi Waryobha.*
Mwishaaro, habhe no omurēmbē, ggate Eryobha na abhaato bhaache.
Ntocomogongi Waryobha uno anyi ighoro e bhyose!”

³⁹ Mo-bhoyo bhuyo, mbaare-mu Amabharisaayo. Ibheere, bhakamobhoorera Yesu, “Omweghi, obhabhoorere bhaghēndi bhaacho bhatighe ghosiikera ghayo!”
⁴⁰ Yesu akabhagharokeri, “nekabhabhoorera, aribha bhano bharakira, amabhohe ngaaghotiiri amaraka!”

Yesu akaworerera omoghya o Yerusareemu

⁴¹ Hano Yesu ating’iri omoghya o Yerusareemu akaworigi, aghasēema koworerera. ⁴² Akabhugha amang’ana ighoro yaache, “Neere kwenda chwee reero ino kubha nongamanyiri koru iye, anchera e kubhōna omurēmbē! Amare ibheere neebhisuru mo-miisho ghaacho, ⁴³ gho kubha mo-chaasiko chino chekuucha, abhabhisa bhaacho mbaaghokwabhēkera eribhendo rekwinaareri bhakurōnē koru chambaara choose. ⁴⁴ Abhabhisa bhayo, mbaghokuhaanyurera haase iye na abhaato bhaacho bhoose. Retaanyi-ho eribhohe rino reghusaagha ighoro e riibhohe erende! Bhano bhamenyiri moose mbaghosireekerera, gho kubha hano Eryobha :reekuretiire obhotoori, tobhumanyiri.”

Yesu aghasōha Mwisēngērō

(Mataayo 21:12-17; Maariko 11:15-19; Yohana 2:13-22)

⁴⁵ Niho Yesu aghasōha Mwisēngērō, aghasēema kobhahēebha abhaato bhano :bhaare bharaghoru ebheghiro muyo. ⁴⁶ Akabhabhoorera, “Yandekuru mo-Mandeko gha Ryobha, ‘Anyumba yaane, neekubha Anyumba e ghusēngēra’* Amare inyu, mokayikōra kubha akoobho e manyangara.”*

⁴⁷ Chaasiko choose, Yesu naare areeghi abhaato Mwisēngērō. Abhakorō bha bhachaama, haghirohamu na bheeghi bha meghiro ghe Musa na abhakangati bha Bhayahuuti, mbaare bharatabhara kebhuo bhakomwita, ⁴⁸ amare bhataabhwine omweya, gho kubha abhaato bhoose mbaare bharaghatēghēērera amang’ana ghaache bhoheene na ghoghatereera chwee.

Eribhoori ighoro e bhukangati bho Yesu

(Mataayo 21:23-27; Maariko 11:27-33)

20¹ Orosiko rumu hano Yesu are areeghi abhaato Mwisēngērō na kobharaghaneri Ang’ana Anchōmu e Ryobha. Niho abhakorō bha bhachaama, abheeghi bha meghiro, na abhagharuka bha Bhayahuuti bhakamusēeta, ² bhakamobhoori, “Notobhoorere, ghaare ore orakōra, nuukōriri kwo bhukangati bhawwe? Wiiki niwe :akoheere obhukangati bhuyo?”

³ Akabhagharokeri, “Ibheere eni neekobhabhoori eribhoori. Momboorere, ⁴ obhukangati bho Yohana bho kubhatiisa mborweriire kwo Ryobha ghasi kwo bhaato?” ⁵ Hayo, bhakabhoorani bharabhugha, “Torabhugha kubha Eryobha niryo :reemotomiri Yohana kubhatiisa, naakobhugha, ‘Mbe! Neke motaamokumiri?’

⁶ Wiiki toragharokeri kubha obhukangati bhooche mboore bho bhaato, abhaato bhoose mbaaghoturasā amabhohe, gho kubha mbaakumiri kubha Yohana murōōti are.” ⁷ Antenero, bhakamobhoorera, “Toteeche obhukangati bhooche hayi bhorweriire.”

* 19:38 Mōōhi Sabhuri 118:26.

* 19:46 Mōōhi Isaaya 56:7.

* 19:46 Mōōhi Yeremiya 7:11.

⁸ Yesu akabhabhoorera, “Koru eni, ntekobhabhoorera n-kwo obhukangati ke nguköra ghano.”

Eghetubhaani ke moghondo o misabhiibhu na abharemi

(Mataayo 21:33-46; Maariko 12:1-12)

⁹ Akamara, Yesu akabhabhoorera abhaato eghetubhaani akabhugha, “Naare-ho omooto umu, uno emiri emisabhiibhu mo-moghondo waache. Akamara akawuhaana kwo bharemi, aghaye orughëndö mo-se e kure, akamara chaasiko chaaru anyi iyo. ¹⁰ Hano chaasiko che riighësa chehikiri, akamotoma omutamishi waache kwo bharemi bhayo, kubha bhamuhe eribhaara re munöghö. Amare, hano omutamishi uyo ahikiri, abharemi bhayo bhaakamutëma chwee, bhakamuhëëbha mabhökö bhoowa.

¹¹ “Omwene omoghondo, akamotoma omutamishi owonde. Omutamishi uyo woose bhaakamutëma bhakamosooki, bhakamara bhakamuhëëbha mabhökö bhoowa. ¹² Akamotoma omutamishi o ghatato. Uyo woose bhakamunyahaara, bhakamuhëëbha.

¹³ “Antenero, omwene omoghondo arabhugha, ‘Ibheere, nikörëbhu? Kuno, nekomotoma omoona waane uno nsiighiri! Handaabhe uno, mbakomosooka.’

¹⁴ Amare, hano abharemi bhayo bhamorochoe, bhakabhugha, ‘Uno niwe aghughabha ebheghiro bhi ishe. Ibheere ntomwite, aghabho yaache ibhe ghokwito.’ ¹⁵ Mbe, bhakamoruusi anche e moghondo, bhakamwita.”

Niho Yesu akabhabhoori, “Ibheere, omwene omoghondo uyo nibhu akobhaköra abharemi bhayo? ¹⁶ Nakuucha na kobhiita, no omoghondo uyo, naakobhaha abhande!” Hano abhaato bhogwire amang’ana ghayo, bhakabhugha, “Amang’ana ghayo ghataacha korwera naabha!”* ¹⁷ Yesu akabhamöghörëra amiisho, akabhabhoori, “Mbe! amandeko ghayo neke ghakwerekö?”

‘Eriibhohe riire abhaabhëki :bhaangiri,

niryo ribheere Eriibhohe ikoro re bhoroso.’*

¹⁸ “Omooto wowoose aragho ighoro e riibhohe riyo, naaghoteneka ebhetenekateneka, na uyo reramoghwera, ndeekomuse chwee.”

¹⁹ Abheeghi bhayo bha meghiro ghe Musa na abhakoro bha bhachaama, bhaakamanya kubha eghetubhaani kino ngekeebho keere. Ibheere bhakeenda komughööta hayo hayo, amare bhaghatiina obhoyo bho bhaato.

Eriibhoori re komutëgha ighoro e koruusi righöoti

(Mataayo 22:15-22; Maariko 12:13-17)

²⁰ Gho ghayo, abhakoro bha Bhayahuuti, bhaakabha bharamusaacha chwee, bhaghatoma abhaseghaayi bhano bhiiköriri kubha m-mbaato bhachömu. Amare, mbaare bharatabhara bhamughöötë Yesu kwo mang’ana ghaache, kubha bhamohire mo-mukangati uno atooruru na Kayisaari, bhamusëmë.

²¹ Ibheere, abhaseghaayi bhayo bhakamobhoori, “Omweghi, ntweche kubha ang’ana yoose ino oghosiikera na kweghi n-ehëënë. Wiiiki nokweghi amang’ana gha Ryobha kwo bhuhëënë, abhaato bhamënyë kinya okwenda wiiki tokwibhatereri mooto wowoose. ²² Mbe! Kana, mo-meghiro ghe Musa, ntoghwisherereri tomoruuseri Kayisaari erighöoti, ghasi totamoruuseri?”

²³ Hayohayo Yesu akamanya obhobhe bhoobho, akabhabhoorera,

²⁴ “Monyeereki orobhiiri ro tinaari. Abhicha ino, ne eriina rino, n-ndyawe?”

* 20:16 Mööhi Isaaya 5.

* 20:17 Mööhi Sabhuri 118:22.

Bhakamobhoorera, “N-nde Kayisaari.” ²⁵ Yesu akabhabhoorera, “Mbe, bhe Kayisaari, momuhe Kayisaari. Wiiki bhe Ryobha, morihe Eryobha.”

²⁶ Erigharokeri riyo re Yesu, reekabharoghoori chwee, reekabhakiri. Bhataatoriri komughööta kwo mang’ana ghano asikiire ambërë e bhaato.

Eribhoori ighoro e koryoka

(Mataayo 22:23-33; Maariko 12:18-27)

²⁷ Ibheere mbaare-ho abhaato :bhaare bharabherekeru amasatukaayo, mbaare bhareeghi abhaato kubha abhaku bhatakoryoka, bhakamusëeta Yesu bhakamobhoori, ²⁸ “Omweghi, mo-meghiro ghe Musa ntoghusöma kubha, aribha omooto akuure, aghatigha mkaache ataanyi na moona, nekwenderu omonyoni waache amokwire omosino uyo, gho ghiri amwibhorere omosiri abhaana.

²⁹ Ibheere tobhughe, mbaare-ho abhabhureni mohungate bhano bhibhwiru anda imu. Omoona o kimbërë aghakwira omukari, aghaku ataanyi na moona.

³⁰ Omosuuhu waache o kabhere, akamughabha omosino uyo woose aghaku [atiibhwire nawe]. ³¹ Akamara o ghatato, woose akamughabha, aghaku. Ekabha hang’uhang’u kwo bhoose mohungate. Bhayo bhoose, bhaaghaku Bhataatighiri moona wowoose. ³² Antenero, omukari uyo woose aghaku. ³³ Ibheere! Orosiko ro koryokibhu, omukari uyo naakubha mka we? Gho kubha, abhasubhe bhayo bhoose mohungate mbaamokwiriri!”

³⁴ Yesu akabhabhoorera, “Abhaato bha riibhagha rino mbaghokwira na ghokwiru. ³⁵ Amare bhaare Eryobha reroche mbakurëng’aanera koryokibhu mo-bhaku na kumënya mo-se ahe, bhayo bhataghokwira, koru ghokwiru. ³⁶ Wiiki bhataaghotora ghoku, gho kubha mbaakubha kinya bhamarayika. Mbaakubha abhaana bha Ryobha, gho kubha mbaryokiibhu koru mo-bhaku.

³⁷ “Koru Musa naabhooriire abhaato kubha abhaku mbakoryoka. Mo-mandeko ghano :andekiri ighoro e ghisaka kiire keere keraaka omororo, :naabhughiri kubha Omutëmi Waryobha ‘Niryo Eryobha re Abhurahamu, na re Isaka, na re Yakobho.”*

³⁸ Ibheere Nangabha abhaato bhayo bhatato :bhaare bhakuure hayo kare, Eryobha ndeebhughiri ibho m-mbahöru ghokooche! Gho ghayo, bhano bhakuure na abhaato abhahöru bhoose m-mbahöru ghokooche.”

³⁹ Hayo, abheeghi abhamu bha meghiro ghe Musa bhakabhugha, “Omweghi, aghagharokeri bhoheene chwee!” ⁴⁰ Korwera eriibhagha riyo, bhaakabha bharatiina komobhoori amabhoori aghande.

Kirisito n-Omoona o Tawuti no Omutëmi o bhaato bhoose

(Mataayo 22:41-46; Maariko 12:35-37)

⁴¹ Akamara Yesu akabhabhoori Abhayahuuti bhayo, “Ngwake bhaakobhugha kubha, Kirisito no Omoona o mutëmi Tawuti? ⁴² Tawuti omwene, mo-ghitabhu ghe Sabhuri, :naabhughiri kubha,

‘Omutëmi Waryobha :naamobhooriire Omutëmi waane,

“Wiikare eribhaara re kubhökö koone gho kiwiro,

⁴³ mbagha neghukörë okinde abhabhisa bhaacho na kobhakangata.”**

⁴⁴ “Hayo, Tawuti omwene :naabhughiri kubha Kirisito niwe Omutëmi waache. Ibheere, Kirisito nibhu ^aghotora abhe omoona waache wiiki?”

* 20:37 Mööhi Kohoroka 3:6.

** 20:43 Mööhi Sabhuri 110:1.

Yesu ^akabhanga abheeghi bha meghiro

(Mataayo 23:1-36; Maariko 12:38-40; Ruuka 11:37-54)

⁴⁵ Hano obhoyo bho bhaato :bhaare bharamutëghëërëra, Yesu akabhoorera bhaghëndi bhaache akabhugha, ⁴⁶ “Mwikabhaahe na abheeghi bha meghiro! Mbasiighiri ghughënda bhabheekiri chandachana cheebho inde. Wiiki, mbasiighiri ghukëëribhu gho sooko mo-mitëëra, na ghwikara mo-bhetumbe bhe sooko mo-chanyumba che Ryobha, na mo-bhughëni. ⁴⁷ Bharasabha Eryobha kwo mang’ana maaru ambërë e bhaato gho kwiyeereki bhabharighi kubha mbachömu. Amare ibho mbahaahöka abhasino ebheghiro bheebho! Abhaato bhanga bhayo, Eryobha ndekobhatenera ekiina ghokera abhande!”

Eriruusi re mosino

(Maariko 12:41-44)

21 ¹ Yesu hano are Mwisëngërö, akabharighi abhaame kinya :bhaare bhararuusi amaruusi ghaabho mwisandeko re maruusi. ² Akamorighi wiiki omosino umu muhabhe aratoora muyo chaachabha ibhere.

³ Ibheere, Yesu akabhabhoorera, “Nekabhabhoorera gha hëënë kubha, omosino uno omuhabhe, niwe aruusiri ekirëngërë ghegoro ghokera abhande bhoose.

⁴ ^Nekabhabhoorera hang’u gho kubha amaruusi ghano bharuusiri bhano bhoose, n-ahaghiro hasuuha hang’u ha bheghiro bheebho bhyaru. Amare omosino uno omuhabhe, ^naruusiri bhyose bhino are nabhyo.”

Yesu ^akaröota kuhaanyoru kwo Risëngërö

(Mataayo 24:1-2; Maariko 13:1-2)

⁵ Abhaghëndi abhamu, mbaare bharasiikera ighoro e Risëngërö, kebhuno richöchuru na amabhohe machömu, haghirohamu ne ebheghiro ebhende bhino abhaato bharusiiri Eryobha. Ibheere Yesu akabhugha, ⁶ “Mbe, ghano ghoose mookorighi, chaasiko nchekuucha chino motaakorighi koru eriibhohe rimu rino reghusaagha ighoro e rende. Ghoose ngakuhaanyureru haase!”

Yesu ^akaröota anyaako e bhaghëndi bhaache

(Mataayo 24:3-14; Maariko 13:1-13)

⁷ Wiiki bhakamobhoori, “Omweghi, amang’ana ghayo ngakorwera nyingake? Wiiki haakubha ne ekyerekereri ke, kino gheghotwerekiki kubha ^ghaghating’i?”

⁸ Akabhagharkeri, “Ibheere mubhe miisho, motaacha kong’iinu. Abhaato bhaaru mbakuucha kwo riina reene bharabhugha, ‘Neni wuure wuure.’ Wiiki, mbakobhugha, ‘Eriibhagha riire, ^reeghating’i.’ Abhaato bhayo, motabhatambana! ⁹ Hano mokuucha kooghu amang’ana gha mahe, na anyoori yaaru, motatiina. Ghayo ghoose, ngakwenderu gharwera singa, amare antenero e ghoose, ekeere.”

¹⁰ Yesu akeengera kobhugha, “Ase na ase nchekuröona, obhutëmi no obhutëmi, mbookuröona. ¹¹ Ngeekubha-ho emerighito megoro ghe se, na chaase chaaru, ncheghusöhërëru na aghëëcha ihaari chwee. Wiiki ngaakubha-ho amabhabharu maaru. Mwighoru, mbeekubha-ho ebhyerekereri bhegoro na amang’ana gha ghutaki abhaato chwee.

¹² “Amare, hano ghaakubha ghayo ghoose ghakeere kwiyerekani, abhaato mbakobhaghöota na kobhahira mo-chanyumba che Ryobha, na mbakobhabhöha mo-maghërëcha, bharabhanyaaki. Wiiki mokohiru ambërë e abhatëmi na abhakangati, gho kubha inyu m-mbaghëndi bhaane moonyi. ¹³ Hayo niho mookubhöna omweya o kuraghani ang’ana yaane.

¹⁴“Gho ghayo, mwishererani mo-metema gheenye gho ghaare mookubha mwisëemiri gho ghwitachura koonyu mokeere ghusëmu. ¹⁵Eni mwene, nekobhaha amang’iini na amang’ana ghano moghosiikera, koru abhabhisa bhaanyu bhataaghotora ghoghanga hamu kobhakinda.

¹⁶“Eriibhagha riyo mokuhaanu kwo bhakangati na abhiibhori bhaanyu, bhawomoonyu, abhahiiri bhaanyu, na abhasaani bhaanyu. Wiiki abhamu ghate yaanyu moghwitu. ¹⁷Abhaato bhaaru mbakobharëgha gho ghiri e riina reene. ¹⁸Amare, rotaakobhoro koru orochweri rumu ro mitu gheenye! ¹⁹Obhuhöru bhoonyu mbooghotooribhu, hano moghoghumereri.”

Yesu ^akarööta kubha Yerusareemu nekuhaanyoru

(Mataayo 24:15-21; Maariko 13:14-19)

²⁰“Hano mookorighi omoghya o Yerusareemu winariiru na abhakeeya, niho mokumanya kubha eriibhagha ^reeghating’i re moghya uyo ghusaribhu. ²¹Kwo riibhagha riyo, bhaare bhaanyi mo-muköowa o Yuteya, bhitoori gho kung’ösëra mo-bheghoro. Wiiki bhaare bhaanyi mo-moghya o Yerusareemu, bharu muyo bhwango, na bhaare bhaanyi anche e moghya o Yerusareemu, bhatagaruka mo-moghya. ²²Mo-chaasiko chiyo, Eryobha ndekorehani asiire, kubha amang’ana ghoose ghano ghandekuru na abharööti bha kare, ghahikeerane. ²³Horeera mbaakorighi abhakari bhano bhihoochiri, na bhano bhaghughööki! Mo-se ino, haakubha na anyaako ihaari chwee, wiiki Eryobha ndekobhatenera ekiina abhaato bha ritöngö rino. ²⁴Abhaato abhande, mbaghwituru kwo mohyo. Wiiki abhande, mbaaghughöötu na kobhahira mo-chaase echende. Mo-moghya o Yerusareemu, abhaato bha matöngö mbakuucha na kowukangata gho changuru, mbagha chaasiko cheebho chehikeerane.”

Yesu ^akarööta kubha Omoona o Mooto nakuucha

(Mataayo 24:29-31; Maariko 13:24-27)

²⁵“Wiiki haakubha ne ekyerekereri koru mo-ryobha, na mo-mweri, na mo-chanchöta. Wiiki hano mo-se, chanyancha ncheekubha ne emekunda mihaari chwee cheraherera. Ibheere kurëng’aana na amang’ana ghayo, ngaghughëri abhaato bha chaase bhahbe na ahaho na kobhori omurëmbë. ²⁶Ghayo ghoose, hano ghakuucha mo-se ino, abhaato mbaaghotiina chwee. Mbaakubha ^bharateni kurëng’aana na ghotiiniibhu, gho kubha, ebheghiro bhino bheenyi mwithoro mbeekubha bherasingisu.

²⁷“Hayo niho abhaato bhakorighi Omoona o Mooto, araacha Mwishaaro, anyi na changuru no obhokumi bhokoro. ²⁸Ghayo ghoose, hano ghaaghushëema ghukörëka, mwimeerere muköng’ëri, mwitoore omukörö, gho kubha eriibhagha re ghotooribhu koonyu, ^reeghating’i!”

Eghetubhaani ke mote uno okobherekeru omotiini

(Mataayo 24:32-35; Maariko 13:28-31)

²⁹Akamara, Yesu akabhabhooorera bhaghëndi bhaache eghetubhaani kino, akabhugha, “Mumööhi omote uno okobherekeru omotiini, ne emete eghende ghyose. ³⁰Hano okorighi kubha ^gheghasëema ghosebhoka, hayohayo mokumanya kubha eriibhagha re maghësa ^reeghating’i.

³¹“Hang’u hang’u morarighi ghayo ^ghaghakörëka, mumënyë kubha obhutëmi bho Ryobha ^bhoghating’i. ³²“Nekabhabhooorera gha hëënë kubha, orwibhoro runo rotaakoheta, eriibhagha ghano ghoose ghakeere ghukörëka. ³³Erishaaro na ase mbeekoheta, amare amang’ana ghaane ghataakoheta naabha!”

Mubhe miisho

³⁴ “Mubhe miisho, motaacha ghokeru na amabhe ghoose, ne ebhireebhi, na anyaako e riimënya rino. Wiiki moraanga kubha miisho, orosiko runo ro ntenero ndookobhahikera bhwango na kobhataki! ³⁵ Orosiko ruyo, ndookobhabhõna abhaato bhoose bha mo-se yoose. ³⁶ Gho ghayo, mubhe miisho eriibhagha ryose! Mwikõng’i ghusabha Eryobha kubha, rebhatoori ghwisacha ghayo ghoose gha kuucha korwera, muuche motore kwimeerera ambërë e Moona o Mooto.”

³⁷ Mo-chaasiko chiyo, Yesu naare areeghi abhaato mwishe moghima Mwisëngërö. Obhotiko, naare araghe komisi mo-gheghoro kino ghekobherekeru ke Miseyituuni. ³⁸ Gho chaasiko choose, abhaato bhoose mbabhookiri hakeere kuucha Mwisëngërö, kubha bhamutëghëërë.

Yuuta aghishereri komwigharurani Yesu

(Mataayo 26:1-5, 14-16; Maariko 14:1-2, 10-11; Yohana 11:45-53)

22 ¹ Anyangi e Mighaate ghino Ghetahaghaasa, neere eghating’i. Ino ekobherekeru Abhaasaka. ² Eriibhagha riyi abhakoro bha bhachaama, haghirohamu na abheeghi bha meghiro, mbaare bhatabhara kebhuno bha komwita Yesu. Amare bhaakabha bhartiina abhaato.*

³ Mbe, Eriishambu rekamusöhërëra Yuuta. Uno akobherekeru Isikariyote, umu o bhaanabheegha ikomi na bhabhere bha Yesu. ⁴ Ibheere, Yuuta aghaye mo-bhakoro bha bhachaama, na mo-bhakoro bha bhachongi bha Risëngërö. Akabhoorani nabho kebhuno akomuhaana Yesu ghokoobho. ⁵ Amang’ana ghayo, ghakabhategheri chwee, bhaghiishererani nawe komuha chambiri. ⁶ Yuuta aghishereri, hayohayo aghasëema ghutabhara omweya o komuhaana Yesu eriibhagha abhaato bhaaru bhataanyi-ho.

Anyangi e Bhaasaka

(Mataayo 26:17-30; Maariko 14:12-26; Yohana 13:21-30; 1 Abhakorinto 11:23-25)

⁷ Orosiko ro nyangi e Mighaate ghino ghetahaghaasa, rookahika. Niro orosiko runo omoona o ng’õndu o Bhaasaka ahaghõõghu kira aka. ⁸ Ibheere, Yesu akabhatoma Bheetero na Yohana, akabhabhoorera, “Mughëndë, motukörërë ekiinyakure ke Bhaasaka, gho ghiri turaaghëra haghirohamu.” ⁹ Bhakamobhoori, “Nokwenda toghikörërë hayi?”

¹⁰ Akabhagharokeri, “Hano moghusõha mo-moghya o Yerusareemu, moghutëmëërana no omosubhe umu, aghëghiri anyongo e manche. Momoru anyuma mbagha mo-nyumba ino aghusõhëra. ¹¹ Hano mookohika momobhoorere omwene aka, omweghi nakobhoori, ‘Ekyumba ke bhaghëni hayi keenyi? Nekwenda koreera-mu ekiinyakure ke Bhaasaka haghirohamu na abhaanabheegha bhaane.’ ¹² Naakobhahira irëngö, naakobhereki ekyumba ghegoro, muyo mookubhõna ebheghiro bhyose bheenyi-mu. Motukörërë ekiinyakure ke Bhaasaka muyo.”

¹³ Abhaanabheegha bhayo bhabhere, hano bhoghwire ghayo, bhaaghaye, bhakabhõna ghoose ghaanyi kinya Yesu abhabhooriire. Bhaghasëema ghukõra ekiinyakure ke Bhaasaka-mu.

¹⁴ Eriibhagha re ndaaghera rekahika, Yesu aghiikara mo-ndaaghera, haghirohamu na abhatomu bhaache. ¹⁵ Akabhabhoorera, “Ibheere niighombiri chwee kure ekiinyakure kino ke Bhaasaka haghirohamu na niinyu nekeere

* 22:2 Mööhi Ruuka 19:47-48.

kunyaakibhu! ¹⁶ Nekabhabhoorera kubha nteekure wiiki ekiinyakure ke Bhaasaka mbagha kino kyendiiru na Abhaasaka kehikeerane mo-bhutēmi bho Ryobha.”

¹⁷ Yesu akiimoki eghisēnchō ke divaayi, aghaghiitabheri, akabhaha, akabhugha, “Mwimoki moghuserane! ¹⁸ Nekabhabhoorera kubha nteekunyo wiiki adivaayi, mbagha obhutēmi bho Ryobha bhuuche.”

¹⁹ Yesu akiimoki Omughaate, aghitabheri Eryobha, akawosuura, akabhaha abhatomu bhaache, arabhugha, “Uno, n-omobhere waane, uno okoruusibhu gho ghiri yaanyu. Mubhe morakōra hang’u, gho kohiita!”

²⁰ Hano bhamariri kure ekiinyakure ke mughörōōbha, Yesu akiimoki wiiki eghisēnchō kiyo, akabhugha, “Adivaayi ino enyi mo-ghisēnchō kino, n-eriiraghano erihe. Eryobha ndekorehikeerani, gho ghwhiteka kwo masaaha ghaane gho ghiri yaanyu, motooribhu.

²¹ “Amare morighi! Ure akonyigharurani, ntooghukōri nawe haghirohamu.

²² Omoona o Mooto, naaghuye ghwitu, kinya bhuure are endiiru. Amare, nakorighi wuure akuucha komwigharurani!” ²³ Ibheere, abhatomu bhayo, bhaghasēema kobhoorani abheene kwo bheene, niwe ggate yaabho angatoriri ghukōra ang’ana iyo.

Erihakaana ighoro e bhokoro

²⁴ Hakarwera erihakaana ggate e bhaanabheegha bha Yesu, kubha niwe ggate yaabho akubha omokoro ghokera abhande. ²⁵ Erihakaana riyo Reghaghēri Yesu akabhabhoorera, “Kwo bhano bhataaghokumi Eryobha, abhatēmi bha chaase mbahaabhakangata abhaato bhaabho gho changuru, nabho mbahiibherekera kubha na abhatoori bha bhaato.

²⁶ “Amare inyu, motabha hang’u. Ibheere ggate yaanyu, uno anyi omokoro ghokera abhande, abhe kinya mosuuhu. No omukangati, abhe kinya n-omutamishi. ²⁷ Ibheere! Niwe omokoro ghokera abhande? N-uno ikeere mo-kinyakure, ghasi n-uno akurēeta ekiinyakure? Taanyi wuure ikeere mo-kinyakure? Koru hang’u, eni neenyi ggate yaanyu, kinya omutamishi.*

²⁸ “Inyu, hano neere neranyaakibhu, niinyu musaaghiri naane. ²⁹ Ibheere, nekobhakōra mubhe abhatēmi, kinya bhuure Taata waane ankōriri kubha omutēmi, ³⁰ ntookubha toraraghera ebhiinyakure na kunyo haghirohamu. Na moghwikara mo-bhetumbe bhe bhokumi, moratenera ekiina amatōngō ikomi na abhere gha Bhiisiraeri.”

Yesu akamobhoorera Bheetero kubha nakomwanga

(Mataayo 26:31-35; Maariko 14:27-31; Yohana 13:36-38)

³¹ Yesu akabhugha, “Oo Simiyooni, oo Simiyooni! Mōōhi, Eriishambu ndebhendiri, ribhōnē kobhasēesa inyu bhoose kinya bhahasēesa angano.

³² Amare, neghusabhiire kwo Ryobha, kubha otakindu mo-bhokumi bhoocho. Na hano okubha ungarōkiire, obhatoore changuru abhaghēndi.” ³³ Simiyooni akamugharokeri, “Oo Omutēmi wiito! Eni nisheriiri ghuye kubhōhu haghirohamu na niye mwighērēcha. Koru ghwitu, nisheriiri ghoku!”

³⁴ Yesu akamugharokeri, “Oo Bheetero! Neeghakobhoorera kubha reero ino asērēcha ekeere ghughamba, nookubha okanyanga ghatato.”

* 22:27 Mōōhi Yohana 13:1-20.

Eriibhagha re bhobhe.

³⁵ Akamara, Yesu akabhoori abhaanabheegha bhaache, “Hano nehaabhatoma motaanyi ni ighöchi re chambiiri, na motaanyi na asako, koru bhewera, kana mobhwine nyaako yoyoose?”* Bhakamugharokeri, “Tiyaanyi.”

³⁶ Yesu akabhabhoorera, “Amare ibheere, aribha omooto anyi neerighöchi re chambiiri, na asako, abhiimoki. Na aribha tughööt omohyo, oghori righöoti reecho, oghore umu. ³⁷ Yandekuru, ‘Nabhareriinu haghirohamu na bhamasari.’* Amang’ana ghano ngandekuru ighoro yaane. `Nekabhabhoorera kubha nekwenderu ghakörökane ghokoone, nagho haghuhu ghaanyi ghukörëka ibheere.”

³⁸ Bhayo bhakamobhoorera, “Oo Omutëmi wiito! Mööhi! Hano ngaanyi-ho amashabha abhere.” Nawe akabhugha, “Motighe hang’u.”

Yesu ^aghasabha Eryobha Ghetesemaani

(Mataayo 26:36-46; Maariko 14:32-42)

³⁹ Yesu akaru Yerusareemu, aghaye mo-gheghoro ke Miseyituuni, kinya are anariri. Abhaanabheegha bhaache bhakamutambana. ⁴⁰ Hano ahikiri mo-gheghoro kiyo, akabhabhoorera kubha, “Musabhe Eryobha, motaacha ghusöha mo-masaki.”

⁴¹ Mbe, akabhatigha hayo, aghiishuka hasuuu. Akabhuna ebheru, aghasabha Eryobha akabhugha, ⁴² “Oo Taata! Oreenda, onduuseri anyaaako ino enyi ambërë yaane. Amare etabha kinya nekwenda eni, amenda ghaacho ghakörökane.”

⁴³ Hayohayo, Marayika koru Mwishaaroo akamorwera Yesu, akamotoora changuru.

⁴⁴ Eriibhagha riyo Yesu naare mo-bhororo bhwaru chwee mo-körö, bhookamuköra iköng’i ghusabha Eryobha. Hano are arasabha Eryobha, akaru ebhigheri bhethubhiine na amasaaha, bheekabha bheratoonya haase.

⁴⁵ Ibheere hano amariri ghusabha Eryobha, akimeerera, akabhagarukera abhaanabheegha bhaache. Akabhöna bhamisiri gho kubha mbaare bhatamuru kwo macheeche. ⁴⁶ Akabhabhoori, “Ghwake momisiri? Mobhooke! Musabhe Eryobha, motaacha ghusöha mo-masaki.”

Yesu ^agghöotu

(Mataayo 26:47-56; Maariko 14:43-50; Yohana 18:3-11)

⁴⁷ Eriibhagha Yesu are akeere arasiikera ghayo, abhaato bhaaru bhakamusëeta bhakangaturu na Yuuta, umu o bhaanabheegha bhaache ikomi na bhabhere. Niho, Yuuta akamwishukerera Yesu, akamukëeri kwo miigha.

⁴⁸ Yesu akamobhoori, “Oo Yuuta! Kana nokomwighaturani Omoona o Mooto gho komukëeri kwo miigha?” ⁴⁹ Abhaanabheegha bhayo bha Yesu, hano bhamanyiri ghano ghaaghukörëka, bhakamobhoori, “Oo Omutëmi wiito! Kana tobanungenunge na amashabha ghiito?”

⁵⁰ Hayohayo, umu obhayo akamunyëra omutamishi o Muchaama Omokoro no omohyo, akamonunga oghotu gho kiwiro. ⁵¹ Yesu akabhugha, “Motighe ino eghiisha!” Aghaturi oghotu kwo mutamishi uyo, aghakuhöri.

⁵² Mo-bhaato bhano bhiichiri komughöota Yesu, mbaare, abhakoro bha bhachaama, abhakoro bha bhachongi bha Risëngëro, na abhagaruka bha Bhayahuuti. Yesu akabhabhoori, “Aa! Kana neke moghansëeta na amashabha na charungu, kinya mwichiire omwibhi?” ⁵³ Hano chaasiko choose, ntoore torahöoya haghirohamu Mwisëngëro, motangootiri! Amare ibheere, rino niryo eriibhagha reenyo, re bhukangati bho Riishambu.”

* 22:35 Mööhi Ruuka 9:3, 10:4.

* 22:37 Mööhi Isaaya 53:12.

Bheetero ^akamwanga Yesu

(Mataayo 26:57-58, 69-75; Maariko 14:53-54, 66-72; Yohana 18:12-18, 25-27)

⁵⁴ Hayohayo, abhachongi bha Risëngërö bhakamughööta Yesu, bhakamohira awaache Omuchaama Omokoro. Bheetero akabharu anyuma gho kure. ⁵⁵ Hano abhaato bhahikiri mo-riigho re nyumba e muchaama, bhakahemba-ho omororo bhaghiikara ghwata. Bheetero nawe, akaacha aghiikara ggate yaabho. ⁵⁶ Ibheere emirëngaari ghe mororo uyo gheekamomoreka, omutamishi umu o ghikari akamumöghörëra amiisho akabhugha, “Omooto uno, naare haghirohamu nawe.” ⁵⁷ Amare Bheetero akanga akabhugha, “Aa omukari uno! Ntemweche eni!”

⁵⁸ Eriibhagha isuuhu, omooto owonde akamorighi Bheetero, akamobhoorera, “Iye n-umu o bhaanabheegha bha Yesu onyi.” Amare Bheetero akamugharokeri, “Aa woori! Taanyi eni!”

⁵⁹ Eriibhagha reekaheta kinya asa imu, omooto owonde akahënërëra arabhugha, “Omooto uno hëënë, naare haghirohamu nawe! Ndighi koru, iwe Mughariraaya!” ⁶⁰ Amare Bheetero aghagharokeri, “Aa woori! Ghayo okabhugha, koru ntegheche!” Hayohayo akeere arasiikera ghayo, asërëëcha eghaghamba. ⁶¹ Omutëmi aghishoorori, akamumööhi Bheetero mo-miisho. Hayohayo, Bheetero aghaghahiita amang’ana ghano Omutëmi are amariri komobhoorera, “Reero asërëëcha ekeere ghughamba, nookubha onyangiri ghatato.” ⁶² Hayohayo, Bheetero akahoroka anche, aghasëëma korera gho changishori chaaru.

Abhachongi ^bhaghachëëra Yesu

(Mataayo 26:67-68; Maariko 14:65)

⁶³ Ibheere abhachongi bhano :bhaare bharamochonga Yesu, bhaakabha bharamuchëëra, na komutëma chwee. ⁶⁴ Bhakamohunya amiisho, bharamobhoorera, “Nuröötë! Niwe aghutëmiri?” ⁶⁵ Bhakamoruuseri amang’ana maaru gha matoki.

Yesu ^aghasëmu ambërë e bhakoro

(Mataayo 26:59-66; Maariko 14:55-64; Yohana 18:19-24)

⁶⁶ Hano bhokiire, abhagaruka abhakangati bha Bhayahuuti bhaghaköra ekiina, mo-bhagaruka bhayo mbaare-mu abhakoro bha bhachaama, na abheeghi bha meghiro. Yesu akarëëtu ambërë e riibharacha riyo, ⁶⁷ bhakamobhoori, “Eryobha ndeturaghiri kubha ndeghoturetera Kirisito, kana! Notobhoorere, iye niye Kirisito?” Yesu aghagharokeri, “Koru nengabhabhoorera, motaaghokumi. ⁶⁸ Wiiki nengabhabhoori eribhoori, motaaghungarokeri. ⁶⁹ Amare korwera ibheere, Omoona o Mooto naakubha ikeere eribhaara re kwiro re Ryobha rechanguru.”*

⁷⁰ Abhagaruka abhakangati bha Bhayahuuti, bhakamobhoori Yesu wiiki, “Kana ibheere, iye n-Omoona o Ryobha onyi?” Yesu akabhagharokeri, “Kana niinyu bheene mobhughiri kubha eni neeni!”

⁷¹ Hayohayo, abhakoro bhayo bhakabhugha, “Kana! Ntokwenda bhwiibhatereri ke wiiki? Kana ntogwire arabhugha omwene!”

* 22:69 Kubha *eribhaara re kwiro* n-kuhaabhu obhokoro na asooko.

Yesu ^aghasëmu ambërë e Bhiraato

(Mataayo 27:1-2, 11-14; Maariko 15:1-5; Yohana 18:28-38)

23¹ Bhakamara, abhangangati bhayo bhoose bhakimeerera, bhakamohira Yesu o-Bhiraato.*² Bhaghasëema komusëma bharabhugha, “Omooto uno, ntomobhwine arasari ase yiito, gho kubha naakurëki abhaato bhatatöbhi erighöoti o-Kayisaari. Wiiki naakobhugha kubha iwe niwe Kirisito Omutëmi.”

³ Niho, Bhiraato akamobhoori Yesu, “Kana, iye niye omutëmi o Bhayahuuti?”

Yesu nawe akabhugha, “Kana noobhughiri iye mwene!”

⁴ Ibheere, Bhiraato akabhabhoorera abhakoro bhayo bha bhachaama, haghirohamu no obhoyo bho bhaato, “Omooto uno, taanyi ni isari ryoryose rino nerooche ghokooche.”

⁵ Abhaato bhayo, bhaakahënërëra kobhugha, “Naare arasegghereri abhaato kwo meeghi ghaache! Nasëëmiire iyo Ghariraaya, naamariri ghoghasanchi ase yoose e Yuteya, ibheere niino anyi.”

⁶ Hano Bhiraato oghwire ghayo, akabhoori, “Kana omooto uno mwikari o Ghariraaya?”⁷ Hano amanyiri kubha iwe Mughariraaya o mo-bhutëmi bho Herote, akamohira ghokooche. Mo-chaasiko chiyo, Herote naare hayo Yerusareemu.

Herote ^akamobhoori Yesu

⁸ Hano Herote amarooche Yesu, aghachömëru chwee gho kubha naare oghwire amang’ana ghaache. Wiiki naare arighomba gho chaasiko chaaru komorighi Yesu kwo miisho ghaache omwene, aratëëma ebhiraghe.⁹ Herote akamobhoori Yesu kwo mabhoori maaru chwee. Amare Yesu tamugharokiiri ng’ana yoyoose.

¹⁰ Abhakoro bha bhachaama na abheeghi bha meghiro, bhakimeerera komusëma Yesu gho changuru chwee.

¹¹ Herote na abhaashirikare bhaache bhaghasëema komochebhora, bhakamusëka, bhakamobheeki eriishaghi ichömu re ghitëmi. Bhakamara bhakamugharoki o Bhiraato.¹² Korwera orosiko ruyo, Herote na Bhiraato bhaakabha abhasaani, nangabha bhataare bharoghwana hayo ekeeniyuma.

Bhiraato aghishereri kubha Yesu aku

(Mataayo 27:15-26; Maariko 15:6-15; Yohana 18:38-19:16)

¹³ Akamara, Bhiraato akabhakoma abhakoro bha bhachaama, na abhangangati, na abhaato bha moghya o Yerusareemu.¹⁴ Akabhabhoorera, “Mundetiire omooto uno, kinya muchöngëri o bhaato. Ibheere muntëghëërë, omooto uno nemobhooriri ambërë yaanyu. Wiiki kwo masëmö ghaanyu ghoose, nterooche isari ryoryose ghokooche.¹⁵ Koru Herote woose, tarooche isari ghokooche, nikyo amugharokiri ghokwito. Mbe muntëghëërë, omooto uno taköriri ng’ana yoyoose, ino eghughëri aku!¹⁶ Ibheere nekomutëma, ndamara nemotighooroke.”¹⁷ Bhiraato uyo, nendiiru abhiighorere abhaato omubhöhu umu mo-chanyangi choose che Bhaasaka.]

¹⁸ Abhaato bhayo bhoose, bhaghaköra eriireghe haghirohamu bharabhugha, “Omooto uno, ntomwite! Motwighorere Bharaabha.”¹⁹ Bharaabha uyo, naare abhöhuru mwichërëcha gho kubha :naarëtiri anyoori yaaaru mo-moghya o Yerusareemu, na ghwita abhaato.

* **23:1** *Bhiraato* uyo naare omukangati o Bhuyahuuti. Wiiki iwe niwe are obhotoro bho koruusi omooto ghwitu.

²⁰ Bhiraato, naare kwenda komotighooroka Yesu, aghaye wiiki ghosiikera na abhaato bhayo. ²¹ Amare ibho bhaakahënërëra ghuköra eriireghe, “Omwite mo-musarabha! Omwite mo-musarabha!”

²² Aghasiikera nabho wiiki mara e ghatato, “Aa motighe tooghu! Naköriri mabhe ke? Kana ntekorighi ng’ana ghokooche ino eghughëri aku! Ibheere nekomutëma, ndamara nemotighooroke.”

²³ Amare, abhaato bhayo bhaakahënërëra ghuköra riireghe chwee kubha Yesu amambu mo-musarabha. Antenero, eriireghe reebho reekamokinda.

²⁴ Ibheere, Bhiraato akabhisherereri Abhayahuuti bhayo ghuköra kinya bhaakwenda. ²⁵ Akabhiighorera Bharaabha wuure :bhaare bhareenda, nangabha are abhöhuru gho kurëëta anyoori yaaru mo-moghya, na ghwita. Akabhaha Yesu, kubha bhamukörërë bhuyo bhaakwenda.

Yesu ^akamambu mo-musarabha

(Mataayo 27:32-44; Maariko 15:21-32; Yohana 19:17-27)

²⁶ Hano :bhaare bharamohira Yesu komwita, bhaghatëmëërana no omooto umu, eriina reeche Simiyooni, o mo-moghya o Kireene. Simiyooni uyo, naare araru anche e moghya o Yerusareemu, bhakamughööta, bhakamughëghi omusarabha o Yesu. Aghaye awughëghiri, aramoru anyuma.

²⁷ Abhaato bhaaru bhakamoru anyuma Yesu. Ggate yaabho, mbaare-mu abhakari bhano :bhaare bharamorerera kwo macheeche. ²⁸ Yesu akabhisshorereri, akabhabhoorera, “Aa abhaghiikoro bhano bha Yerusareemu! Motanderera! Amare, mwirerere inyu bheene, morerere na abhaana bhaanyu! ²⁹ Gho kubha mo-chaasiko chino chekuucha, abhaato mbakobhugha kubha, ng’oni abhaghiikoro abhaghomba, bhano bhatibhwire kuru ghughööki abhaana. ³⁰ Eriibhagha riyo niryo abhaato bhakobhoorera ebheghoro, mo-toghwere, ne eheghoro mo-tokundereri!”

³¹ “Aribha abhaato mbawuköriire hang’u omote omobhese, nibhu ekubha kwo mote omoomu!”*

³² Kwo eriibhagha riyo, abhaashirikare bhakamohira Yesu, na abhaato abhande bhabhere bha masari, gho ghiri bhiiitu hagiromamu. ³³ Hano bhaahikiri ahaghiro ha-kobherekeru Ekehoore ke Mooto. Bhakamosunga Yesu mo-musarabha, hagiromamu na bhayo bha masari bhabhere, umu eribhaara re kiwiro, no owonde eribhaara re kumosi.

³⁴ Yesu akabhugha, “Oo Taata! Obhaabhere, gho kubha bhateeche kino bhaaghuköra.”

Bhakamara, abhaashirikare bhayo bhaghatëmëëra akuura amaghööti gha Yesu, ghoghahööha. ³⁵ Abhaato bhakimeerera haare bharamööhërëri.

Abhakoro bha Bhayahuuti, bhakamochebhora Yesu bharabhugha, “Kana :naatooriri abhande! Ibheere, aribha niwe Kirisito omwahoru o Ryobha, nitoori omwene!”*

³⁶ Abhaashirikare bhoose, bhakamochebhora, bhakamwishukeerera, gho ghiri bhamuhe amaro amaroro kayi. ³⁷ Bhakamobhoorera, “Aribha iye n-omutëmi o Bhayahuuti onyi, witoori iye mwene!”

³⁸ Ighoro yaache, ngaare ghatöruru amandeko, ghandekuru, “UNO, NIWE OMUTËMI O BHAYAHUUTI.”

* 23:30 Mööhi Hoseya 10:8.

* 23:31 Aribha bhaköriri hang’u kwo mooto omuhëënë, ataanyi ni isari Yesu, nibhu ekubha kwo bhaato bha masari?

* 23:35 *Kirisito omwahoru o Ryobha* Omooto uno ahakuru amaghuta ne Eryobha.

³⁹ Umu o bhayo bhamasari bhabhere, bhano :bhaare bhasunguru mo-musarabha aghatoka Yesu arabhugha, “Kana iye niiye Kirisito! Mbe witoori iye mwene! Na niitu, ototoori!”

⁴⁰ Amare, omughëndi akamoshaang’i, akabhugha “Kana toghotiina Eryobha? Gho kubha ghoteneru ekiina kuno toteniiru, niko kuyo kuyo omooto uno ateniiru.

⁴¹ Amare itu, ntoteniiru ekiina kwo bhuhëënë, kurëng’aana na amaköri ghiito, amare uno, taanyi niisari rino aköri.”

⁴² Ache kumara ghayo, akabhugha, “Oo Yesu! Hano oghusöha mo-bhutëmi bhoocho, na neeni ohiite!” ⁴³ Yesu akamugharokeri, “Neghakobhoorera obhuhëënë, reero ntokubha haghirohamu mo-chaasare.”

Yesu ^aghaku

(Mataayo 27:45-56; Maariko 15:33-41; Yohana 19:28-30)

⁴⁴ Eriibhagha re chaasa ishaasabhe che mwishe, ghekabha ekeng’uuri mo-se yoose mbagha hano ehikiri chaasa kende, ⁴⁵ eryobha reeghatigha kurëngaari. Omwando uno ore oteniini Mwisëngërö oribhiri ahaghiro Ahasooku, oghachaaruka ghatighate amabhaara abhere.

⁴⁶ Yesu aghakuura kwo riiraka ikoro akabhugha, “Oo Taata waane! Ngatoora akörö yaane mo-mabhökö ghaacho.” Hano amariri kobhugha ghayo, aghatena akörö.

⁴⁷ Omokoro o bhaashirikare bhayo, hano arooche ghayo, aghakumi Eryobha, arabhugha, “Oo! Hëënë, omooto uno muhëënë are!”

⁴⁸ Abhaato bhoose bhano :bhaare bhikomiine korighi amang’ana ghayo, bhaghagharura mo-chaaka cheebho, bhariitëmatëma ebhekubha kwo macheeche.*

⁴⁹ Bhoose bhano :bhaare bhamweche Yesu, mbaare bhikeere kure hasuuhu, bharamööhërerü ghano ghaaghukörëka. Mo-bhayo, mbaare-mu abhakari bhano bhamoruure anyuma koru mo-muköowa o Ghariraaya.

Yesu ^akaryeku

(Mataayo 27:57-61; Maariko 15:42-47; Yohana 19:38-42)

⁵⁰ Naare-ho omooto umu, eriina reeche Yusubhu, o mo-kyaro ke Arimataaya, mo-se e Yuteya. Yusubhu uyo, naare umu o bhakoro bha Bhayahuuti. ⁵¹ Amare taare ishereriini na abhaghëndi gho kiina ghe komwita Yesu. Naare mooto muhëënë na mosooku ambërë e Ryobha, wiiki naare arätëngëra obhutëmi bho Ryobha bhuche.

⁵² Ibheere, Yusubhu uyo aghaye o-Bhiraato komusabha amuhe erihundughu re Yesu. ⁵³ Bhiraato aghishereri, Yusubhu akariiki erihundughu re Yesu koru mo-musarabha, akarebhishi angibho yeero e ghitani. Akamara, akariraari mo-mbeehera ino ere etukuru mwitare. Na mo-mbeehera iyo, taare-ho mooto owonde are amara aryeku-mu. ⁵⁴ Orosiko ruyo, ndoore orosiko ro masëëmö gha rosiko ro Riikane.* Orosiko ro Riikane, ndoore rooghasëëma ghusöha.

⁵⁵ Abhakari bhano :bhiichiri haghirohamu na Yesu koru Ghariraaya, bhakamoru anyuma Yusubhu. Bhakayerighi ambeehera iyo, na kebhuno erihundughu re Yesu riraariru-mu. ⁵⁶ Bhakamara bhaghagharura aka bhaghaköra amaghuta ne ebheneeso gha kuhaka erihundughu re Yesu. Amare bhakaweera singa kwo orosiko ro Riikane, kinya emeghiro ghekobhugha.

*23:48 *Bhariitëmatëma ebhekubha kwo macheeche* Hano Bhayahuuti :bhaare kubha na amacheeche, mbaare bhariitëmatëma ebhekubha.

*23:54 *Orosiko ro riikane* kwo Bhayahuuti ndoore rorasëëma orosiko ro ichumaa [roghataano] omughöröobha.

Yesu ^akaryoka

(Mataayo 28:1-10; Maariko 16:1-8; Yohana 20:1-10)

24¹ Eriibhagha re make orosiko ro chumabhiiri, abhakari bhayo bhaaghaye mo-mbeehera. Mbaare bhaghëghiri ebheneeso bhino :bhaare bhaköriiri.² Hano bhaahikiri bhakabhöna eribbohe rino :reere rehunyiri ambeehera iyo, rehiringituru kure na ambeehera. ³ Ibheere, bhaghasöha-mu, amare bhataabhwine erihundughu re Omutëmi Yesu.

⁴ Eriibhagha :bhaare bhakeere bhahhiri ighoro e ghayo, hayohayo abhaato bhabhere bhakimeerera haghue nabho, bhabheekiri amaghöoti gha kurëngaari meero chayi. ⁵ Abhakari bhayo, hano bharooche ghayo, bhaghaghöotu no obhotiini chwee. Bhakahiinya amasho ghaabho haase. Amare, abhaato bhayo bhakabhabhoorera, “Neke mooghutabharëra omuhöru mo-bhaku? ⁶ Taanyi hano! Naryokiri! Kana motakohiita amang’ana ghaare :abhabhooriire hano are akeere mo-muköowa o Ghariraaya, ⁷ ‘Omoona o Mooto, nakwenderu aruusibhu mo-mabhökö gha bhamasari. Naakumambu mo-musarabha, no orosiko ro ghatato, naakoryoka!”

⁸ Amang’ana ghayo gha Yesu, abhakari bhayo bhaghaghahiita. ⁹ Hano bharuure mo-mbeehera, bhaaghaye kobhabhoorera abhatomu bha Yesu ikomi na umu, na abhaghëndi abhande. ¹⁰ Abhakari bhayo, m-Mariyamü o Maghitareena, na Yowana, na Mariyamü nyina Yakobho, na abhakari abhande bhano bhaghiire nabho mo-mbeehera.

¹¹ Ibheere, bhaghaghasiikera amang’ana ghayo ghoose kwo bhatomu bha Yesu. Abhatomu bhayo bhaghaghataraha, bhataaghakumiri.

¹² Hayohayo, Bheetero akimeerera, aghaye arahe mo-mbeehera, hano ahikiri akihiinya aghasongoreri-mu, akarighi changibho echeero chino bhamoryekiire Yesu, cheenyi echeene. Akaru hayo, ahaghiri chwee.

Orughëndö ro ghuye Emaau

(Maariko 16:12-13)

¹³ Kwo rosiko ruyo ro chumabhiiri, abhaghëndi bhabhere ghate e bhaanabheegha bha Yesu mbaare mo-rughëndö ro ghuye mo-kyaro ke Emaau. Ekyaro kiyo, nkeere no obhure bho masa abhere kuru Yerusareemu. ¹⁴ Hano :bhaare mo-nchera bhaakabha bharasiikera abheene ighoro e mang’ana ghoose ghano :ghaakörëkiine Yerusareemu.

¹⁵ Hano :bhaare bhakeere bhaghasiikera, Yesu omwene akaacha, aghaghëndä haghirohamu nabho. ¹⁶ :Mbaamorooche amare Eryobha rekabhaköra bhange kumanya aribha niwe.

¹⁷ Akabhabhoori, “Mang’ana ke moghaghëndä morasiikerera?” Bhakimeerera, amasho ghaabho ghakunyiri ghareereki amacheeche. ¹⁸ Umu o bhayo, eriina reeche Kiroobha, akamugharokeri, “Mo-bhaato bhoose bhano bhamënyiri Yerusareemu na abhaghëni bhoose, kana iye niye otooghwire ghoose ghano ghakörëkiine Yerusareemu chaasiko chino?” ¹⁹ Yesu nawe akabhoori, “Mang’ana ke ghayo?” Bhakamugharokeri, “Itu ntooghosiikera ighoro e ghano ghaakörëkiine o-Yesu o Nasareeti. Eryobha na bhaato bhoose mbaarooche kubha, iwe muröoti are, wiiki naare no obhotoro bho ghuköra na ghosiikera. ²⁰ Amare, abhakoro bha bhachaama, na abhakangati bhiito, bhakamuhana kwo bhakangati bha Keruumi, kubha ateneru ekiina ghoku, bhakamumamba mo-musarabha. ²¹ Itu ntoore toriitëng’ëra kubha iwe niwe aghotoori Isiraeri. Ibheere, korwera hayo ghakörëkiine, reero n-orosiko ro ghatato.

²² “Wiiki, abhakari abhande bha wiito mbatutakiri gho kubha reero atabhoori churi, mbaaghiire mo-mbeehera, ²³ bhataabhwine erihundughu re Yesu-mu. Mbiichiri ghotobhoorera kubha mbarweriiru na Bhamarayika bhakabhabhoorera kubha Yesu muhōru.

²⁴ “Bhakamara, abhaghēndi bhiito bhaaghaye mo-mbeehera, bhakabhōna ghoose ghaanyi kinya abhakari bhayo bhatobhoorire, amare erihundughu bhatareroche.”

²⁵ Yesu akabhabhoorera, “Aa! Inyu mbaghēēghē moonyi! Neke moonyi bhakong’u mo-chaakōrō cheenyu ghokumi kuru ghano ghaasikiiru na abharōōti? ²⁶ Kana :yendiiru Kirisito abhōnē anyaako ino, akeere kubhōna obhokumi bhooche”

²⁷ Niho, Yesu akabheerekereri amang’ana ghoose ghano ghandekuru ighoro yaache, korwera mo-mandeko gha Musa, na mo-mandeko ghoose gha bharōōti. ²⁸ Hano :bhaare bhaghatng’i mo-kyaro kino :bhaare ghuye, Yesu aghiikōri kinya akeere mo-rughēndō. ²⁹ Amare, bhakamusasama chwee, “Nwikare haghirohamu na niitu! Kana bhookiira, ne keng’uuri ghekaacha.”

Niho, Yesu aghasōha mo-nyumba, aghiikara haghirohamu nabho. ³⁰ Ibheere hano bhikeere kuraaghera, Yesu akiimoki omughaate. Akawiitabheri, akawosuura, akabhaha.

³¹ Hayohayo, Eryobha rekabhahunyura amiisho, bhakarighi kubha n-Yesu. Nawe hayohayo akaru-ho.

³² Bhakabhoorani, “Aa! Hano asikiire na niitu mo-nchera, gho ghotobhoorera ghaare ghaanyi mo-Mandeko Amatōōbhiyu, kana totachomiiru gho ghano are aratobhoorera?”

³³ Kwo riibhagha riyoriyo bhakabhooka, bhaghagharura Yerusareemu. Hano bhaahikiri bhaghatēmēerana na abhatomu ikomi na umu bha Yesu bhikomiine haghirohamu na abhaato abhande.

³⁴ Abhaato bhayo :bhaare bhakomiine, bhakabhabhoorera, “M-mahēēnē kubha Omutēmi wiito naryokiri! Naamorweriire Simiyooni!”

³⁵ Niho bhayo bhabhere bhakabhabhoorera abhaghēndi ghaare ghoose ghaakōrēkiine mo-nchera. Bhakabhabhoorera na kebhuo :bhamumanyiri Yesu hano abhasuuri omughaate.

Yesu ^akabharwera bhaanabheegha bhaache

(Mataayo 28:16-20; Maariko 16:14-18; Yohana 20:19-23; Amakōri gha Bhatomu 1:6-8)

³⁶ Abhaanabheegha bhayo bha Yesu, hano :bhaare bhakeere bharsiikera ighoro e ghayo, hayohayo Yesu omwene akimeerera ggate yaabho. Akabhabhoorera akabhugha, “Omurēmbē ubhe na niinyu!”

³⁷ Bhaghiitaki, bhaghatiina chwee, Bhakihēēbha kubha mbarooche ekehu.

³⁸ Amare, Yesu akabhabhoorera, “Neke moghitumatera hang’u? Wiiki mookahaha chwee mo-chaakōrō cheenyu? ³⁹ Mumōōhi amabhōkō ghaane na amaghoru ghaane, niho mumanye kubha n-eni mwene! Mumbabhaate morighi, gho kubha ekehu ghetanyi ni iguha no omobhere, kinya bhuure mookorighi neenyi nawe.”

⁴⁰ Hano Yesu amariri kobhabhoorera ghayo, akabheereki amabhōkō na amaghoru ghaache. ⁴¹ Abhaanabheegha bhaache, bhaghasiighasiigha na koroghora chwee, kuru bhataakumiri aribha hēēnē.

Ibheere akabhabhoori, “Moonyi ne ekiinyakure ghyokoyose hano?” ⁴² Bhakamuha eghitamunyu gheesu ghyekiri. ⁴³ Aghakiimoki, aghakire ambērē yaabho.

⁴⁴ Akamara akabhabhoorera, “Eriibhagha neere nekeere neenyi haghirohamu na niinyu, ghano, nigho amang’ana ghaane ghano :mbabhooriire, kubha ghoose

ghano ghandekuru ighoro yaane ngakwenderu ghahikeerane. Ibhe mo-meghiro ghe Musa, na mo-mandeko gha bharööti, na mo-mandeko gha Sabhuri.”

⁴⁵ Mbe, Yesu akabhaköra bhamanye Amandeko Amatööbhiyu ghoose. ⁴⁶ Wiiki akabhabhoorera, “Yandekuru kubha Kirisito naakunyaakibhu na ghwitu, no orosiko ro ghatato, naakoryoka koru mo-bhaku. ⁴⁷ Na abhaato bha matöngö ghoose, korwera Yerusareemu, mbaakweghibhu kwo riina reeche kubha bhatukuunere amasari ghaabho, bhaabheru. ⁴⁸ Inyu niinyu morooche amang’ana ghayo :ghaakörëkiine wiiki niinyu moghohasiikera kwo bhande.”

⁴⁹ “Mutëghëërë! Nekobharëëtëra ighoro yaanyu eriiraghano re taata waane, eriiraghano riyo na Akörö Ahörëëru. Amare, mughanye mo-moghya hano Yerusareemu kubha mokuhaabhu obhotoro koru Mwishaaaro.”

Yesu ^akiimokibhu ghuye Mwishaaaro

(Maariko 16:19-20; Amaköri gha Bhatomu 1:9-11)

⁵⁰ Akamara Yesu akabhakangata abhaanabheegha bhaache mbagha mo-kyaro ke Bhetaniya. Hano bhaahikiri haare, aghaghöröröki amabhökö ghaache ighoro, akabhiitabheri. ⁵¹ Na hano are akeere arabhiitabheri, akabhatigha, akiimokibhu ghuye Mwishaaaro.

⁵² Hayo, bhakamusëngëra. Bhakamara bhaghagharuka Yerusareemu, bharasiighasiigha chwee. ⁵³ Bhaghiikara hayo Mwisëngëro, bharaghongi Eryobha.